

Ulutala o Lesona Ta'itasi

1. O Le Fe'au A Le Atua E Ala Mai Ia Iakopo	4
2. Poto E Onosa'i Ai	8
3. Fetaia'i Ma Fa'aosoosoga	13
4. Fa'atinoina O Le Fa'atuatua	18
5. Fa'ato'ilaloina O Le Uiga Fa'aitū'au	24
6. Fa'atuatua i Gaioga	29
7. Tatalo A'o Le'i Mātāla o Tatou Gutu	34
8. Filifiliina O Sini e Manatunatu i Ai	39
9. Agamalū o le Poto	44
10. Fa'ato'ilaloina o Ō Tatou Uiga Leaga	49
11. Filifilia o se Manatu e Sili atu ona Agamalū	55
12. Taula'i I Le Lagi	60
13. Tumau E Ala I Le Fa'atuatua	65

O *Lesona Fa'ale-Tusi Paia o le Sapati*, o se polokalame su'esu'e lea o aso ta'itasi, o loo fa'avae atoa lava i le Tusi Paia ma le Agaga o Valoaga e aunoa ma ni manatu fa'aopoopo. O si'itaga ua fa'apupu'uina i le tulaga e mafai ai, ina ia maua ai manatu manino ma le tu'usa'o. O puipui [] o loo fa'aaoga i nisi o fa'amatalaga ina ia mautinoa ai le manino, malamalamaaga ma'oti o le manatu o loo talanoaina, ma faigofie ai ona faitau. E matuā fautuaina lava le su'esu'eina atili o tusi o loo aumaia ai la tatou Lesona.

Aiā o meatotino © 2024 e le Matagaluega o le A'oga o le Sapati a le Seventh Day Adventist Reform Movement General Conference, 5240 Hollins Road, Roanoke, Virginia 24019, USA.
www.sdarm.org

Lesona Tusi Paia o le Sapati (USPS 005- 118), Vol. 100, No. 4, Oketopa–Tesema 2024. Saunia ma fa'asalalauina e le Matagaluega a le A'oga o le Sapati a le Seventh Day Adventist Reform Movement General Conference, Lomia ma tufatufaina e le Reformation Herald Publishing Association, 5240 Hollins Road, Roanoke, Virginia 24019–5048, U.S.A.

Fa'aliliuina e P. Wily.

Upu Tomua

O le tusi a Iakopo e tu'usa'o lava. Tatou te matuā mana'omia lava ona fe'au i le taimi lenei! O le tolu masina o loo soso'o mai nei, o tagata su'esu'e o le A'oga o le Sapatu i le lalolagi atoa, o le a latou su'esu'eina *Su'esu'ega i le Tusi a Iakopo*. O vaega sili ona tāua i le a'afiaga o le laulaufaiva (mo le lelei poo le leaga fo'i), o le usita'i i le Atua e ala i le fa'atuatua, o le mana o le tatalo, ma le fa'ata'ita'iga a Elia, o nisi nei o ulutala autū. Aisea e matuā fetau tele ai nei ulutala i le taimi lenei?

“O le agasala a le augatupulaga lenei, o le lē amana'iaina lea o poloa'iga ma'oti a le Atua. O le malosi o le a'afiaga i se taula'iga sese, e matuā telē tele.” – *Testimonies for the Church*, vol. 3, p. 483.

“Aua ne'i fa'asesēina e nisi i latou lava i le manatu e fa'apea, e mafai ona paia i latou a'o latou solia ma le loto se tasi o mana'oga o le Atua. O le faia o se agasala o loo iloa, e fa'agūgūina ai le leo molimau o le Agaga ma vavaeeseina ai le tagata mai i le Atua. 'O le agasala o le soliga lea o le tulafono.' Ma, 'so'o se tasi lava e agasala [ua ia solia le tulafono] ua ia lē va'ai atu ia te Ia, ua ia lē iloa fo'i o Ia.' 1 Ioane 3:16.” – *The Great Controversy*, p. 472.

“O le aso lenei ua mana'omia ai le leo o le a'oa'iga mausali; auā o agasala leaga ua vavaeeseina ai tagata mai i le Atua. O le lē fa'amaoni ua matuā fa'ata'alise le avea ma uiga ta'uta'ua. 'Matou te lē manana'o e pule le tane lea ia i matou,' o le gagana lea a le afe ma afe o tagata. Luka 19:14. O lauga i upu molemole ia e masani lava ona laugaina, e lē o faia ai se a'afiaga tumau; o le pū na te lē o iliina atu se leo mautinoa. O tagata e lē o tuia i o latou loto, e upu moni manino ma'ama'ai o le upu a le Atua.

“O loo to'atele kerisiano o loo ta'utino mai o i latou o kerisiano, afai latou te fa'ailoaina mai o latou lagona moni, o le a latou fai mai, O le a le aogā o le tautala fa'amaoni? Sa sili ai ona latou fesili fa'apea, Aisea na mana'omia ai e Ioane lē e Papatiso, lona fai atu i Faresaio, 'O outou tupulaga o gata fe'ai e, o ai na lapata'iina outou ina ia outou sosola ese mai i le to'asa o le a o'o mai?' Luka 3:7. Aisea na mana'omia ai ina 'ia ia fa'aosofia le ita o Herotia e ala i le ta'uina atu ia Herota, e sā i le tulafono lo la nonofo ma le avā a lona uso? O Ioane lē sa muamua atu ia Keriso, na fasiotia o ia ona o lona tautala manino tu'usa'o. Aisea na lē mafai ai ona ia aga'i atu pea e aunoa ma le fa'atupuina o le ita o i latou sa ola i totonu o le agasala?

“O le finauga lea mai i tane e tataua ona latou tula'i e avea ma leoleo fa'amaoni o le tulafono a le Atua, se'ia o'o ina suitulaga tulafono fa'atuina, i le fa'atuatua, ma, o agasala ua fa'atagaina ina ia faia pea e aunoa ma le a'oa'iina. O afea o le a toe fa'alogoia ai le leo o le a'oa'iga fa'amaoni i totonu o le ekalesia?” – *Prophets and Kings*, pp. 140, 141.

“O auala taumasuasua ua uma ona faia mo atali'i ma afafine ta'itasi uma o Atamu, ina ia latou maua ta'ito'atasi ai se iloa e fa'atatau i le finagalo o le Atua, ina ia fa'aatoatoaina ai le amio fa'aKerisiano, ma ia fa'amamāina ai e ala i le upu moni.” – *Testimonies for the Church*, vol. 2, p. 644.

Tatou te mana'omia moni lava le fesoasoani a le Atua ma ua fa'amautinoa manino mai lava ia i tatou, “so'o se tatalo finafinau lava e faia i le fa'atuatua mo so'o se mea lava, o le a taliina mai. Atonu e lē o'o mai nei tali e fa'apei lava ona tatou ole atu ai; peita'i, o le a o'o mai, atonu e lē foa'iina mai i le auala tonu lava na tatou manana'o ai, peita'i o le a o'o mai i le taimi tonu lava e sili ona tatou mana'omia ai.” – *Ibid.*, vol. 3, p. 209. Amene!

O le Matāgaluega a le A'oga o le Sapatu a le Koneferenisi Aoao

Taulaga Sapati Muamua mo se Fale Tapua'i i Reading, Pennsylvania, USA.

O le Matagaluega i Amerika i Sasa'e (EUSF) ua vaevaeina i vaegā eleele e 8, e fausia i setete o Pennsylvania, New York, Connecticut, Rhode Island, Massachusetts, Maine, Vermont, ma New Hampshire. O le galuega i Pennsylvania o loo fa'atupulaia lona tuputupu a'e i le taimi lenei. O se fua fa'atatau, e ova atu ma le 53% o tagata i lenei setete, o tagata lolotu – e aofia ai Metotisi, tagata lotu Luteru, lotu Papatiso, Penetekoso, ma isi, ae e 28.3% o tagata lotu Katoliko. I ulua'i aso o pulega fa'akolone, o Pennsylvania sa avea o se nofoaga o sulufa'iga mo tagata faimalaga na sa'ilia le sa'olotoga fa'aletapua'iga ina ia sosola ese ai mai i sauāga i Europa. O lenei tala'aga o loo fa'amaonia pea i le taimi lenei i le telē o le fuainumera o tagata talitonu ua fa'aigoaina o tagata Amish, o loo fa'aauau pea ona latou nonofo i fa'aputuga o tagata i fa'ato'aga tetele i le atunu'u o Lancaster, ma oofu i ofu faigofie ma feoa'i i solofanua ma ta'avale solofanua.

I le tele o tausaga, sa nonofo ai ni nai tagata SDARM i Pennsylvania ma sa faia ai fo'i ni koleniga fa'amisionare iinei. Peita'i o le toe fa'atupulaia mai o le naunau i le upu moni mo le taimi lenei, na amata i le 2016 i le aai o Reading ina ua mavae ona si'itia atu i ai tagatā ekalesia e to'a lua mai i New York. O lea tama'i vaega o tagata na fa'ato'ateleina ma amata loa ona latou tapua'i i aoauli uma o Sapati ta'itasi, ma fa'atasi ai i se laufanua (park) i le tau mafanafana, ae tapua'i i le fale o se tasi o tuafafine i le tau malulū. Ina ua mavae ni nai masina o su'esu'ega, e to'atele na papatisoina i totonu o le fa'atuatuaga Toe Fuata'i.

O Reading e sili atu ma le 95,000 le faitau aofa'i o ona tagata ma o se nofoaga tutotonu o falefaigaluega e gaosi ai totoga o masini e fa'aaogaina le eletise, o masini e fa'aaoga i le soifua maloloina, ma masini e teu ai i totonu le eletise ma isi mea fa'apena. O la tatou ekalesia iinei e sili ona telē i totonu o le Matagaluega a Amerika i Sasa'e. E tele isi tagata fou o loo saunia e fa'atasi i tagata o le Atua. I le taimi lenei, o loo matou tapua'i ai i se fale o loo mautotogiina ma matou te manana'o e fa'amausaliina lo matou i ai iinei ma fa'alautele mo tala'iga sili atu. “So'o se nofoaga lava e fa'atula'ia ai se vaega o tagata talitonu, e tatau fo'i ona fausia ai se fale tapua'i. . . . I le tele o nofoaga ua laugaina ai le feau ma ua talia e tagata, o loo latou i ai nei nofoaga i se tulaga fa'atapula'aina, ma e itiiti lava se mea e mafai ona latou faia aga'i i le fa'amausaliina o auala o le a fa'aleleia ai le galuega. O le tele lava o taimi, o lenei tulaga, e fa'afaigatā ai ona fa'alauteleina le galuega.” – *Evangelism*, p. 376.

Talu ai la ona o lenei tulaga, ua matou ole atu nei i lo tatou au uso ma ē alolofa mai, mai i itu uma o le lalolagi ina ia fesoasoani mai ia i matou i le fausiaina o se fale tapua'i i Reading, ina ia sili atu le tele o tagata e mafai ona aumaia i totonu o le lafu. O lo outou agaga foa'i o le a matuā fa'atāuaina lava, ma o le a fa'amanuia le Atua ia te outou.

O lo outou au uso mai i le Laufanua i Amerika i Sasa'e

O le Fe'au a le Atua e Ala Mai ia Iakopo

MAU TAULOTO: “O a’u o Iakopo, o le auauna a le Atua ma le Ali’i o Iesu Keriso, o o’u alofa atu i itu aiga e sefulu ma le lua ua fa’asalalauina” (Iakopo 1:1).

“E leai se tagata, leai se mālō, e atoatoa i uiga ma manatunatuga ta’itasi uma. E tatau ona a’oa’o mai le tasi mai i le isi. O lea e finagalo ai le Atua i tagata o atunu’u eseese ina ia fefiloi fa’atasi, ina ia tasi i a latou talitonuga, tasi i sini. O le a fa’atusalia mai ai loa le fa’atasiga o loo i ai i totonu ia Keriso.” – *Testimonies for the Church*, vol. 9, pp. 180, 181.

Faitauga Fautuaina: *Testimonies for the Church*, vol. 9, pp. 190-203.

Ulua’i Aso

Setema 29

1. SO’O O KERISO

- a. O ai tane e to’a tolu e igoa ia “Iakopo” na feso’ota’i ma Keriso – ma o ai le to’atasi o i latou nei e masani lava ona tatou maitauina? Mataio 10:2, 3; 13:55.
- b. Ta’u mai ni taimi fa’apitoa na maua e Iakopo le uso o Ioane, ma Iesu. Luka 8:51-55; Mataio 17:1, 2; Mareko 14:32-34.

“O Ioane, le atali’i o Sepetaio, o ia lea o le tasi o so’o e to’a lua na ulua’i mulimuli ia Iesu. O ia ma lona uso o Iakopo o nisi nei o i latou sa i ai i le ulua’i vaega o tagata na tu’ua mea uma lava mo Lana auaunaga. Na latou tu’ua ma le fiafia o latou aiga ma a latou uo ina ia mafai ai ona latou fa’atasi ma Ia; sa latou feoa’i ma talanoa fa’atasi ma Ia; sa latou fa’atasi ma Ia i le paganoa filemu o le aiga e aunoa ma le fa’alavelaveina, ma fa’atasiga fa’alaua’itele fo’i. Na Ia fa’afilemūina lo latou mata’u, lavea’i i latou mai i mea sa lamatia ai, fesoasoani i o latou mafatiaga, fa’amafanafana i latou i o latou fa’anoanoaga, ma o le onosa’i ma le agalelei na Ia a’oa’o ai ia i latou, se’ia o’o ina foliga mai ua feso’ota’i o latou loto ma Lona finagalo, ma o le vilivilita’i o lo latou alofa, o lea na latou fa’anaunau ai ina ia sili lo latou latalata atu ia te Ia i totonu o Lona mālō.” – *The Desire of Ages*, p. 548.

“I tafatafa o le faitoto’a e aga’i atu i le togāla’au, na tu’ua ai iina e Iesu le au so’o uma se’ivagana ai so’o e to’a tolu, ma fa’atonu atu ia i latou ina ia latou tatalo mo i latou lava, ae mo Ia fo’i. Na Ia ulufale atu fa’atasi ma Peteru, Iakopo, ma Ioane i vaega mauualalo ifo o le togāla’au. O nei so’o e to’a tolu na sili ona latalata māfana ia Keriso. . . . O le taimi lea i Lana tauiviga silisili lava, na mana’omia ai e Keriso lo latou fa’atasi atu ia te Ia. Na masani lava ona latou fa’aaluina le po fa’atasi ma Ia i lenei nofoaga tu’ufua.” – *Ibid.*, p. 686.

2. INUMIA O LE IPU

a. Fa'amatala le ulua'i sini a Iakopo, le atali'i o Sepetaio, fa'atasi ai ma lona uso o Ioane. Mareko 10:35-38.

“I avanoa ta'itasi uma lava na mafai ona maua, na nofo ai Ioane i tafatafa o le Fa'aola, a'o Iakopo sa fa'anaunau ina ia fa'amamaluina o ia i se so'otaga vavalalata fa'apea ma Ia.

“O lo la tina sa mulimuli ia Keriso, ma na ia auaua sa'oloto ia te Ia i ana meatotino. O le alofa o se tina ma lona fa'anaunauga vilivilita'i mo ana tama tane, o lea na ia māna'ona'o ai i le nofoaga sili ona fa'amamaluina i le mālō fou mo i la'ua. O lenei vilivilita'i na ia fa'alototeleina ai i la'ua ina ia la ole atu ai ia Iesu.

“Ona o mai lea o le tina fa'atasi ma lana fanau tama ia Iesu, ma ole atu ina 'ia Ia talia se aioiga na mausali i ai o latou loto.

“ ‘O le a se mea tou te manana'o Ou te faia mo outou?’ O Lana fesili lea.

“Na tali atu le tina, ‘Ia E fetalai ane ina ia nonofo a'u nei tama e to'a lua, o le tasi i Lou itu taumatau, ma le isi i Lou itu tauagavale, i Lou mālō.’

“Na onosa'i ma le alofa Iesu ia i latou, o lea na Ia lē a'oa'iina ai lo latou loto fa'apito i lo latou sa'ili ia sili a'e i latou nai lo lo latou au uso. Na te faitaulia o latou loto, na te silafia le loloto o lo latou pipi'i atu ia te Ia. O lo latou alofa e lē na o se alofa fa'aletagata; e ui lava ina fa'aleagaina e le fa'alelalolagi o meafaigaluega fa'aletagata o loo tafe mai ai lea alofa, ae o se vaitafe lea o loo tafe mai i fafo, mai i le vaipuna o Lona lava alofa e toe fa'atauina mai ai. O le a Ia lē a'oa'i, peita'i o le a Ia fa'alolotoina ma fa'amamāina lea alofa. Na Ia fetalai mai, ‘E mafai ea ona oulua feinu i le ipu o le a Ou inu ai, ma papatiso i le papatisoga ua papatisoina ai A'u?’ Ua la manatua Ana upu uiga lilo, e fa'asino atu i tofotofoga ma puapuaga, ae na la tali atu ma le mautinoa, ‘Ma te mafaia.’ Na la manana'o ina ia aveā o se mamalu silisili lava le fa'amaonia atu o lo la fa'amaoni, e ala i lo la tofusia i mea uma lava o le a o'o i lo la Ali'i.

“ ‘O le a oulua feinu lava i La'u ipu, ma papatisoina i le papatisoga ua papatisoina ai A'u,’ o Lana fetalai lea; o loo i Ona luma se satauro ae lē o se nofoali'i, ma tane pagotā e to'a lua o Ona soa i Lona itu taumatau ma Lona itu tauagavale.” – *The Desire of Ages*, pp. 548, 549.

b. O le a le mea na tupu ia Iakopo ma lona uso o Ioane e fa'apei lava ona valoia mai e Keriso, ina ua mavae Lona afio a'e i le lagi? Galuega 12:1, 2; Fa'aaliga 1:9.

“O Ioane ma Iakopo na fuafuaina ina ia tofusia i puapuaga o lo la Matai; o le tasi, o ia lea o le au uso na ulua'i fano i le pelu; a'o le isi, na sili ona umi lona onosa'ia o galuega faigata, ma le fa'alumaina, ma sauaga.” – *Ibid.*, 549.

3. O AI NA TUSIA LE TUSI?

- a. **O fa’apefea ona fa’amatalaina e le Agaga Paia Iakopo le atali’i o Alefaio – o le tasi lea o le to’a sefulu lua (ae e lē o Iakopo le uso o Ioane Sepetaio)? Mareko 15:40.**

“Sa i ai Levi Mataio le telona, na vala’auina o ia mai i se olaga o galuega fa’apisinisi, ma sa auuana ia Roma; o Simona vilivilita’i, o le fili lea o le puleaga fa’atupu; na te lē faia se maliēga ma le agasala, o Peteru oso vale, agalelei, fa’alagolago ia te ia lava, fa’atasi ai ma Anetere’a lona uso; o Iuta le Iutaia, fa’aaloalo, agava’a, ma lē agalelei; o Filipo ma Toma, e tumu i le fa’atuatua ma le finafinau, ae e tuai ona talitonu o la loto; o Iakopo lē itiiti ifo ma Iuta, e lē iloga i la’ua i le lotolotoi o le au uso, peita’i o i la’ua o ni tane malolosi, e ioe i o la sese ma o la uiga lelei; o Natanielu, o se atali’i e fa’amaoni ma talitonu e pei o se tamaitiiti; ma atali’i finafinau loto alolofa o Sepetaio.”- *Education*, pp. 85, 86.

- b. **Aisea e foliga mai ai o le tusi tala o le tusi o Iakopo (lea e fa’ailoa mai o ia o se aposetolo ona sa ia iloa lelei le Ali’i), o le uso lea (half brother) o Keriso – ma e fa’apefea ona fa’ailoa mai e lona fa’amatalaina o ia lava, o lana amio na suia e le a’afiaga o le Ali’i? Iakopo 1:1 (vaega muamua).**

“Na sese le malamalama’aga o uso o Keriso e fa’atatau ia te Ia lava; auā o Ia e lē’i fa’apei o i latou. Na Ia galue ina ia fa’amalolo mafatiaga uma na Ia silafia, ma sa fa’amanuiaina Lana auuunaga i taimi uma. E itiiti lava le tupe sa ia te Ia Na te foa’iina atu, peita’i na masani lava ona Ia foa’iina atu Lana mea’ai fa’atauva’a ia i latou sa Ia manatu, na sili atu lo latou mana’omiaina nai lo Ia lava. O ona uso sa latou manatu, o Lona a’afiaga na mamao lona o’oo’oga e fa’alēaogā ai lo latou a’afiaga; auā ina ua latou tautala sauā atu i tagata matitiva, lē taualoa na latou feiloa’i, na sailia e Keriso nei tagata tonu lava, ma fetalai atu i upu fa’amalosi’au ia i latou. Afai na lē mafai ona Ia faia se isi lava auuunaga a’o i ai o Ia i totonu o le li’o o le aiga, na Ia avatu fa’alilolilo e aunoa ma se leo i le tulaga e mafai ai, i tagata maulalo lē taualoa ia sa Ia taumafai Na te fesoasoani i ai, le ipu vai malūlū, ona Ia tu’uina atu lea o Lana lava meaai i o latou lima.” – *This Day With God*, p. 59.

- c. **Na fa’apefea ona fa’ailoa e Paulo lona fa’aaloalo mo Iakopo, le uso o Iesu? Kalatia 1:17-19; Galuega 21:18.**

4. FA’AMANINOINA O NISI O MATAUPU

- a. **O le a se mea o loo fa’aalia ai o Iakopo, le uso o Keriso, o ia o se tagata o a’afiaga i se fonotaga tāua i totonu o le ulua’i ekalesia? Galuega 15:5, 6, 13, 19, 20.**

“I lenei mataupu, e foliga mai na filifilia Iakopo na te fa’asilasilaina atu le i’uga ua i’u i ai le filifiliga a le fonu. O lona manatu e fa’apea, o le tulafono fa’asauniga, aemaise ai lava le sauniga o le peritome, e lē tatau ona fa’amalosia atu i luga o tagata o Nu’u Ese, pe lagolagoina atu fo’i ia te’i latou. Na saili Iakopo ina ia fa’amamafa atu i mafaufau o lona au uso le mea moni lea, o le liliu atu i le Atua, na faia ai e tagata o nu’u ese se suiga tele lava i o latou olaga, ma e tele le fa’autauta e tatau ona fa’aaogaina ina ia aua ne’i fa’aatuatuvaleina i latou i fesili nunumi ma le masalosalo e itiiti lo latou tāua, ne’i fa’avaivaia i latou i lo latou mulimuli atu ia Keriso.” – *The Acts of the Apostles*, p. 195.

b. O le a le talitonuga masani -ae e sesē – ua fa’alēaogaina e le tofiga maualuga o Iakopo i lenei fonotaga tāua? Mataio 16:18.

“O Iakopo sa ta’ita’i i le fonotaga, ma o lana filifiliga mulimuli lenei, ‘O lenei, o lo’u lea manatu, aua tatou te fa’alavelave i tagata o nu’u ese, o ē ua liliu atu i le Atua mai i nu’u ese.’

“O lenei filifiliga na muta ai le talanoaga. O lenei fa’ata’ita’iga ua tatou maua ai se fa’amaoniga e fa’alēaogaina ai le mataupu o loo talitonuina e le Ekalesia Katoliko Roma e fa’apea, o Peteru o le ulu lea o le ekalesia. O i latou, e fa’apei o pope, ua latou fai mai o loo latou tauaveina mai lona tofiga, e leai se latou fa’avae fa’ale-Tusi Paia mo a latou fa’amatalaga fa’afoliga. E leai se mea e tasi i le olaga o Peteru o fa’atagaina mai ai le fa’aupuga e fa’apea, na si’itiaina o ia i luga a’e o lona au uso e avea ma sui o Lē Silisiliese. Ana fa’apea e mulimuli i le fa’ata’ita’iga a Peteru i latou o loo fa’ailoaina mai, o ni sui tu’ufa’asolo mai o Peteru, semanu e fa’amalieina i latou i taimi uma i lo latou tumau i se tulaga tutusa ma lo latou au uso.” – *Ibid.*, pp. 194, 195.

“E lē na o Peteru na tu’uina atu i ai e le Fa’aola le galuega o le tala lelei. I se taimi mulimuli ane, i Lona toe fetalaiina atu o upu sa Ia fetalaiina atu ia Peteru, na Ia fa’atauinaina tu’usa’o ai upu ia i le ekalesia. Ae na fa’apea fo’i ona Ia fetalaiina atu upu ia i le to’a sefulu lua i le avea o i latou ma sui o le tino o ē talitonu. Ana fa’apea e tu’uina atu e Iesu se pule fa’apitoa i se tasi o le au so’o e sili a’e nai lo isi, semanu tatou te lē maua i latou o masani ona finau poo ai o i latou e sili. Semanu ua latou gaua’i i le finagalo o lo latou Matai, ma latou amanaia ai lē na Ia filifilia.” – *The Desire of Ages*, p. 414.

Aso Tofi

Oketopa 3

5. O LE ISARAEU O LE ATUA

a. O ai o loo tusia atu i ai lenei tusi – ma e fa’apefea ona aofia ai i latou uma e taliaina Iesu e avea ma Ali’i? Iakopo 1:1 (vaega lona lua); Kalatia 3:27-29.

“I le lotolotoi o Isaraelu o le Atua, o le a fa’afuainumeraina ai le to’atele e lē’i tupuga mai ia Aperaamo i le tino.” – *Prophets and Kings*, p. 367.

“O le olaga o Keriso na fa’atūina mausalī ai se tapua’iga e lē maua ai ni vaevaega o vasega eseese fa’atulagaina o tagata, ae o se tapua’iga e feso’ota’i ai tagata Iutaia ma tagata o Nu’u Ese, sa’oloto ma pologa, i se so’otaga fa’aleuso, e tutusa uma i luma o le Atua.” – *Testimonies for the Church*, vol. 9, p. 191.

“O le fa’akerisiano e faia ai se so’otaga malosi lava o le tu’ufa’atasiga i le va o le matai ma le pologa, tupu ma le tagata lē taualoga, o le faifeau o le tala lelei ma le tagata agasala fa’aleagaina, o lē ua na mauaina i totonu ia Keriso le fa’amamāina mai i le agasala.”
– *The Acts of the Apostles*, p. 460.

b. I le valoaga, o le a le igoa ua tu’uina mai i le Isaraelu fa’aleagaga mulimuli lava – ma o fa’apefea ona fa’amatalaina i latou i le taimi tonu lava e soso’o ma le toe afio mai o Keriso? Fa’aaliga 7:4.

“E lē’i umi ae tatou fa’alogoina loa le si’ufofoga o le Atua e pei o vai e tele, lea na fa’ailoa mai ai ia i tatou le aso ma le itula e afio mai ai Iesu. O le au paia o loo ola, 144,000 lo latou fuainumera, na latou iloa ma malamalama i le leo, peita’i o tagata amioleaga na latou manatu o se faititili ma se mafui’e. . . .

“O le 144,000 sa fa’amaufa’ailogaina uma ma ua loto gatasi atoa. O ō latou muaulu sa tusia ai upu ia, le Atua, Ierusalem Fou, ma se fetu pupula sa i ai le Suafa fou o Iesu. I lo tatou tulaga fiafia ma le paia, na lili tele ai tagata amio leaga, ma na latou fa’ata’alaise mai ma le ita e pu’e atu i tatou ina ia lafo atu i tatou i le falepuipui, ae tatou fa’aloaloa atu lo tatou lima i le suafa o le Alii, ona latou pa’u’ū ai lea i le eleele e aunoa ma se fesoasoani. Ona iloa ai lea e le sunako o Satani, ua alofa mai le Atua ia i tatou, o ē na mafai ona fufulu e le tasi vae o le tasi, ma feiloa’i atu i le au uso i se kisi paia, ona latou ifo mai ai lea i o tatou vae.” – *Testimonies for the Church*, vol. 1, p. 59.

Aso Faraile

Oketopa 4

FESILI TOE FA’AMANATU

- 1. Na fa’apefea ona tupu a’e Iakopo le atali’i o Sepetaio, ina ia fa’apei o Keriso?**
- 2. Na fa’apefea ona tupu a’e Iakopo, le uso o Iesu lea la te tamā fa’atasi, ina ia fa’apei o Keriso?**
- 3. O a fa’amaoniga i totonu o le Tusi Paia e fa’ailoa mai ai o Peteru, e lē o ia o se aposetolo ta’ita’i?**
- 4. O fa’apefea ona fa’amatala e Paulo le tu’ufa’atasiga ma le tutusa uma o kerisiano uma?**
- 5. O le a se mea o loo fa’aata mai ai le manumalo mulimuli o le Isaraelu fa’aleagaga o le Atua?**

Lesona 2

Sapati, Oketopa 12, 2024

Poto e Onosa’i Ai

MAU TAULOTO: “Afai ua leai se poto i sō outou, inā ole atu ia i le Atua, o lē foa’i tele mai i tagata uma ma le lē toe ta’uta’ua; ona foa’iina mai ai lea ia te ia” (Iakopo 1:5).

“E te lē mana’omia ina ia ē alu i tulu’iga o le lalolagi mo le poto, auā o loo latalata mai le Atua. E lē o tomāi o loo ia te oe i le taimi lenēi poo tomāi fo’i o le a ē maua, o le a foa’iina atu ai ia te oe le manuia. Ae o le mea e mafai ona faia e le Alii mo oe. . . . Na te fa’anaunau e foa’i atu ia te oe le malamalama i mea fa’alētumau ae e fa’apena ai fo’i i mataupu fa’alēagaga. E mafai ona Ia fa’ama’iina le mafaufau. E mafai ona Ia foa’i mai manatunatuga lelei ma le tomāi. Ia ē tu’u atu au taleni i le galuega, ole atu i le Atua mo le poto, ma o le a Ia foa’iina mai ia te oe.” – *Christ’s Object Lessons*, p. 146.

Faitauga Fautuaina: *Testimonies for the Church*, vol. 1, pp. 120, 121; vol. 2, pp. 232-235.

Ulua’i Aso

Oketopa 6

1. AIOI ATU MO LE POTO

- a. **Aisea tatou te mana’omia moni ai lava i o tatou olaga le poto e sili a’e nai lo le poto fa’aletagata, ma e fa’aapefa ona tatou maua? Iakopo 1:5.**

“Tatou te mana’omia ina ia matuā itiiti lava lo tatou mautinoaga i le mea e mafai ona faia e le tagata, ae ia matuā sili a’e lava lo tatou mautinoaga i le mea e mafai ona faia e le Atua mo tagata talitonu ta’itasi uma. Na te fa’anaunau ina ia ē vala’au atu ia te Ia e ala i le fa’atuatua. Na te fa’anaunau ina ia ē fa’amoemoe i mea tetele mai ia te Ia.” – *Christ’s Object Lessons*, p. 146.

“O le na o le fa’alogo i lauga i lea Sapati i lea Sapati, o le faitauina o le Tusi Paia atoa, poo lona fa’amatalaina fo’i i fuaiupu ta’itasi, o le a lē fa’amanuiaina ai i tatou po’o i latou fo’i o loo fa’alogo i ai, se’ivagana ua tatou aumaia upu moni o le Tusi Paia i o tatou olaga ta’ito’atasi. O le malamalama’aga, o le malosī fai filifiliga o le mafaufau, o lagona alofa, e tatau ona gaua’i atu i le puleaga a le upu a le Atua. O le a avea loa fa’atonuga a le upu, ma tapula’a o le olaga, e ala i le galuega a le Agaga Paia.

“A’o ē ole atu i le Alii ina ia fesoasoani mai ia te oe, ia ē fa’amamaluina ma vi’ia lou Fa’aola e ala i lou talitonu e te maua Lana fa’amanuiaga. O le mana uma lava, o le poto uma lava, tatou te maua e ala i lo tatou ole atu ai. E na ona tatou ole atu ai lava.” – *The Ministry of Healing*, p. 514.

Aso Gafua

Oketopa 7

2. FA’AMALOSIA E ALA I LE TALITONU

- a. **O le a fa’aapefa ona fa’amanuiaina i tatou pe afai tatou te amanaiaina le poto o le Atua e matuā sili a’e nai lo lo tatou poto, e o’o lava i mea masani o le olaga? Fa’ataoto 3:3-8.**

“Afai ua leai se poto i sō outou, inā ole atu ia i le Atua, o lē foa’i tele mai i tagata uma ma le lē toe ta’uta’ua; o le a foa’iina mai fo’i ia te ia.’ O se folafolaga fa’apea e sili a’e lona tāua nai lo le auro poo le siliva. Afai e te sa’ilia ma le loto maulalo le ta’ita’iga fa’alelagi i puapuaga ta’itasi ma mea fo’i e femēmēa’i ai, ua ta’utino mai Lana upu, o le a foa’iina mai

ia te oe se tali e tumu i le alofa. Ma o Lana upu e lē mafai ona lē taunu'u. O le lagi ma le lalolagi e mavae ese atu, peita'i o Lana upu o le a lē mavae atu lava. Talitonu fa'alagolago i le Alii, ma o le a ē lē femēmēa'i lava pe fa'amāina fo'i. 'E sili le talitonu fa'alagolago ia Ieova nai lo le fa'alagolago i le tagata. E sili le fa'atuatua ia Ieova nai lo le fa'alagolago i ali'i.'

“Tusa lava po'o le a le tofiga i le olaga tatou te galulue ai, tusa lava poo le a la tatou pisinisi, e tatau lava ona tatou agamalu tatou te lagonaina ai lo tatou mana'omia o le fesoasoani; e tatau ona tatou fa'alagolago atoatoa i a'oa'oga a le upu a le Atua, ma ia tatou ioeina Lana tausiga ma Lana ta'ita'iga i mea uma, ma ia fa'amaoni fa'atuatua i le sasa'aina atu o ō tatou agaga i le tatalo. A outou fa'alagolago i lo outou lava malamalama'aga, le au uso e, a'o outou ui atu i totonu o le lalolagi, o le a outou seleseleina le fa'anoanoa ma le loto tigā. Talitonu fa'atuatua ia Ieova ma lou loto atoa, ma o le a Ia ta'ita'iina ou la'asaga i le potu, ma o mea o loo tāua ia te oe o le a saogalemu mo lenei lalolagi ma le lalolagi oi lumana'i. E te mana'omia le malamalama ma le iloa. O le a ē taliaina ai le fautuaga a le Atua poo lou lava loto; o le a ē savali ai i aloi afi na ē tutuina e oe lava, pe o le a ē fa'apotopotoina mai le malamalama fa'alelagi mai i le Lā o le amiotonu.” – *Testimonies for the Church*, vol.5, p. 427.

b. Aisea tatou te mana'omia ai ina ia tatou vavaeseina mai i tatou mai i lo tatou fa'alagolago malosi atu i isi tagata mo le ta'ita'iga? Ieremia 17:5-8.

“A tula'i mai loa mea e femēmēa'i ai, ma ua tatou fetaia'i ma faigata, aua tatou te sa'ili i tagata mo le fesoasoani. Ia tatou tu'u atu mea uma lava i le Atua. O le masaniga o le ta'uina atu o ō tatou fa'afitauli i isi, e na ona fa'avaivaia ai lava o i tatou, ma e lē aumaia ai fo'i se malosi ia i latou. E tu'u atu ai i luga ia i latou le avega o ō tatou ma'i fa'aleagaga, lea e lē mafai ona latou fofōina. Ua tatou sailia le malosi o le tagata sēsē e oti, ae sa tatau ona tatou maua le malosi o le Atua lē mafuatia e lē mafai ona sese.” – *Christ's Object Lessons*, p. 146.

Aso Lua

Oketopa 8

3. FAUSIAINA A'E O LE MAUSALI SILI ATU

a. O le a le tulaga e tatau ona tatou ausia a'o le'i mafai ona taliina mai e le Atua a tatou aioiga? Iakopo 1:6 (vaega muamua); Mareko 11:24. Fa'amatala se fa'ata'ita'iga e tasi o le auala e mafai ona tatou iloa le fausiaina a'e o le malosi i lenei tulaga. 1 Korinito 6:3-5.

“E to'aitiiti lava o loo iloaina matafaioi o loo i luga o ni faifeau to'aitiiti o loo tauaveina avega i lenei galuega. O le au uso e masani lava ona latou vala'au ma aveeseina mai nei tane mai i le galuega, ina ia auai atu i a latou tama'i mataupu, poo le fofōina fo'i o ni tofotofoga fa'aleekalesia, lea e mafai ona latou faia, ma e tatau fo'i ona latou faia e i latou lava. 'Afai ua leai se potu i sō outou, inā ole atu ia o ia i le Atua, o Lē foa'i tele mai i tagata uma ma le lē toe ta'uta'ua; o le a foa'iina mai fo'i ia te ia. Peita'i ia ole atu o ia i le fa'atuatua, aua lava ne'i masalosalo.' E tatau ona ia finafinau ma vilivilita'i. Afai e fa'alotolotolua, ma

masalosalo i taimi uma lava pe o le a faia moni e le Alii e fa'apei ona Ia folafola mai, o le a leai la se mea na te maua.

“E to'atele e va'ava'ai i a latou faifeau ina ia latou aumaia le malamalama mai i le Atua ia i latou, ma foliga mai ai latou te manatu o se auala sili atu lenei ona taugofie nai lō lo latou faia o le galuega faigata o lo latou o atu o i latou lava i le Atua mo le malamalama. O tagata fa'apea, e tele le fa'amanuiaga latou te lē maua. Afai latou te mulimuli i aso ta'itasi ia Keriso ma latou faia o Ia ma o latou Ta'iala ma o latou Fautua, e mafai ona latou maua se iloa manino o Lona finagalo, ma fa'apena ona latou maua ai se iloa tāua lava. Talu ai ona o le lē mauaina o lenei lava iloa e le au uso o loo ta'utinoina mai le upu moni, o lea latou te savavali ai i 'aloi afi na tutuina e isi; latou te lē iloa le Agaga o le Atua ma e leai so latou iloa e fa'atatau i Lona finagalo, ma fa'apena ai ona faigofie ona liliueseina i latou mai i lo latou fa'atuatua. O i latou o ni tagata e lē mausali, auā na latou fa'alagolago i isi ina ia maua ai se iloa mo i latou.” – *Testimonies for the Church*, vol. 2, pp. 643, 644.

b. O le a se mea o lo o fa'atusalia i ai se kerisiano e nā ona kerisiano i lana ta'utinoga, lea ua amata ona lē mausalī lona fa'atuatua? Iakopo 1:6 (vaega mulimuli); Kenese 49:4 (vaega muamua). E fa'apefea ona mafai ona tatou 'aloesese mai i lenei tulaga?

“O le fa'atuatua o le to'atele o le a fa'alotolotolua pe afai latou te fa'atalalē i taimi uma i lo latou feiloa'i fa'atasi mo fefa'asoa'iga ma le tatalo.” – *Ibid.*, vol. 4, p. 106.

“Ia ē talitonu i le upu a Keriso e aveva ma ou mautinoaga. Na te lē'i vala'auliaina ea oe e te alu atu ia te Ia? Aua lava e te fa'atagaina oe e te talanoa i se uiga e leai se fa'amoemoe, i se uiga e fa'avaivaia ai oe. Afai e te faia fa'apea, o le a tele le lelei o le a ē lē maua. O lou va'ai i foliga va'aia i fafo ma ē faitio ai pe a o'o mai faigata ma avega e mamafa mai, e te tu'uina atu ai le fa'amaoniga o se fa'atuatua ma'i, ma le vaivai. Ia ē tautala ma gaioi e peisea'i o lou fa'atuatua e lē mafai ona fa'ato'ilaloina.” – *Christ's Object Lessons*, pp. 146,147.

Aso Lulu

Oketopa 9

4. INOINO I SE LOTO VAELUAINA

a. E fa'apefea ona mafai ona tatou mautinoaga o le a taliina mai a tatou tatalo mo le poto? Luka 18:1; Iakopo 1:6, 7.

“[O le] aioiga mo le poto, e lē tataua ona aveva o se tatalo e leai sona uiga, e galo esese mai i le mafaufau i le taimi lava e uma ai ona faia. O le aioiga mo le poto, o se tatalo lea e fa'a'ailoa atu ai le naunauta'iga malosi, finafinau o le loto, e puna a'e mai i le iloaina o le leai o se poto e iloa ai le finagalo o le Atua.

“A uma ona faia le tatalo, afai e lē vave le o'o mai o le tali, aua e te fa'avaivai i le fa'atalitali ma ē lē mausalī ai loa Aua e te fa'alotolotolua. Pipi'i atu i le folafolaga, 'E fa'amaoni Lē ua vala'au ia te outou, o le a Ia faia lava.' E fa'apei o le fafine fa'atauanau ua oti lana tane, ia ē auganiina atu ai lou mana'oga, ma ia ē mausalī i le mafua'aga o lau aioiga. E tāua ea le sin,i ma e matuā telē ea lona i'uga mo oe? Ioe e matuā tāua moni lava. Ia aua

la e te fa'alotolotolua, auā atonu e tofotofoina lou fa'atuatua. Afai e matuā tāua lava le aogā o le mea o loo ē ole atu ai e te mana'omia, e tatau fo'i ona e faia se taumafaiga malosi ma le finafinau. Ua ia te oe le folafolaga; mataala ma tatalo. Ia ē mausalī ma o le a taliina mai lau tatalo; auā, e lē o le Atua ea lea ua Ia folafola mai ai? Afai e te lafoa'ia ai se mea ina ia maua mai ai, o le a sili atu ona ē fa'atāuaina pe a ē mauaina. Ua ta'u manino atu ia te oe, afai e te masalosalo, aua ne'i ē manatu o le a ē maua se mea mai i le Alii. Ua tu'uina mai iinei se lapata'iga ina ia aua ne'i fa'avaivai, ae ia ē fa'alagolago mausalī atu i le folafolaga. Afai e te ole atu, o le a Ia foa'i tele mai ia te oe e aunoa ma le toe ta'uta'ua.

“O iinei o loo faia ai e le to'atele se mea sese. Latou te fa'alotolotolua mai i la latou sini, ma to'ilalo ai loa lo latou fa'atuatua. O le mafuaaga leni latou te lē maua ai se mea mai i le Ali'i, le Puna o lo tatou malosi. E leai se tasi e mana'omia ina ia savali i le pogisa, ma tautevateva e fa'apei o se tagata tauaso; auā ua foa'i mai e le Alii le malamalama pe afai o le a latou taliaina i Lana lava auala filifilia, ae lē o le filifilia o lo latou lava ala. Na te mana'omia mai i tagata uma le galuea'iina ma le vilivilita'i o tiute o aso ta'itasi.” – *Testimonies for the Church*, vol. 2, pp. 130, 131.

b. Aisea e tatau ai ona tatou 'alo ese mai i le fa'alotolotolua? Iakopo 1:8; Salamo 86:11.

“A'o ta'utino mai tagata fa'apea o i latou o Kerisiano, o le to'atele o i latou o loo i ai uiga o le lalolagi i luga ia i latou, ma o ō latou lagona alofa e lē o tu'uina atu i luga o le Atua. Latou te fa'alotolotolua, ma faia ai se taumafaiga ina ia latou auauna i le Atua ma mamone i le taimi e tasi. . . . O lo latou taumafai e auauna i matai e to'a lua, latou te lē mausalī ai i o latou ala uma lava, ma e lē mafai ona fa'atuatuaina i latou. . . .

“O le a le aogā o le tautalagia o upu lelei, e faitioina ai le galuega a Satani, ae o le taimi lava lea e tasi o loo ulufale atu ai i le fa'ataunu'uga o ana faufauga uma? O le fa'alotolotolua leni.” – *The SDA Bible Commentary* [E. G. White Comments], vol. 7, p. 938.

Aso Tofi

Oketopa 10

5. MANATUAINA IAKOPO

a. O fa'apefea ona fa'aata mai e Iesu le finafinau tele e tatau ona tatou ofoina a'e ai a tatou aioiga mo le malosi e faia ai le finagalo o le Atua? Mataio 11:12.

“O le malō o le lagi ua puapuagatia i le sauā, ua ave fa'amalosia fo'i e tagata sauā le mālō lea.' O leni sauā e aveina ai le loto atoa. O le fa'alotolotolua o le lē mausalī lea. O le mausalī, fa'afitia e le tagata o ia lava ma taumafaiga fa'apaiaina, e mana'omia mo le galuega o le sauniuniga. O le malamalama'aga ma le malosi fai filifiliga o le mafaufau, e mafai ona au fa'atasi; peitai afai e lē o sauni le malosi fai filifiliga o le loto ina ia galue, o le a tatou to'ilalo. O tomai ma lagona ta'itasi uma e tatau ona galulue uma. O le tatalo vilivilita'i ma le finafinau, e tatau ona sui tulaga i le manatu māmā fa'alēano ma le paiē fa'afilemu. E na o taumafaiga finafinau, vilivilita'i lava ma le fa'atuatua i le amiotonu a Keriso, e mafai ai ona tatou manumalo, ma tatou maua ai le mālō o le lagi. O le tatou taimi tatou te galulue ai,

e matuā pu'upu'u lava. Ua matuā lata lava le toe afio fa'alua mai o Keriso.” – *The SDA Bible Commentary* [E. G. White Comments], vol. 1, p. 1096.

“O le upu moni tele ua tatou maua le avanoa e sili ona tāua tatou te talia ai, o lea e tatau ai, ma e mafai ona avea i tatou ma mea faigaluega ola o le malamalama i lalo o le mana o le Agaga Paia. E mafai ai loa ona tatou fa'alatalata atu i le nofoa o le alofa tunoa; ma o lo tatou va'aia o le nuanua o le folafolaga, tatou te to'otuli ai ma loto salamō, ma tatou sa'ilia ai le mālō o le lagi i se malosi fa'alēagaga lea o le a ia aumaia lona lava tau. O le a tatou ave fa'amalosia le malō o le lagi, e fa'apei ona faia e Iakopo. Ona avea loa lea o le tatou fe'au ma mana o le Atua e o'o atu ai i le fa'aolataga. O a tatou aioiga o le a tumu i le finafinau, tumu i le iloaina o lo tatou mana'oga tele; ma o le a lē te'ena i tatou. O le upu moni o le a fa'ailoaina atu e le olaga ma le amio, ma laugutu ua pa'i mai i ai malala ola mai i le fata a le Atua.

“A avea loa mo i tatou lenei iloa, o le a si'itia a'e loa i tatou mai i lo tatou olaga mativa, fa'atauva'a lea ua tatou teufatuina fa'apelepeleina. O le a tatou fufulueseina mai i o tatou loto le malosi e elea ma fa'aumatiaina ai o le loto fa'apito, ma o le a fa'atumulia i tatou i le viiga ma le agaga fa'afetai i le Atua. O le a tatou si'itiaina le Atua, le Atua o le alofa tunoa uma lava, o Lē ua Na fa'asilisiliina Keriso. Ma o le a Ia fa'aalia Lona mana e ala atu ia i tatou, ma faia ai i tatou o ni sele saito ma'ai i totonu o le laufanua o le seleselega. Ua valaau le Atua i Ona tagata ina ia latou fa'ailoaina atu o Ia.” – *Reflecting Christ*, p. 217.

Aso Faraile

Oketopa 11

FESILI TOE FA'AMANATU

1. Fa'amatala ni ki tāua i le mauaina o le poto sili atu mai i le Lagi.
2. O le a le mea e tupu pe a fa'amalieina i tatou i lo tatou fa'alagolago i le iloa fa'aletagata?
3. E fa'apefea ona mafai ona ou faia la'u vaega ina ia fa'asa'olotoina faifeau e taula'i i agaga fou?
4. O a vaega o le olaga atonu o loo sili atu ona ou fa'alotolotolua ai nai lo le tulaga o loo o'u iloa?
5. Fa'amatala le malosi ma le fetau o le tauiviga a Iakopo mo aso mulimuli.

Lesona 3

Sapati, Oketopa 19, 2024

Fetaia'i ma Fa'aosoosoga

MAU TAULOTO: “Amuia le tagata o lē onosa'i i le fa'aosoosoga: auā a uma ona tofotofoina o ia, o le a maua e ia le pale o le ola, ua folafolaina mai e le Alii i ē alolofa ia te Ia” (Iakopo 1:12).

“Ia ē tautala ma gaiou ia tutusa ma au tatalo. O le a faia ai se eseese lē mafuatia ia te oe, pe o le a fa'amaonia e tofotofoga le moni o lou fa'atuatua, pe fa'ailoa ai fo'i o au tatalo ua na o ni gaiou o foliga va'aia i fafo.” – *Christ's Object Lessons*, p. 146.

1. O LE MEA LILO O LE TUPUTUPU A'E FA'ALEAGAGA

- a. **Fa'amatala le mea lilo o le auala e mafai ai ona fa'ataunu'uina le Iakopo 1:2 i totonu ia i tatou. Ne'emias 8:10.**

“O tofotofoga uma lava e taliaina e peisea'i o ni faia'oga, o le a maua ai le olioli. O le olaga fa'aletapua'iga atoa lava o le a si'itiaina ai, toe fuata'iina ai, fa'aleleia ai, ma fa'amanogiina ai i upu ma galuega lelei. O le fili e matuā fiafia lava ina ia atuatuvaletagata, loto vaivai, fa'anoanoa, ma oi; na te mana'o ina ia faia uiga fa'apea, e manatu ai, o le a'afiaga lea o lo tatou fa'atuatua. Peita'i ua fuafua le Atua ina ia aua ne'i taliaina e le mafaufau se tapula'a maulalo. Na te fa'anaunau i tagata ta'itasi uma ina ia manumalo i le mana tausii o le Fa'aola.” – *Testimonies for the Church*, vol. 6, pp. 365, 366.

- b. **Aisea e fa'ataga ai e le Atua tofotofoga e o'o mai i luga ia i tatou? Iakopo 1:3; Roma 5:3.**

“Afai tatou te manumalo i o tatou tofotofoga ma tatou maua ai le manumalo i fa'aosoosoga a Satani, ua tatou manumalo loa i le tofotofoga o lo tatou fa'atuatua, lea e sili atu lona tau nai lo le auro, ma ua fa'amalosia loa i tatou ma ua sili atu ona saunia i tatou e fetaia'i ma le tofotofoga o loo soso'o mai. Peita'i afai tatou te goto ifo i lalo ma gaua'i atu i fa'aosoosoga a Satani, o le a fa'avaivaia i tatou ma tatou lē maua ai se tau mo le tofotofoga ma o le a lē saunia lelei i tatou mo le tofotofoga o loo soso'o mai. O le auala lena o le a tatou vaivai ai ma atili vaivai ai, se'ia o'o ina ta'ita'i fa'atagataotauaina i tatou e Satani i lona lava loto. E tatau ona tatou oofu i le ofu tau atoa lava a le Atua ma tatou sauni i so'o se sekone mo se fete'ena'iga ma malosii o le pouliuli.” – *Early Writings*, p. 46.

2. I'UGA E SILI ATU ONA LELEI NAI LO I'UGA UA TATOU MANATUNATU I AI

- a. **Fa'amatala fa'amanuiaga o le fa'atinoina o le onosa'i. Iakopo 1:4; Luka 21:19.**

“E poto tele le Atua ma e lelei tele o Ia, o lea Na te lē taliina mai ai i taimi uma a tatou tatalo i le taimi tonu lava ma le uiga tonu lava o loo tatou manana'o ai. O le a Ia faia mea e sili atu ona tele ma sili atu ona lelei mo i tatou nai lo le na ona fa'ataunu'uina o ō tatou mana'oga uma. Ma, talu ai la e mafai ona tatou talitonu fa'alagolago i Lona poto ma Lona alofa, o lea e lē tatau ai ona tatou ole atu ia te Ia Na te gaua'i i o tatou mana'oga, peita'i e tatau ona tatou sa'ili e ulufale atu ma fa'ataunu'uina Lana fuafuaga. O ō tatou mana'oga ma mea o loo tatou naunau i ai, e tatau ona gaua'iina atu i Lona finagalo. O nei mea uma e tofotofoina ai le fa'atuatua, e mo lo tatou lelei. O mea nei e fa'aalia ai pe moni ma fa'amaoni

lo tatou fa'atuatua, ma fa'alagolago tasi atu i le upu a le Atua, pe e lē mautinoa fo'i ma fesuisuia'i, e fa'alagolago i mea e tutupu, O le fa'atuatua e fa'amalosia e ala i le fa'atinoina. E tatau ona tatou fa'atagaina le onosa'i ina ia faia lana galuega atoatoa ona lelei, ma ia tatou manatua ai, o loo i ai folafolaga tāua lava i totonu o le Tusi Paia mo i latou e fa'atali ia leova.” – *The Ministry of Healing*, p. 231.

b. E fa'aapefa ma aisea fo'i ua fa'ailoa mai ai e Iakopo ia i tatou se ata e sili atu ona telē, nai lo na o le vaa'iga fa'alētumau o le malosi ma le tamaoaiga i lenei lalolagi amio leaga? Iakopo 1:9-11.

“I le taimi lenei, a'o le'i o'o mai le fa'afitauli tele mulimuli, e fa'apei o le taimi a'o le'i o'o i le ulua'i fa'aumatiaga o le lalolagi, o tagata ua matuā mitiia o latou mafaufau i fiafiaga ma le fa'amalieina o lagona. O le fa'atumulia o i latou i mea o va'aia ma lē tumau, o lea ua latou lē iloa atu ai mea e lē o va'aia ma le olaga e fa'avavau. O loo latou fa'asatauroina oa e lē pala mo oa e pala i le fa'aaogāina. O ō latou mafaufau e mana'omia ina ia si'itia a'e i luga, o ō latou manatu e fa'atatau i le olaga e mana'omia ina ia fa'alauteleina. Latou te mana'omia ina ia ala mai nai le vaivai o mana'ona'oga fa'alalolagi.

“E amata mai i le tula'i a'e ma le pa'ū o mālō e fa'apei ona fa'amanino mai i laupepa o le Tusi Paia, latou te mana'omia ina ia latou iloa le lē aoga o le mamalu i le va'aiga i fafo, ma le mamalu fa'alalolagi. O Papelonia, fa'atasi ai ma lona malosi atoa uma ma lona matagofie, e lē'i fa'aapea ona va'aia e lo tatou lalolagi talu mai Papelonia – o le malosi ma le matagofie na foliga mai i tagata o lena taimi, na matuā mausalī lava ma tumau – ua matuā mavae atoatoa ese atu lava! E pei 'o le fuga o le mutia', ua fano. E fa'aapea fo'i ona fano o tagata uma ma mea uma lava e lē o fa'avaeina i le Atua. E na o i latou lava o loo fusia fa'atasi ma Ana fuafuaga, ma o loo fa'ailoa mai ai Lana amio, e mafai ona tumau. O Ana tapula'a e na o le pau lava ia o mea e tumau o loo iloa e lo tatou lalolagi.” – *Education*, p. 183.

“O oa fa'alalolagi e mavae atu. E na oi totonu lava ia Keriso e mafai ai ona tatou maua oa e tumau e fa'avavau.” – *The Review and Herald*, December 10, 1901.

Aso Lua

Oketopa 15

3. I LE VEVELA O LE TAU

a. I le fetaia'i ma fa'aosoosoga, o le a se mea e tatau ona tatou faia ma le tatalo, ma aisea fo'i? Iakopo 1:12.

“Ia tu'u ese le uiga fa'afoliga uma lava ma le taufa'asese. Ia ē amio ma gaiou i lou lava uiga faigofie fa'alēnatura. Ia ē fa'amaoni i manatu ma upu ma gaiouga ta'itasi uma, ma 'ia ta'itasi ma manatu ifo ma le loto maulalo, ua sili nisi uma nai lo i latou.' Ma ia manatua i taimi uma lava, o le natura o le amio lelei, e mana'omia ina ia fa'amalosia i le mataala ma le tatalo i taimi uma lava. A tumau lava lou va'ava'ai ia Keriso, o loo ē saogalemu; peita'i o le sekone lava e te manatunatu ai i taimi ua ē fa'asatauroina ai oe lava ma ou fa'afitauli, ma amata ai ona ē alofa ia te oe lava ma fa'aapelepele oe lava, ua leiloa ese loa mai ia te oe

lou talitonu fa'alagolago atu i le Atua, ma ua ē i ai i le fa'afanoga tele lava." – *Testimonies for the Church*, vol. 4, p. 522.

“E tatau ona tatou aga'i i taimi uma lava i luma, ma aua lava ne'i fa'avaivai pe leai fo'i se fa'amoemoe i le galuega lelei, tusa lava po'o a tofotofoga e osofa'ia ai o tatou ala, tusa lava poo le a le pogisa o le amio atonu e si'omiaina ai i tatou. O le onosa'i, fa'atuatua, ma le alofa mo tiute, o lesona ia e tatau ona tatou a'oa'oina. O le fa'ato'ilaloina o i tatou e i tatou lava ma le va'ava'ai atu ia Iesu, o se galuega lea o aso ta'itasi. O le a lē lafoa'ia lava e le Alii le tagata e talitonu fa'alagolago ia te Ia ma sa'ilia Lana fesoasoani. O le paleali'i o le ola e na o le muaulu lava o le tagata manumalo e tu'uina i ai.” – *Ibid.*, vol. 5, pp. 70, 71.

b. Aisea e sese ai le fa'apea ifo, o le Atua Na te auina mai tofotofoga ma fa'aosoosoga? Iakopo 1:13.

“E lē tatau ona tatou taumafai e fa'aitiitia lo tatou agasala e ala i le faia o alofaga mo a tatou agasala. E tatau ona tatou taliaina le fua a le Atua mo le agasala, ma e matuā mamafa moni lava. E na o le maliu lava o Iesu e mafai ona ia fa'aalia le telē mata'utia tele o le agasala. . . .

“O le fa'aosoosoga o le fa'atosinaga lea a le agasala, ma o lenei tulaga e lē mai i le Atua, ae e aumai ia Satani ma le leaga o ō tatou lava loto. 'E lē mafai ona fa'aosoosoina le Atua i le agasala, Na te lē fa'aosooso fo'i i se tagata.' Iakopo 1:13, R.V.

“E saili Satani ina ia aumaia i tatou i totonu o le fa'aosoosoga, ina ia fa'aalia le leaga o a tatou amio i luma o tagata ma agelu, ina 'ia ia fai mai ai, o i tatou o ana meatotino. . . . O le fili na te ta'ita'ia i tatou i le agasala, ona ia tu'ua'iina lea o i tatou i luma o le iunivesa fa'alelagi e fa'apea e lē aogā i tatou mo le alofa o le Atua.” – *Thoughts From the Mount of Blessing*, pp. 116, 117.

c. A osofa'ia e le ti'apolo a tatou amio leaga, e fa'apefea ona puipuia i tatou e le Alii? Sakaria 3:1-4; 1 Ioane 1:9-2:1.

Aso Lulu

Oketopa 16

4. O LE MALOSI O LE ATUA I TOTONU O LO TATOU VAIVAI

a. Fa'amatala le fa'aupuga lea i le tatalo a le Alii, “Aua e te ta'ita'iina i matou i le fa'aosoosoga.” Mataio 6:13 (vaega muamua); Isaia 30:21.

“[O le Atua] Na te fa'atagaina i tatou ina ia tatou fetaia'i ma fa'afitauli, sauāga, ma faigata, Na te lē fa'atagaina e peisea'ī o se mala, ae o se fa'amanuiaga silisili lea o ō tatou olaga. O fa'aosoosoga ta'itasi uma lava e te'ena, o tofotofoga ta'itasi uma lava e tauaveina ma le loto toa, e aumaia ai ia i tatou se iloa fou ma tauaveina ai i tatou i luma i le galuega o le fausiaina o le amio. O le tagata na te te'ena fa'aosoosoga e ala i le mana fa'alelagi, na te fa'aalia atu i le lalolagi ma le iunivesa fa'alelagi le malosi o le alofa tunoa o Keriso.

“Peita'i, e ui ina lē tatau ona tatou matata'u i tofotofoga, tusa lava poo le a le tigā, e tatau ona tatou tatalo ina ia aua ne'i fa'atagaina i tatou e le Atua ina ia aumaia i se tulaga o le a tosoeseina ai i tatou e fa'anaunauga o ō tatou lava loto leaga. I le ofoina atu o le tatalo

ua tu'uina mai e Keriso, tatou te gaua'iina atu ai i tatou i le ta'ita'iga a le Atua, ma ole atu ia te Ia ina ia ta'ita'iina i tatou i ala saogalemu. E lē mafai ona tatou ofoina atu lenei tatalo i le loto fa'amaoni, ae tatou filifili ai e savavali i so'o se ala lava tatou te filifilia e i tatou lava. O le a tatou fa'atali mo Lona aao Na te ta'ita'ia i tatou. . . .

“E lē saogalemu mo i tatou lo tatou fa'atuai, se'i tatou tau manatunatu i mea e seleseleina mai e ala i lo tatou gaua'i atu i fa'aosoosoga a Satani. O le agasala o lona uiga o le fa'alumaina ma puapuaga ia i tagata ta'itasi uma lava e tu'innanau sa'oloto i ai; peita'i o lona natura, e fa'atauasoina ma fa'asesēina ai, ma o le a fa'atosinaina ai i tatou i foliga ma uiga taufa'asese e aumaia ai. Afai tatou te lē fefefe e feoa'i atu i luga o eleele o Satani, e leai so tatou mautinoaga o se puipuiga mai i lona malosi. O le malosi atoa o loo i totonu ia i tatou, e tatau ai ona tatou tapunia faitoto'a uma lava e mafai ona ulufale mai ai le ti'apolo taufa'aosooso ia i tatou.

“O le tatalo lea, ‘Aua e te ta'ita'iina i matou i le fa'aosoosoga,’ o se folafolaga lea.”
– *Thoughts From the Mount of Blessing*, pp. 117, 118.

b. O le a se olega ma se mautinoaga ua fetalai mai e le Atua ia i tatou e fa'atatau i le fa'aosoosoga? Iakopo 1:14-16; 1 Korinito 10:13.

“O le a le fa'aosoosoga? O le auala lea e tofotofoina ai i latou ua fai mai o i latou o fanau a le Atua. Ua tatou faitau, ua fai mai na fa'aosooso le Atua ia Aperamo, ma na Ia fa'aosoosoina le fanauga a Isaraelu. O lenei manatu o lona uiga, na Ia fa'atagaina mea e tutupu ina ia tofotofoina ai lo latou fa'atuatua ma ta'ita'ia ai i latou ina ia latou va'ava'ai atu ia te Ia mo le fesoasoani. E fa'ataga e le Atua fa'aosoosoga e o'o mai i Ona tagata i le taimi lenei ina ia latou iloa ai o Ia o lo latou Fesoasoani. Afai latou te fa'alatalata atu ia te Ia pe a fa'aosoosoina i latou, Na te fa'amalosia i latou e fetaia'i ma le fa'aosoosoga.” – *In Heavenly Places*, p. 251.

Aso Tofi

Oketopa 17

5. MALAMALAMA'AGA SA'O E FA'ATATAU I TOFOTOFOGA

a. O le tumau i totonu ia Keriso ma fa'apena ona lavea'iina ai mai i fa'aosoosoga, o le a se mea e tatau ona tatou filifilia i taimi uma lava? Luka 4:8; Filipi 1:21.

“O le ti'apolo e lē mafai ona ia fa'amalosia i tatou ina ia tatou faia le agasala. E lē mafai ona ia puleaina mafaufau se'ivagana ua gaua'iina atu i lana pule. O le malosi fai filifiliga o le loto e tatau ona ioe, o le fa'atuatua e tatau ona ia fa'amamuluina lona pipi'imau atu ia Keriso, a'o le'i mafai ona fa'atino e Satani lona malosi i luga ia i tatou. Peita'i, o fa'anaunauga agasala ta'itasi uma lava tatou te teufatuina, na te maua ai sona avanoa. O vaega ta'itasi uma lava tatou te to'ilalo ai i le ausia o le tapula'a fa'alelagi, o se faitoto'a mātala lea e mafai ai ona ia ulufale mai e fa'aosooso ma fa'aumatia i tatou. Ma o a tatou faia'ina ma to'ilalo ta'itasi uma lava, e tu'uina atu ai le avanoa ia te ia na te fa'alumaina ai Keriso.” – *The Desire of Ages*, p. 125.

- b. **O le a se mea e tatau ona fa'aosofiaina ai ia i tatou le finafinai ina ia tauivi pea i luma i le manumalo i totonu ia Keriso? Filipi 4:13; Fa'aaliga 2:10 (vaega mulimuli); 3:21.**

“O lē ua fa'atumulia i le Agaga o Keriso, e tumau fo'i i totonu ia Keriso. O le tā o loo taula'i mai ia te ia, e pa'ū i luga o le Fa'aola, o Lē o loo si'omiaina o ia i Lona fa'atasi mai. So'o se mea lava e o'o mai ia te ia, e sau mai ia Keriso. Na te lē mana'omia lona te'ena o puapuaga, auā o Keriso o lona Talitā lea. E leai se mea e mafai ona pa'i atu ia te ia se'ivagana ua faia e ala i le fa'atagaga a lo tatou Ali'i, ma o 'mea uma lava' e fa'atagaina, 'e galulue fa'atasi mo le lelei ia i latou e alolofa i le Atua.' Roma 8:28.” – *Thoughts From the Mount of Blessing*, p. 71.

“O le paleali'i o le ola, e na o le muaulu lava o le tagata manumalo e tu'uina atu i ai. O loo i ai le galuega vilivilita'i, mamalu mo le Atua, mo tagata ta'itasi uma lava, a'o tumau pea le ola.” – *Testimonies for the Church*, vol. 5 p. 71.

Aso Faraile

Oketopa 18

FESILI TOE FA'AMANATU

1. **O le a le mea ou te mana'omia ia ou manatua, i le taimi e toe o'o mai ai se tofotofoga faigata ia te a'u?**
2. **O le a se mea e tatau ona ou manatua e fa'atatau i le auala e tali mai ai tatalo e le Atua?**
3. **O fea e sau ai tofotofoga ma fa'aosoosoga ma aisea?**
4. **O le a le mea e tupu i taimi uma lava tatou te te'ena ai fa'aosoosoga?**
5. **E fa'aapefea ona tatau ona sili atu le atoatoa o lo'u tumau i totonu ia Keriso?**

Lesona 4

Sapati, Oketopa 26, 2024

FA'ATINOINA O LE FA'ATUATUA

MAU TAULOTO: “A ia fai outou ma ē anaana i le upu, ae aua le nā ona fa'alogologo i ai, o fa'aseseina ai outou e outou ” (Iakopo 1:22).

“Ua filifilia le [tagata] ina ia usita'i i upu ta'itasi uma e tulei mai i le fofoga o le Atua, ma ina ia aveva o ia, e lē gata o sē e fa'alogo i le upu, ae ia aveva fo'i o ia o se tagata na te fa'atinoina le upu.” – *Testimonies to Ministers*, p. 454.

Faitauga Fautuaina: *Testimonies for the Church*, vol. 2, pp. 24-26, 50-55, 164, 165.

1. O LE ATUA O LĒ FOA'I MAI, E ATOATOA ONA LELEI O IA

a. O le a se mea o loo fa'aalia ai le tele na'uā o le agalelei o le Atua ia i tatou? Iakopo 1:17.

“O le alofa o Keriso mo Lana fanau, e matuā mutimutivale lava e fa'apei fo'i ona malosi. Ma e sili atu nai lo le oti; auā na Ia maliu e toe fa'atauina mai ai lo tatou fa'aolataga, ma faia ai i tatou ia tasi ma Ia e fa'avavau i se uiga lē mafa'amatalaina. E matuā malosi lava Lona alofa, o lea e puleaina ai e Lona alofa Ona malosi uma, ma fa'aaogaina ai oa e tele na'uā o le lagi i le faia o mea lelei mo Ona tagata. O Lona alofa e lē liliu poo sina ata fo'i o se liliu itiiti. – e tumau o ananafi, ma le asō, e o'o lava i le fa'avavau. E ui lava ina i ai le agasala i le tele o tausaga, ma taumafai ai e fa'alēaoga lenei alofa ma punitia lona tafe mai aga'i i le lalolagi, ae o loo tafe mai pea i ave taumasuasua ia i latou na maliu ai Keriso.

“E alofa le Atua i agelu e lē'i agasala, o ē o loo auaina ia te Ia ma o loo usita'i i Ana poloa'iga uma lava; peita'i Na te lē foa'iina atu ia i latou le alofa tunoa; latou te lē'i mana'omia lava le alofa tunoa, auā latou te lē'i agasala lava. O le alofa tunoa o se uiga lea o le Atua o loo fa'ailoaina mai i tagata lē aogā. Tatou te lē'i sa'ilia lea alofa tunoa; ae na auina mai e sa'ili mo i tatou. E olioli le Atua e foa'i mai le alofa tunoa i luga o i latou uma lava e fia aai ma fia feinu mo le alofa tunoa, e lē ona fa'apea ua ta'uaogaina i tatou, ae ona o lo tatou lē aoga. O lo tatou mana'omia o le alofa tunoa, o le tusipasi lea e foa'iina mai ai ia i tatou le mautinoaga e iloa ai, o le a tatou maua le meaalofa.” – *Testimonies to Ministers*, p. 519.

b. E fa'apefea ma aisea ua fanauina ai i tatou e le Atua? Iakopo 1:18; 1 Peteru 1:23; 2:9.

2. FA'AFILEMUINA O LE ITA

a. I totonu o se lalolagi o le ita, e fa'apefea ma aisea fo'i e tatau ai ona ese mai i tatou? Iakopo 1:19.

“Ia faia o se tulafono ina ia aua lava ne'i tautala i se upu faitio e le tasi i le tasi, ae ia lagolago and vivi'i i i so'o se taimi e te mafai ai.

“O nisi e manatu o se amio lelei lo latou uiga lē taofiofi, ma o le a latou tautala i viiga o a latou masaniga o le tautala tu'usa'o, i lo latou tautalagia mai o mea e lē logo lelei o loo i totonu o le loto. Latou te fa'atagaina se agaga ita e si'itia a'e ia lava, i se galu lolo o faitioga ma le su'esu'e masei. O le tele atu o lo latou tautala, o le tele atu fo'i lena o lo latou vilivilita'i i la latou galuega, ma e tula'i latalata mai Satani e fesoasoani i le galuega, auā e fetau mo ia. O upu, e tigā i lē o loo tautalagia aga'i i ai, ma o le a toe lafoina mai, ma aumaia ai upu e fa'aosofiaina ai upu e sili atu ona faigatā, se'ia o'o ina avea se mataupu itiiti ma afi sasao tele lava. O oulua uma lua te manatu ua ia te oulua tofotofoga uma lava e mafai ona

lua onosa'ia, ma o ō oulua olaga e sili atu ona fa'anoanoa. Ia amata nei ma le finafinau le galuega o le puleaina o ou manatunatuga, o au upu, ma au gaioiga. A lagona e se tasi o oulua le si'itiaina a'e o le ita, ia lua faia o se tulafono lo lua ō ta'ito'atasi ma tatalo ma le agamalu i le Atua.” – *Testimonies for the Church*, vol. 4, p. 243.

b. Aisea e to'asa ai le Atua i se ita leaga – ma e fa'apefea ona fa'amaloloina? Iakopo 1:20.

“O nisi e popole, ma a amata ona lē mafai ona latou puleaina i latou lava i upu, poo ō latou uiga fo'i pe a fa'aosofiaina e se tasi lo latou ita, latou te matuā onanā lava i le ita tele e fa'apei lava o le tagata ua onā i le 'ava malosi. Ua faigata ona fautuaina i latou, ma e lē faigofie ona fa'atauanauiina pe fa'atalitonuina. Ua leai so latou mafaufau poto; ua pule atoa Satani i le taimi lea. O nei uiga fa'aalia ta'itasi uma o le to'asa, e fa'avaivaia ai le fa'asologa o gaioiga a neura ma malosi o le amio, ma fa'afaigata ai ona taofia le ita i se isi mea e toe fa'aosofiaina ai.

“O le vasega lenei, e na o le tasi lava le fofō – o le puleaina mautinoa lea e le tagata o ia lava i mea uma lava e tutupu. O le taumafaiga ina ia o'o atu i se nofoaga lelei, lea o le a lē fa'aosofiaina ai e se tasi le ita, atonu e manumalo mo sina taimi; peita'i e iloa e Satani le auala e maua ai nei tagata vaivai, ma o le a ia toe osofa'ia pea lava pea i latou i o latou uiga vaivai. O le a fa'aauau pea lava ona fa'apuapuagatiaina i latou i le umi lava e tele ai lo latou manatunatu ia i latou lava. . . . Peita'i o loo i ai le fa'amoemoe mo i latou. Ia aumaia lenei olaga fesoua'iina i afā o fete'ena'iga ma popolega, ia feso'ota'i atu ia Keriso, ma o le a lē toe fa'anaunau loa le loto o le tagata lava ia mo le fia sili. . . . E tatau ona latou fa'amaulaloina e i latou i latou lava, ma fa'apea ifo ma le loto fa'amaoni, 'Ua ou sese. O le a ē fa'amagalo mai ea ia te a'u? Auā ua fetalai mai le Atua e lē tatau ona goto le lā a'o tatou ita pea.' E na o le pau lava lea o le ala saogalemu aga'i atu i le manumalo.” – *Sons and Daughters of God*, p. 142.

Aso Lua

Oketopa 22

3. TEUFATUINA O LE MALAMALAMA

a. Fa'amatala le vala'au a le Atua mo i tatou ta'ito'atasi. Iakopo 1:21.

“Oka, e fa'apefea ona lu'iina e se tasi o loo i ai le malamalama o le upu moni, le malamalama tele ua foa'iina mai ia i latou mai i le Atua, le to'asa ma fa'asalaga a le Atua, e ala i lona agasala ia te Ia ma faia ai mea tonu lava ia ua fa'atonu mai e le Atua ia i latou i totonu o Lana Upu, e lē tatau ona faia? E fa'apefea ona mafai ona matuā fa'atauasoia i fa'apea i latou e Satani i lo latou fa'alumaina o le Atua i Ona fofoga, ma fa'aleagaina ai o latou agaga e ala i lo latou agasala ma le iloa? Fai mai le aposetolo, 'Ua aveia i matou ma mata'aga i le lalolagi, ma agelu atoa ma tagata.' O le a fesili ifo ea nei tagata agasala - o le a ou fa'aigoaina ea i latou o ni tagata pepelo? - i Siona, e fa'apea –O le a le uiga o loo aveia ai a'u ma māta'aga i le lalolagi, i agelu, ma tagata? Ia outou tali mo outou lava, E ala i lo'u fa'aaogaseseina o le malamalama ma avanoa sili ona tāua ma alofa tunoa ua foa'i mai e le

Atua ia te a'u, e ala i gaiouga lē fetau i e pa'u maualo ma fa'aleagaina ai le tagata.” – *Testimonies to Ministers*, p. 447.

b. E fa'apefea ona feso'ota'i le upu a le Atua i lo tatou fa'aolataga, aemaise ai lava i aso mulimuli? 2 Timoteo 3:15; 1 Korinito 15:1, 2.

“O le galuea'iina moni o le Agaga Paia i loto o tagata, ua folafolaina mai, ina ia foa'iina mai ai le agava'a e ala mai i le Upu. Ua fa'ailoa mai e Keriso, o le Upu o le agaga ia ma le ola. . . .

“O le a galue Satani i se uiga fa'ananā sili ona lilo ina ia aumaia a'oa'oga o fausaga fa'aletagata e fa'aofuina mai i ofu o agelu. Peita'i o le malamalama mai i le Upu o loo susulu i le lotolotoi o le pogisa fa'aleagaga; ma o le Tusi Paia o le a lē suitulaga ai lava fa'aaliga fa'avavega. O le upu moni e tatau ona su'esu'eina, e tatau ona sa'ilia e fa'apei ona sa'ilia o le oa natia. O malamalama matagofie lava, o le a lē foa'iina mai e ese mai nai lo le Upu, pe suitulaga fo'i i le Upu. Ia pipi'i atu i le Upu, ia talia le Upu ua fa'apipi'iina mai, lea o le a fa'apotoina ai tagata e o'o atu ai i le fa'aolataga.” – *Selected Messages*, bk. 2, p. 100.

“O i latou e taliaina le Upu moni, e tatau ona latou sa'ilia se malamalama'aga manino e fa'atatau i le Tusi Paia, ma se iloa fa'atinoina e fa'atatau i le Fa'aola soifua. O le mafaufau e tatau ona a'oa'oina, e tatau ona matuā fa'agaioi lava le malosi o le mafaufau e manatua ai mea uma. O le paiē uma fa'alemaufau, o le agasala lea, o le vaivai fo'i ma le paiē fa'alēagaga, o le oti lea.” – *Testimonies for the Church*, vol. 4, p. 399.

“A taliaina loa Ana upu o fa'atonuga, ma ua i totonu ia i tatou, ona avea loa lea o Iesu ia i tatou, o se mana fa'atasi mai i taimi uma, pulea ai o tatou manatunatuga ma lo tatou malamalama'aga ma gaiouga. Ua fa'atumuina loa i tatou i fa'atonuga a le Faia'oga silisili lava ua fa'apea ona iloa e le lalolagi.” – *Messages to Young People*, p. 160.

Aso Lulu

Oketopa 23

4. O LE FA'ATA O LE TULAFONO A LE ATUA

a. Aisea e tāua ai mo i tatou lo tatou su'esu'eina o ō tatou loto? Iakopo 1:22-24.

“E to'atele tagata latou te taliaina vi'iga mai i isi, mo uiga lelei e lē o ia i latou. O Lē o loo su'esu'eina loto, Na te fuaina mafuaaga o mea uma, ma o le tele lava o taimi, o gaiouga ia e sili ona vi'ia e tagata, o loo Ia tusia fa'amauina e fa'apea, e puna mai i le loto fa'apito ma le uiga pepelo maualo. O gaiouga ta'itasi uma lava o ō tatou olaga, pe sili ona lelei ma ta'uaogāina mo vi'iga, pe tatau fo'i ona faitioina, e fa'amasinoina uma lava e Lē o loo su'esu'e i loto e tusa ai ma mafua'aga na osofia ai lea gaiouga.

“E to'atele latou te fa'atalalē e va'ava'ai ia i latou lava i totonu o le fa'ata lea e fa'aalia ai uiga leaga o le amio; o le mafua'aga lea e tumau ai pea uiga leaga ma le agasala, ma o loo iloa manino e isi, pe afai e lē malamalama i ai i latou o loo sese. O le agasala inosia o le loto fa'apito o loo tele lava ina i ai, i totonu o nisi o loo ta'utinoina mai lo latou vilivilita'i i le galuega a le Atua. Afai o le a latou fa'atusatusaina a latou amio ma Ona mana'oga, aemaise ai lava le tapula'a tele, le tulafono paia a le Atua, semanu o le a latou fa'amaonia ai, pe afai o i latou o ni tagata su'esu'e finafinau, fa'amaoni, o loo matuā tele lava vaega o

loo latou to'ilalo ai, peita'i latou te tumau naunau i lo latou lē fia iloaina o lo latou agasala.”
– *Gospel Workers*, pp. 275, 276.

b. Fa'amatala le matagofie o le sa'olotoga moni e ala i le mana foafoa e o'o mai e ala i le gaua'i atu ia Keriso ma Lona finagalo. Iakopo 1:25; Ioane 8:32.

“I le galuega o le fa'aolataga, e leai se faiga fa'amalosi. E leai se malosi oi fafo atu e fa'aaogaina! I lalo o le a'afiaga o le Agaga Paia o le Atua, e tu'u sa'oloto ai le tagata na te filifilia poo ai na te auauna i ai. I le suiga lea e faia pe a gaua'i atu le tagata ia Keriso, o loo i ai le lagona sili ona maualuga o le sa'olotoga. O le tulieseā o le agasala o le galuega lea a le tagata lava ia. E moni, e leai so tatou malosi e fa'asa'olotoina ai i tatou mai i le puleaga a Satani; peita'i a tatou fa'anaunau loa ina ia fa'asa'olotoina i tatou mai i le agasala, ma tatou alalaga a'e ai loa i lo tatou mana'oga tele, i se mana ei fafo atu, ma e sili a'e nai lo i tatou, o le malosi o le tagata ua fa'atumulia i le malosi fa'alelagi o le Agaga Paia, ma latou usita'i ai loa i fa'atonuga a le malosi fai filifiliga o le loto i le fa'ataunu'uina o le finagalo o le Atua.

“E tasi lava le aiaiga e mafai ai ona maua le sa'olotoga o le tagata, o le tasi lea o ia ma Keriso. “O le upu moni o le a fa'asa'olotoina ai oe;’ ma o Keriso o Ia o le upu moni. O le agasala, e fa'ato'a manumalo lava e ala i le fa'avaivaia o le mafaufau, ma le fa'aumatiaina o le sa'olotoga o le tagata. O le gaua'i i le Atua o le toe fuata'iga lea i le tagata – i le viiga moni ma le mamalu o le tagata. O le tulafono a le lagi, lea ua aumaia i tatou i tatou ia tatou usita'i i ai, o le ‘tulafono lea o le sa'olotoga.’ Iakopo 2:12.” – *The Desire of Ages*, p. 466.

Aso Tofi

Oketopa 24

5. TAPUA'IGA MONI

a. Ta'u mai se vaega aoga o le fa'akerisiano o loo masani lava ona lē maua. Iakopo 1:26.

“E ala i le fesoasoani e mafai ona foa'i mai e Keriso, o le a mafai ai ona tatou fa'agutuina o tatou laulaufaiva. E fa'apei o le tigā o le tofotofoina o Ia i le tautala fa'ata'alise ma le tautala ita, ae e lē'i fa'atasi ona Ia agasala ai i se upu. O le to'a onosa'i na Ia fetaia'i ai ma tauemuga, o upu fa'a'amu'amu, ma upu taufaifai a i latou sa latou galulue fa'atasi i le laulau a le kamuta. E aunoa ma Lona tali atu ma le ita, na amata ona Ia peseina se tasi o salamo matagofie a Tavita; ma o ona uso a faigaluega, a'o latou le'i iloa le mea na latou faia, na latou fa'atasi ai ma ia i lea pese. Oka se liuaga o le a faia i totonu o lenei lalolagi, pe ana fa'apea e mulimuli tane ma tama'ita'i o le taimi lenei, i le fa'ata'ita'iga a Keriso i le fa'aaogaina o upu.” – *The SDA Bible Commentary* [E. G. White Comments], vol. 7, p. 936.

b. E fa'apefea ona galue gūgū ma le lē fa'apito le tapua'iga moni, i tua atu o mea o loo va'aia? Iakopo 1:27.

“O le aveā ma tagata galue mamafa, o le fa'aauau pea ma le onosa'i i le amio lelei lea e mana'omia ai le galuega e fa'afitia ai e le tagata ia lava, o se galuega mamalu lea, lea e

fiafia mai i ai le Atua. O galuega fa’amaoni e sili atu ona taliaina e le Atua nai lo le tapuaiga e sili ona finafinau, ma manatu e sili ona paia. O le galulue fa’atasi ma Keriso, o le tapua’iga moni lea. O tatalo, apoapoa’iga, ma le tautala, o ni fua taugofie ia, lea e masani lava ona nonoaina i luga; peita’i o fua o loo fa’aalia i galuega lelei, i le alofa mo ē o loo mana’omia le fesoasoani, o ē ua matua oti, ma fafine ua oti a latou tane, o fua moni ia, ma e tutupu a’e fa’alenatura i luga o se la’au lelei.” – *Testimonies for the Church*, vol. 2, p. 24.

Aso Faraile

Oketopa 25

FESILI TOE FA’AMANATU

1. **Aisea e mafai ai ona tatou tu’uina atu ma le talitonu o tatou ola i le Atua e fa’avavau o le lagi?**
2. **O le a le tiute o tagata uma ua latou iloa ua leai so latou onosa’i?**
3. **Aisea e tāua ai mo a’u lo’u su’esu’eina o le Upu a le Atua mo a’u lava?**
4. **Fa’amatala poo le a le sa’olotoga moni.**
5. **E fa’apefea ona mafai ona ou galuea’iina a’e se tapua’iga moni e sili atu mai i lo’u loto?**

SAPATI, NOVEMA 2, 2024

Taulaga Sapati Muamua mo le Matagaluega o Tusitusiga a le Koneferenisi Aoao

O loo i ai se fa’aupuga lauiloa e fa’apea, “O se matāua o le vaitusi, e mafai ona una’iina ai le miliona o tagata ina ia latou manatunatu i ai.” O tusitusiga lomiga, e sili atu le fa’amaoniga na te tauaveina nai lo na o upu tautalagia ona o lona tumau. O lomiga tusitusia e mafai ona umi le taimi tatou te fa’aaluina e faitau ai, i le vave poo le telegese fo’i tatou te manana’o ai, ae e mafai fo’i ona tatou toe fo’i i tua ma manatunatu sili atu ona loloto, i fa’amatalaga o loo tatou sa’ili tatou te a’oa’oina. E fesoasoani ai ia i tatou pe a tatou taumafai e malamalama i mataupu loloto fa’aleagaga.

O lenei tulaga e moni lava i le tala’aga atoa: “O le peni a Luther o se malosia lea, ma o ana tusitusiga, lea na fa’asalalau solo atu, na fafaguina ai le lalolagi. O auala lava nei e mafai ona tatou fa’aaogaina, fa’atasi ai ma fale ua fa’aselau le fa’atuputeleina. O Tusi Paia, o lomiga i le tele o gagana, o loo fa’aailoa atu ai le upu moni mo le taimi lenei, ua i o tatou lima, ma e mafai ona tauaveina atu fa’ata’alaise i le lalolagi atoa.” *Testimonies for the Church*, vol. 6, p. 403.

“E ala atu i a tatou fale lomitusi i sona tulaga tele lava, e tataua ona fa’ataunu’uina ai le galuega a le isi agelu lea e alu ifo mai i le lagi ma le mana tele ma, na te fa’amalamalamaina le laueleele i lona pupula.” – *Ibid.*, vol. 7, p. 140.

I le 1849, na faia ai e James White se fa’asalalau ititi na fa’aigoaina o le: *O Le Upu Moni Mo Le Taimi Lenei*. “O le tama’i fa’aputuga o pepa na folasia i luga o le foloa. Ona si’omia mai lea e le au uso ma tuafafine, ma o loimata i o latou mata na latou aioi ai i le Atua ina ia fa’amanuina le tama’i fa’aputuga o pepa a’o sauni e auina ese atu. Ona

gaugauina lea o pepa, fusifusia ma fa'atuāusiina, ona aveina lea e James White i maila e valu i le fale meli i Middletown.” – *Early Writings*, (xxv).

O lenei gaioiga o le tali atu lea i le feau: “ ‘E tatau ona amata ona ē lomia se tama’i pepa ma auina atu i tagata. Ia la’ititi muamua; ma a’o faitau ai tagata, o le a latou lafoina atu ia te oe tupe e lolomi ai, ma o le a fa’amanuiaina i lona ulua’i amataga.’” – *Ibid.*, (xxiv).

O le a le mea e tupu pe si’itia le taugatā o le tau e lafo ai, ma o tulafono o femalagaa’iga i tuaoi o mālō, ua mana’omia ai ituaiga auala e sili atu ona taugatā e tufaina ai nei fa’asalalauga? O a tatou tupe o loo totogi mai e tagata mo a tatou lomiga, e lē o aofia ai nei tupe fa’aalu fou. O lea la, e tatau ona tatou fa’alagolago i le agalelei o ō tatou uso talitonu ina ia fa’ataunu’uina ai le valoaga na fetalaia atu ia James White: “A’o faitau ai tagata, o le a latou auina atu ia te oe tupe.”

Matou te tatalo ina ia pa’i atu i lou loto lenei Taulaga Sapati Muamua mo le Matagaluega o Lomiga o Tusitusiga a le Koneferenisi Aoao, ina ia sili atu lau foa’i mo tagata i le lalolagi atoa o ē o loo mana’omia ina ia latou faitauina le Upu Moni Mo Le Taimi Lenei. Fa’afetai atu ia te outou!

O lo outou au uso i le Matagaluega o Tusitusiga Lomia a le Koneferenisi Aoao

Lesona 5

Sapati, Novema 2, 2024

FA’ATO’ILALOINA O LE UIGA FA’AITŪ’AU

MAU TAULOTO: “Auā e lē fa’ailogaina tagata e le Atua” (Roma 2:11).

“E lē ioeina e le Atua se eseese i le fa’avasegaina o tagata i ni o latou tofiga po’o o latou mamalu. I ā te Ia, e leai se fa’avasegaina o tagata. I Lana silafaga, o tagata ua na o i latou o ni tagata, pe lelei pe leaga fo’i. I le aso o le fa’amasinoga mulimuli, o tofiga, tulaga mamalu, poo le tamāoaiga fo’i, o le a lē suia ai, i le lautele o se lauulu e tasi, le i’uga o so’o se tagata. O le Atua Na te silafia mea uma, o le a Ia fa’amasinoina tagata i lo latou tulaga i le amio mamā, i le amio lelei, ma le alofa mo Keriso.” – *Counsels on Stewardship*, p. 162.

Faitauga Fautuaina: *Testimonies for the Church*, vol. 3, pp. 304-309, 320-329.

Ulua’i Aso

Oketopa 27

1. O SE FA’AFITAU I UIGA O AMIOGA

a. Fa’amatala se uiga masani fa’ale’elele atonu o loo tatou agasala ai, ma le lē iloa. Iakopo 2:1-4.

“O tagata matitiva e tatau ona naunau ma manatu i ai e fa’apei lava ona faia i le tagata mauoa. O le masaniga o le fa’amamaluina o le tagata mauoa ma manatu fa’atauva’a ma fa’atalalē ai i le tagata mativa, o se solitulafono lea i le silafaga a le Atua. O i latou o loo si’omia i mea uma lava e fa’afilemūina ai le olaga, poo i latou fo’i o loo fa’apelepeleina ma

fa'amatananaina e le lalolagi ona latou te mauoa, latou te lē lagona le mana'omia o le agaalofo ma le alofa mutimutivale e fa'apei ona lagona e i latou ua leva ona ola i ni olaga umi o se tauiviga ma le mativa.” – *Testimonies for the Church*, vol. 4, p. 551.

“E ui lava ina sa mauoa Keriso i le lotoā o le lagi, ae na Ia mativa ina ia fa'atamāoaigaina ai i tatou e ala i Lona mativa. Na fa'amamaluina e Iesu le tagata mativa e ala i Lona tofusia i lo latou olaga maualalo. Mai lava i le tala'aga o Lona soifuaga, e tatau ona tatou su'esu'e ai pe fa'apefea ona tatou agalelei i le tagata mativa.” – *Ibid.*, p. 550.

- b. O le a se mea e tatau ona tatou iloa e fa'atatau ia i latou atonu e matitiva i oa o lenei olaga, peita'i latou te mauoa i le fa'atuatua? Iakopo 2:5.**

Aso Gafua

Oketopa 28

2. VA'AI FA'ALEAGAGA MA LE LĒ FA'AITŪ'AU

- a. Fa'amatala le auala paleni na a'oa'o e Iesu e fa'atatau i le fesoasoani i tagata matitiva. Mareko 14:3-9.**

“O nisi latou te tauaveina le tiute o le agalelei i se tulaga e lamatia ai, ma fa'amanu'alia moni ai lava le tagata mativa, e ala i le tele tele o le fesoasoani mo i latou. O tagata matitiva latou te lē galulue i taimi uma i le tulaga e tatau ona latou faia ai. E ui lava ina lē tatau ona fa'atalalē ia i latou ma tu'ua ina ia puapuagatia, ae e tatau ona a'oa'oina i latou ina ia latou fesoasoani ia i latou lava.

“O le galuega a le Atua e lē tatau ona lē amanaiaina ina ia ave ai le tatou fa'amuamua i tagata matitiva. Na tu'uina atu e Keriso i Ona so'o se lesona matuā tāua lava i lenei mataupu. Ina ua sasa'a e Maria le u'u i luga o le ulu po'o le ao o Iesu, na aioi mai Iuta mana'o matape'ape'a, mo tagata matitiva, ma ia muimui ai i le mea lea ua ia manatu ua ma'imau ai tupe. Peita'i na ta'uamiotonuina e Iesu le gaiioiga, ma fetalai mai: 'Se a le mea tou te fa'alavelave ai ia te ia? ua faia e ia le mea lelei ia te A'u nei.' 'So'o se nofoaga lava o le a tala'iina ai lenei tala lelei i le lalolagi atoa, o le a ta'ua ai fo'i lenei mea ua ia faia, e fai ma fa'amanatuga o ia.' O lenei fetalaiiga ua a'oa'oina ai i tatou e fa'apea, o Keriso e tatau ona fa'amamaluina i le tu'uina atu fa'apaiaina i ai o a tatou oa sili ona tāua. Afai e taula'i atu o tatou mafaufau atoa lava i le fesoasoani ai i mana'oga o tagata matitiva, o le a fa'atalalē loa i le galuega a le Atua. O vaega ia e lua o le a lē puapuagatia pe afai e fai e Ana auauna tausii mea lo latou tiute, peita'i o le galuega a le Atua e tatau ona fa'amuamua.” – *Testimonies for the Church*, vol. 4, pp. 550, 551.

- b. I Israelu anamua, o le a le uiga na mana'omia mai ia i latou e faia le fa'amasinoga tonu? Levitiko 19:15; Teuteronomi 1:17; 10:17.**
- c. O le taimi lenei, e fa'apefea ona tatau ona a'oa'o i latou uma lava o loo i so'o se tofiga ta'ita'i o le ekalesia, ina ia fa'atino lenei lava tapula'a? 1 Peteru 1:17; Kolose 3:25.**

“O i latou e feso’ota’i atu le alofa o ō latou loto i le to’atasi pe to’a lua fo’i, ma alofa fa’aitu’au ai ia i latou, ae fa’atalalē ai i isi, e lē tatau ona fa’atumauiina i latou i o latou tofiga mo se aso e tasi. O lenei uiga fa’aitu’au lē fa’apaiaina mo ni nai tagata fa’apitoa atonu o loo latou fa’amalieina o latou mana’ona’oga, ma fa’atalalē ai i isi o loo fa’autauta, mae’ae’a ma’oti vilivilita’i ma matata’u i le Atua, ma e sili atu lo latou tāua i Lana silafaga, e matuā inosia lava e le Atua. O mea e fa’atāuaina e le Atua e tatau fo’i ona tatou fa’atāuaina. O le oa tau tele o se uiga agamalū ma filemu, Na te finagalo i ai e sili atu lona tau nai lo le lalelei i fafo, o teuga i foliga i fafo, o oa, poo le mamalu fa’alelalolagi fo’i.” – Ibid., vol. 3, p. 24.

Aso Lua

Oketopa 29

3. FAUSIAINA O MASANIGA E SILI ATU ONA LELEI

a. O le a le a’oa’iga ua aumaia e Iakopo e fa’atatau i le uiga fa’aitu’au i oa fa’aletino, o i latou o loo ta’utino mai e talitonu – ma aisea ua avea ai lenei uiga o se mataupu mata’utia le leaga? Iakopo 2:6, 7.

“Ua ioeina oe e le Atua i luma o tagata ma agelu o oe o Lona atalii po’o Lona afafine; ia ē tatalo ina ia e lē faia se mea e fa’alumaina ai le ‘suafa e tatau i ai le viiga, lea ua fa’aigoaina ai oe.’ Iakopo 2:7. Ua auina atu oe e le Atua i le lalolagi e avea ma Ona sui. I gaioiga ta’itasi uma lava o le olaga, e tatau ona ē fa’aalia ai le suafa o le Atua. O lenei olega ua vala’auina ai oe ina ia i ai ia te oe Lana amio. E lē mafai ona ē fa’apaiaina Lona suafa, e lē mafai ona ē fa’ailoaina atu o Ia i le lalolagi, se’ivagana ua ē fa’atusalia atu i lou olaga ma lau amio, le soifuaga tonu lava ma le amio a le Atua. E na o lou taliaina lava o le alofa tunoa ma le amiotonu a Keriso, e mafai ai ona ē faia.” – *Thoughts From the Mount of Blessing*, p. 107.

b. O le a le auala e tasi e mafai ai ona tatou manumalo i lo tatou fa’ailoaina atu sa’o o Keriso? Roma 2:11; Fa’ata’oto 23:7.

“Ia su’esu’eina ma le fa’aeteete le amio fa’aleatua-fa’aletagata, ma ia fesili i taimi uma lava, ‘O le a se mea e ono faia e Iesu pe ana fa’apea o Ia lea o loo tula’i i lo’u tulaga? O lenei fesili e tatau ona avea ma fua o lo tatou tiute. Aua le tu’uina outou i se tulaga e lē o mana’omia ai outou, i fa’atasiga a i latou o le a fa’avaivaia ai lou filifiliga ina ia faia le mea tonu, po’o le aumaia ai fo’i o se pona i le malamalama’aga o lou mafaufau fa’amaoni. Aua ne’i faia se mea e tasi i le lotolotoi o tagata ese, i le auala, i luga o ta’avale, ma totonu o fale, o le a i ai le foliga sili ona itiiti o le agasala. Ia ē faia se mea i aso ta’itasi uma ina ia fa’aleleia atili ai, fa’amatagofieina ai, ma fa’aleleia ai le ola na fa’atauina e Keriso i Lona lava toto.

“Ia gaioti i taimi uma lava mai i tapula’a, aua lava ne’i gaioti ona o lagona oso. Ia fa’afilemu ma fa’ato’a lelei le osovale fa’alenatura o lou natura i le agamalu ma le agalelei. Aua ne’i ē tu’inanau sa’oloto i le fa’amalieina o se uiga māmā ma le valea. Aua ne’i i ai ni upu maulalo o le uiga fa’aulaula e alu atu mai i ou laugutu. E o’o lava i manatunatuga, e lē tatau ona fa’atagaina e fealua’i solo e aunoa ma le puleaina. E tatau ona taofia, ma aumaia

i lalo o le puleaga i le usita'i atu ia Keriso. Ia tu'uina atu manatunatuga i mea paia. O le a mamā loa ma tonu e ala i le alofa tunoa o Keriso.

“Tatou te mana'omia lo tatou iloa i taimi uma lava o le mana e fa'amamaluina ai, o manatu mamā. E tasi lava le saogalemu mo so'o se tagata, o le manatunatu tonu lea. . . .

“Ia fausiaina a'e le masaniga o le tautala i upu lelei e fa'atatau i isi. Ia manatunatu i uiga lelei o i latou o loo ē feso'ota'i ma mafuta i ai, ma ia itiiti lava, i le tulaga e te mafai ai, ona e va'ai i o latou sese ma agasala.” – *The Ministry of Healing*, pp. 491, 492.

Aso Lulu

Oketopa 30

4. MAUAINA O AMIOGA FA'ATUPU

a. O le a se mea o loo fa'amamafa mai e le Tusi Paia e aogā moni lava i lo tatou fa'atuatua fa'akerisiano – ma aisea? Iakopo 2:8.

“O le to'atele o faia'oga fa'aletapuaiga, latou te fai mai o Keriso na Ia fa'aumatiaina le tulafono e ala i Lona maliu, ma ua sa'oloto tagata e amata atu i le taimi lenei, mai i ona mana'oga. O loo i ai nisi o loo latou fa'atusalia maia le tulafono e fa'apea o se avega mamafatū, ma o le eseese o le tulafono ma le nofo pologa o le tulafono, o lea latou te fa'aailoa mai ai le sa'olotoga e olioli ai i lalo o le tala lelei.

“Peita'i e lē'i fa'apea ona manatu le au perofeta ma aposetolo e fa'atatau i le tulafono paia a le Atua. Na fai mai Tavita: ‘O le a ou savali i le sa'olotoga: auā ou te sa'ilia Au fa'atonuga.’ Salamo 119:45. O le aposetolo o Iakopo, o lē sa tusia ina ua mavae le maliu o Keriso, o loo ia tautala e fa'atatau i Poloa'iga e Sefulu e fa'apea, ‘o le tulafono fa'atupu' ma ‘le tulafono atoatoa ona lelei o le sa'olotoga.’ Iakopo 2:8; 1:25. Ma o Ioane i le tusi o Fa'aaliga, i le afa seneturi ina ua mavae le fa'asatauroga o Keriso, na ia fa'asilasila mai ai se fa'amanuiaga i luga ia i latou ‘e faia Ana poloa'iga, ina ia taga ia i latou le la'au o le ola, ma ia latou ulu atu i le aai i ona faitoto'a.’ Fa'aaliga 22:14.” – *The Great Controversy*, p. 466.

“A gaua'i loa le tagata ia Keriso, ua aumaia loa le mafaufau i lalo o le puleaga a le tulafono; peita'i o le tulafono fa'atupu, lea na te fa'asilasilaina mai le sa'olotoga i tagata nofo pologa ta'itasi uma. O le tasi ma Keriso, lea e fa'asa'olotoina ai le tagata. O le gaua'i atu i le finagalo o Keriso o lona uiga o le toe fa'afo'isiaina lea i le tagata matua atoatoa ona lelei.

“O le usita'i i le Atua o le sa'olotoga lea mai i le nofo pologa o le agasala, o le lavea'iga lea mai i tu'inaanau o lagona ma manatu oso vale fa'aletagata. E mafai ai ona tula'i le tagata o ia o se tagata ua manumalo ia te ia lava, manumalo i ona lava lagona, manumalo i ali'i sili, ma faipule, ma ‘ali'i o le pouliuli o lenei lalolagi,’ atoa ma ‘agaga leaga i nofoaga maualuluga.’ Efeso 6:12.” – *The Ministry of Healing*, p. 131.

b. E fa'apefea ona fa'aleagaina i se tulaga lē lelei e le uiga fa'a'au'au i isi, fa'aitū'au, ma le/po'o le uiga fa'aailoga tagata fo'i, la tatou molimau mo Keriso? Iakopo 2:9.

“Atonu tatou te fai mai o i tatou o so'o o Keriso, atonu tatou te fai mai tatou te talitonu i upu moni ta'itasi uma lava o loo i totonu o le Upu a le Atua; peita'i o lenei talitonuga o le

a leai se mea lelei e faia ai mo ō tatou tuaoi se'ivagana ua tauaveina atu lo tatou talitonuga i lo tatou olaga i aso ta'itasi. O la tatou ta'utinoga atonu e maualuga e pei o le maualuga o le lagi, peita'i o le a lē lavea'iina ai i tatou poo o tatou uso a tagata fo'i se'ivagana ua avea i tatou ma kerisiano. O se fa'ata'ita'iga sa'o, o le a tele atu le mea na te faia e fa'amanuiaina ai le lalolagi nai lo a tatou ta'utinoga uma lava.” – *Christ's Object Lessons*, p. 383.

Aso Tofi

Oketopa 31

5. A'OA'OGA POTO I LE ALOFA MUTIMUTIVALE

- a. **O le a se mea e tatau ona teuina i o tatou mafaufau i le si'itiaina i luga o le tulafono o le amio a le Atua e i tatou lava – ae fa'apena ai fo'i pe a tatou fa'asoaina atu lenei upu moni i le tupulaga o loo soso'o mai? Failauga 11:9; 12:13, 14; Iakopo 2:10-13.**

“O talavou e i ai lo latou fiafiaga i totonu ia i latou i le sa'olotoga; latou te naunau i le sa'olotoga; ma latou te mana'omia ina ia latou malamalama, o nei fa'amanuiaga lē mafuatia, e na o le usita'i lava i le tulafono a le Atua e mafai ona olioli ai. O lenei tulafono na te fa'atumauiina le sa'olotoga moni. Na te fa'asinoaina mai ma fa'asāina mea ia e fa'aleagaina ai ma fa'apologaina ai, ma e fa'apena ona maua ai e i latou e usita'i le puipuiga mai i le malosi o le ti'apolo.

“Fai mai le fai salamo: ‘O le a ou savali i le sa'olotoga: auā ou te sa'ilia au poloa'iga.’ O au tulafono fo'i, o o'u lava fiafiaga ia, ma o'u fautua.’ Salamo 119:45, 24.

“I a tatou taumafaiga ina ia fa'asa'o mea ua sese, e tatau ai ona tatou puipui i se uiga o le su'esu'e masei ma le faitio. O le faitio ma fa'asā i taimi uma, e nunumi ma fememea'i ai, ae e lē fuata'iina ai. O le tele o mafaufau, ma e masani lava ia i latou e sili ona ma'ale'ale, o se si'omaga o faitioga lē alofa, e matuā mata'utia lava le leaga i taumafaiga. O fugala'au e lē mātala i lalo o le mātāva a se matagi e fa'aleagaina ai. . . .

“O le sini moni o a'oa'iga, e fa'ato'a maua lava pe a ta'ita'iina lē ua sese ina ‘ia ia iloa lona sese ma ua gaua'i lona loto mo le fa'asa'oina o lea sese. A fa'ataunu'uina loa lea tulaga, ia fa'asino o ia i le puna o le fa'amagaloga ma le mana. Sa'ili ina ia fa'atumauiina lona fa'atāuaina o ia e ia lava ma ia musuia o ia i le lototele ma le fa'amoemoe.

“O lenei galuega o le galuega sili lea ona matagofie ma sili ona faigata ua fa'apea ona tu'uina mai i tagata ola. E mana'omia ai le tomai e sili ona fa'aeteete, o le mafaufau e sili ona faigofie ona malamalama, o se iloa e fa'atatau i le natura fa'aletagata, ma se fa'atuatua ma le onosa'i na fanauina mai i le lagi, e naunau e galue ma mataala ma fa'atali. E leai se isi lava mea e sili a'e lona tāua nai lo lenei galuega.” – *Education*, pp. 291, 292.

FESILI TOE FA'AMANATU

1. E ui lava atonu e lē o tele ni a'u mea totino, o le a se mea e tatau ona ou iloa e fa'atatau i isi e itiiti ifo a latou meatotino?
2. O le a le faigofie o lo tatou mauaina o le uiga fa'aitu'au tauaso poo le fa'ailoga tagata lē tonu fo'i, aga'i i nisi tagata?
3. E fa'apefea ona a'afia e fa'ata'ita'iga a ō tatou manatunatuga, uiga tatou te faia i tagata fa'apea?
4. Aisea e fa'aigoaina ai le tulafono a le Atua, o le tulafono o le sa'olotoga?
5. Fa'amatala le uiga e tatau ona i ai ia i tatou, i le a'oa'oina o tagata o loo i ai manatu sese.

Lesona 6

Sapati, Novema 9, 2024

Fa'atuatua i Gaiogiga

MAU TAULOTO: “Le tagata valea e, e te lē fia iloa ea, ua mate lava le fa'atuatua pe a leai ni galuega?” (Iakopo 2:20).

“E ui ina lē mafai ona lavea'i e galuega lelei se tagata e to'atasi, ae e lē mafai fo'i ona lavea'iina se tagata e to'atasi e aunoa ma galuega lelei.” – *Faith and Works*, p. 111.

Faitauga Fautuaina: *Early Writings*, pp. 226-228, 269-273.

Ulua'i Aso

Novema 3

1. FA'ATUATUA MA FA'ATA'ITA'IGA

- a. Aisea e matuā aogā ai lava le ola i le loto gatasi atoatoa ma le fa'atuatua o loo tatou ta'utinoina? 1 Korinito 4:9; 1 Ioane 5:3; Iakopo 2:14.

“Aua lava ne'i fa'aseseina e nisi i latou lava i le talitonuga e fa'apea, e mafai ona latou paia a'o latou solia pea ma le loto i ai, se tasi o mana'oga o le Atua. O le faia e le tagata o se agasala o loo ia iloaina, e fa'agūgūina ai le leo o le molimau a le Agaga ma vavaeseina ai le tagata mai i le Atua.” – *The Great Controversy*, p. 472.

“O le molimau o le olaga o le tagata, e fa'asilasilaina atu ai i le lalolagi pe na te fa'amaoni i le fa'atuatua o loo ia ta'utinoina. O lau amio e fa'aitiitia ai le tulafono a le Atua i le fua a au uo fa'alelalolagi. E fai atu lau amio ia i latou: ‘E mafai, pe e lē mafai fo'i ona ē usita'i i poloa'iga. Ou te talitonu o le tulafono a le Atua, i se isi uiga, o loo tumau pea i luga o tagata; peita'i, o le mea e sili ona tāua, e lē ma'oti tele le Alii i se tausiga ma'oti o ona fa'atonuga, ma o se solitulafono i nisi o taimi, Na te lē fa'asalaina i se fa'asalaga matuā.’

“E to’atele tagata o loo latou faia alofaga mo i latou lava mo lo latou solia o le Sapati e ala i lo latou fa’asino atu i a outou fa’ata’ita’iga. Latou te finau mai fa’apea, afai o se tagata e matuā lelei lava na te talitonu o le aso lona fitu o le Sapati lea, e mafai ona ia galue i galuega fa’alelalolagi i lena aso pe a foliga mai, o mea e tutupu e mana’omia ai o ia e faigaluega i lena aso, e mautinoa lava e mafai ona latou faigaluega e aunoa ma le ta’usalaina. E to’atele tagata o le a outou fa’afesaga’i i le aso o le fa’asalaga, ma latou faia ai lou a’afiaga o se alofaga mo lo latou lē usita’i i le tulafono a le Atua. E ui lava o le a lē avea lenei tulaga ma fa’ato’esea mo a latou agasala, ae o le a mata’utia lona i’uga e tete’e ai ia te oe.” – *Testimonies for the Church*, vol. 4, p. 250.

Aso Gafua

Novema 4

2. O LE LAGI MA LE LALOLAGI O LOO MATAMATA MAI

a. O le a le fa’ata’ita’iga o loo aumaia e Iakopo e fa’aatina mai ai le uiga pepelo lē aogā e aunoa ma ni gaioiga? Iakopo 2:15-17.

“O le lauga e sili ona matagofie e mafai ona laugaina e fa’atatau i le tulafono o Poloa’iga e Sefulu, o le *faia lea o Poloa’iga e Sefulu*. O le usita’i e tatau ona faia o se tiute o tagata ta’ito’atasi. O le fa’atalalē i lenei tiute o le agasala lea e faia ma le iloa. Ua tu’uina i tatou e le Atua i lalo o matafaioi e lē gata ia mautinoa ai lo tatou mauaina o le lagi, ae ia tatou lagona ai fo’i o se tiute tumau lenei e lē mafai ona sa’oloto mai ai, i le fa’aioaina atu o le ala i isi, ma, e ala i lo tatou naunau ma lo tatou alofa lē fa’aitu’au, ina ia ta’ita’i atu aga’i ia Keriso i latou e o mai i totonu o le li’o o lo tatou a’afiaga. O le iloga o le leai o se tapula’a e fa’atusalia mai ai olaga o le tele o kerisiano o fa’aupuga, e matuā mata’utia lava le leaga. O lo latou lē amanaia o le tulafono a le Atua, e fa’alotovaivaiina ai i latou o loo iloaina ona mana’oga paia, ma liliueseina ai mai i le upu moni i latou o ē na semanu e taliaina le upu moni.” – *Testimonies for the Church*, vol. 4, p. 58. [Author’s emphasis.]

b. O le a le uiga moni o le talitonu moni ia Keriso? Iakopo 2:18; Mataio 6:24.

“Ua fetalai le Atua, ma Na te finagalo ina ia usita’i le tagata. Na te lē fesili mai pe fetau mo ia lona usita’i. O le Alii o le ola ma le mamalu, Na te lē’i fesili pe fetau mo Ia poo Lona fiafiaga, ina ua Ia tu’ua Lona tulaga mamalu maua ina ia avea ai o Ia ma tagata o le fa’anoanoa ma masani ma le tigā, ma Ia taliaina ai le fa’alumaina ma le oti ina ia lavea’iina ai le tagata mai i le i’uga o lona lē usita’i. Na maliu Iesu, e lē’i maliu ina ia lavea’i ai le tagata *i totonu* o ana agasala, peita’i ina ia lavea’iina ai o ia *mai i* ana agasala. O le tagata e tatau ona ia tu’ua le sese o ona ala, ina ia mulimuli ai i le fa’ata’ita’iga a Keriso, ‘ia ia tauaveina a’e ai lona satauro ma mulimuli atu ia te Ia, ma fa’afitia ai e ia, ia lava, ma usita’i ai i le Atua i so’o se tau lava. . . .

“Afai o i tatou o auauna moni a le Atua, e lē tatau ona i ai se fesili i totonu o ō tatou mafaufau, pe o le a tatou usita’i i Ana poloa’iga, pe o le a tatou manatunatu muamua i o tatou lava mana’oga fa’alētumau. Afai e lē o tausaiaina e le fa’atuatua o tagata e talitonu i le upu moni, i latou lava, i nei aso o loo i ai pea le filemu, o le a se mea o le a fa’atumauina i latou pe a o’o mai le tofotofoga tele ma ua tu’uina mai le poloa’iga e tete’e ai ia i latou uma

lava o le a lē ifo i le fa’atagata o le manufeai ma lē taliaina lona fa’ailoga i o latou muauulu poo o latou lima? O lenei vaega taimi mata’utia, e lē o toe mamao ese atu. E aunoa ma le vaivai ma le fa’alotoloto lua o tagata o le Atua, e tatau ona latou fa’apotopotoina mai le malosi ma le loto tele mo le taimi o puapuaga.” – Ibid., pp. 250, 251. [Author’s emphasis.]

Aso Lua

Novema 5

3. A’OA’O MAI IĀ APERAAMO

a. O le a le tulaga mata’utia fa’aleagaga ua lapata’ia ai i tatou? Iakopo 2:19.

“E to’atele latou te ioeina e fa’apea, o Iesu Keriso o Ia o le Fa’aola o le lalolagi, peita’i o le taimi lava lea e tasi, latou te taofieseina ai i latou mai ia te Ia, ma latou lē salamō ai i a latou agasala, ma latou lē taliaina ai Iesu e avea ma o latou Fa’aola ta’ito’atasi. O lo latou fa’atuatua ua na o se ioe lea a le mafaufau ma le filifiliga i le upu moni; peita’i o le upu moni e lē o aumaia i totonu o le loto, ina ia fa’apaiaina ai le tagata ma liua ai le amio.” – *Selected Messages*, bk. 1, pp. 389, 390.

“Atonu e te talitonu i le upu moni uma lava; ae afai o ona tapula’a e lē o tauaveina i lou olaga, o lau ta’utinoga o le a lē lavea’iina ai oe. O Satani e talitonu fo’i ma gatete. Na te galue fo’i. Ua ia iloa ua pu’upu’u lava lona taimi, ma ua ia alu ifo i lona mana tele ina ia faia ana galuega leaga e tusa ai ma lona fa’atuatua. Peita’i o tagata o loo ta’utino mai o i latou o tagata o le Atua, latou te lē o lagolagoina lo latou fa’atuatua e ala i a latou galuega. Latou te talitonu i le pu’upu’u tele o le taimi, ae latou te taofi mau atu ma le finafinau i mea o lenei lalolagi, e peisea’i o le a tumau pea le lalolagi i se isi afe tausaga e pei ona i ai i le taimi lenei.” – *Testimonies for the Church*, vol. 2, p. 161.

b. E fa’apefea ona mafai ona fa’amalosia i tatou e ala i le fa’ata’ita’iga a Aperamo? Roma 4:1-3; Iakopo 2:20-22.

“O Aperamo na ia talitonu i le Atua. E fa’apefea ona tatou iloa na ia talitonu? O ana galuega na molimau i le amio a lona fa’atuatua, ma o lona fa’atuatua na avea ma amiotonu ia te ia.

“Tatou te mana’omia le fa’atuatua o Aperamo i o tatou taimi, ina ia fa’amalamalamaina ai le pogisa o loo si’omia maia i tatou, ma punitia ai le pupula matagofie o le la o le alofa o le Atua, ma avilu ai le tupu a’e fa’aleagaga. . . . O tiute ta’itasi uma lava e fa’atinoina, o taulaga ta’itasi uma lava tatou te fa’asatauroina ai i tatou lava i le suafa o Iesu, e aumaia ai se tau e matuā silisili lona tele. I le gaioiga tonu lava o le tiute, e fetalai mai ai le Atua ma foa’i mai Lana fa’amanuiaga.” – *The SDA Bible Commentary* [E. G. White Comments], vol. 7, p. 936.

“O tagata e ta’uamiotonuina e le fa’atuatua, peita’i e fa’amasinoina ma tauia e tusa ai ma a latou galuega.” – *The Signs of the Times*, November 20, 1884.

“O le amiotonu a Keriso e aofia ai gaioiga sa’o ma galuega lelei e sau mai i mafua’aga mamā, lē fa’apito.” – *Testimonies for the Church*, vol. 3, p. 528.

“O le tausaiaina o poloa’iga a le Atua e mana’omia ai galuega lelei mai ia i tatou, o le fa’afitia e le tagata o ia lava, o le fa’asatauroina e le tagata o ona lava mana’o, ma le naunau

atu mo le lelei o isi, o a tatou galuega lelei e lē mafai ona lavea'iina ai i tatou, peita'i e mautinoa lelei lava e lē mafai ona lavea'iina i tatou e aunoa ma galuega lelei. A uma ona tatou faia mea uma lava e mafai ona tatou faia, ona tatou fa'apea ifo lea: Ua nā ona matou faia lava o lo matou tiute, ma ua na o i matou o ni auauna lē aoga, e lē aogā mo le meaalofa e sili ona itiiti mai i le Atua. O Keriso e tatau ona aveva ma a tatou amiotonu ma pale o lo tatou olioliga.” – Ibid., p. 526.

Aso Lulu

Novema 6

4. UPU FA'AMALOSI'AU

- a. **Fa'amatala pe fa'apefea ona lafoia mai le fa'ata'ita'iga o le olaga o Aperaaamo i o tatou lava olaga i le aveva o i tatou ma tagata talitonu ia Keriso. Kenese 26:5; Iakopo 2:23, 24.**

“O galuega lelei o fua ia o le fa'atuatua. A'o galue le Atua i totonu o le loto, ma gaua'i atu e le tagata lona loto i le Atua, ma galulue fa'atasi ai ma Ia, na te galuea'iina i lona olaga le mea o loo galuea'iina e le Atua i totonu e ala i le Agaga Paia, ma ua i ai le loto gatasi i le va o le sini a le loto ma le fa'atinoga a le olaga. O agasala ta'itasi uma lava e tatau ona lafoa'iina e aveva o se mea inosia na fa'asatauroina ai le Alii o le ola ma le mamalu, ma o le tagata talitonu e tatau ona i ai sona iloa aga'iga'i i luma e ala i lona faia i taimi uma lava o galuega a Keriso. O le gaua'i atu o le malosi fai filifiliga o le loto i taimi uma lava, o le usita'i i taimi uma lava, lea e fa'atumauina ai le fa'amanuiaga o le ta'uamiotonuina.

“O i latou ua ta'uamiotonuina i le fa'atuatua, e tatau ona latou maua se loto na te tausia ai le ala o le Alii. O se fa'amaoniga e iloa ai e lē o ta'uamiotonuina se tagata e ala i le fa'atuatua, pe a lē tutusa ana upu ma lana ta'utinoga. Fai mai Iakopo, ‘E te lē iloa ea, na galulue fa'atasi le fa'atuatua ma ana galuega, o galuega fo'i ua fa'aatoatoaina ai le fa'atuatua?’ (Iakopo 2:22).

“O le fa'atuatua lea na te lē fuaina mai galuega lelei, e lē ta'uamiotonuina ai le tagata.” – *Selected Messages*, bk. 1, p. 397.

- b. **Aisea e mafai ai ona fa'alototeleina i latou uma lava e molimau atu i tagata fa'apaupau i le taimi lenei, e ala i le fa'amatalaga e fa'atatau ia Ra'ava, le fafine talitane, sa ta'uamiotonuina e le Atua? Iakopo 2:25; Eperu 11:31.**

“I totonu o Ieriko amioleaga o le molimau a se fafine fa'apaupau na fa'apea, ‘O Ieova lou Atua, o Ia o le Atua i le lagi i lugā, ma le eleele i lalō.’ Iosua 2:11. O le iloa e fa'atatau ia Ieova lea na fa'apena ona o'o mai ia te ia, na fa'amaonia ai lona fa'aolataga. . . . Ma o lona liuaga e lē o se liuaga uiga ese lea o le alofa tunoa o le Atua i tagata ifo i tupua na ioeina Lana pule fa'aleatua.” – *Prophets and Kings*, p. 369.

“O i latou uma lava na liliu ese mai i le ifo i tupua aga'i atu i le ifoga i le Atua moni, e fa'apei o Ra'ava le Kanana, ma Ruta le Moapi, na mana'omia ina ia fa'atasi ma Ona tagata filifilia.” – *Christ's Object Lessons*, p. 290.

“O se galuega tele lava e tatau ona faia i totonu o a tatou aai, ma o laufanua ua pula uma mo le seleselega. O ō tatou mafaufau o le a vala'auina i itu uma lava, auā o tagata ua

salamō i atunuu kerisiano ma atunuu fa’apaupau o le a si’itia a’e o latou leo mo le fesoasoani. E lē tatau ona i ai se vaega itiiti lava e tasi o le si’itiaina a’e e le tagata o ia lava; e tasi lava lou saogalemu o lou talitonu fa’alagolago atu lea i le Atua.” – *The General Conference Bulletin*, April 1, 1895.

Aso Tofi

Novema 7

5. KI I LE MANUMALO

a. **Fa’amatala pe fa’apefea ona tatou maua le manumalo i totonu ia Keriso. Iakopo 2:26; 2 Peteru 1:3, 4.**

“E tāua le i ai o le fa’atuatua i totonu ia Iesu, ma ia ē talitonu ua lavea’iina oe e ala ia te Ia; peita’i o loo i ai le lamatiaga i le manatu e fa’apei ona faia e le to’atele i lo latou fai mai fa’apea, ‘Ua lavea’iina a’u.’ E to’atele ua fai mai: ‘E tatau ona ē faia galuega lelei, ma o le a ē ola’; peita’i, a vavae ese mai ia Keriso, e leai se tagata e mafai ona ia faia galuega lelei. E to’atele o loo fai mai i le taimi lenei, ‘Talitonu, e na o lou talitonu lava, ma ē ola ai.’ O le fa’atuatua ma galuega e o fa’atasi, o le talitonu ma le faia ua tu’ufa’atasia. E lē itiiti ifo le mea e mana’omia e le Alii mai i le tagata i le taimi lenei, nai lo le mea na Ia mana’omia mai ia Atamu i totonu o Parataiso a’o le’i pa’ū o ia – o le usita’i atoatoa, amiotonu lē ponā. O le mana’oga o le Atua i lalo o le feagaiga o le alofa tunoa, e matuā lautele lava e fa’apei o le mana’oga na Ia faia i totonu o Parataiso – o le loto gatasi lea ma Lana tulafono, lea e paia, tonu, ma lelei. . . . Aua ne’i fa’aseseina se tasi i le fa’aseseega lea e fiafia i ai le loto fa’alenatura, e fa’apea, o le a talia e le Atua le fa’amaoni, tusa lava poo le a le fa’atuatua, tusa lava poo le a le lē atoatoa o le olaga. E mana’omia e le Atua mai i Lona atalii ma Lona afafine le usita’i atoatoa.

“O le auala e fa’amalieina ai mana’oga o le tulafono, o lo tatou fa’atuatua e tatau ona taofi mau atu i le amiotonu a Keriso, ma taliaina ai e avea ma a tatou amiotonu. E ala i le fa’atasiga ma Keriso, e ala i le taliaina o Lana amiotonu e ala i le fa’atuatua, e mafai ai ona tatou agava’a e galuea’iina galuega a le Atua, ina ia avea ma tagata faigaluega fa’atasi ma Keriso. Afai o loo ē naunau e te tafea fa’atasi ma le galu o le amiuleaga, ma e lē galue fa’atasi ai ma meafaigaluega fa’alelagi i le taofia o soligatulafono i totonu o lou aiga, ma totonu o le ekalesia, ina ia mafai ai ona aumaia i totonu le amiotonu e fa’avavau, e lē o ia te oe la le fa’atuatua. O le fa’atuatua e galue i le alofa ma fa’amamāina ai le tagata. E ala atu i le fa’atuatua, e galue ai le Agaga Paia i totonu o le loto ina ia foafoaina ai iina le fa’apaiaina; peita’i o lenei tulaga e lē mafai ona faia se’ivagana o le a galue fa’atasi le meafaigaluega fa’aletagata ma Keriso. . . . O le auala e mafai ai ona tatou maua le amiotonu a Keriso, tatou te mana’omia ina ia tatou liua i aso ta’itasi, e ala i le a’afiaga o le Agaga, ina ia tofusua i le natura fa’aleatua.” – *Selected Messages*, bk. 1, pp. 373, 374.

FESILI TOE FA'AMANATU

1. I lo'u fai mai ou te tausia le tulafono a le Atua, o le a se mea e tatau ona ou iloa e fa'atatau i lo'u a'afiaga?
2. O le a le mea e mana'omia e le Atua mai i kerisiano talitonu?
3. Aisea e masani ai lava ona fa'aigoaina Aper'a'amo o le tamā o ē fa'atuatua?
4. I le lotolotoi o i latou ou te masani ai, o ai atonu e i'u ina liua e fa'apei o Ra'ava?
5. E fa'apefea ona tatau ona ou maua se olaga ma se iloa fa'akerisiano manumalo?

Lesona 7

Sapati, Novema 16, 2024

Tatalo A'o Le'i Mātala O Tatou Gutu

MAU TAULOTO: “A’oa’o mai ia te a’u, ona ou lē tautala ai lea: ma fa’ailoa mai ia te a’u se mea ua ou sese ai” (Iopu 6:24).

“ ‘Afai e lē sese se tasi i le upu, o ia o se tagata ua atoatoa ona lelei, na te mafaia fo’i ona taofi i le tino uma.’ O le malamalama o loo susulu mai i luga o ō tatou ala, o le upu moni o loo ia fa’ailoaina mai ia lava i o tatou mafaufau, o le a ta’usala ma fa’aumatiaina ai le agaga, pe fa’apaiaina ai fo’i ma liua ai. O loo tatou ola nei e matuā latalata atu lava i le tapunia o le nofo va’ava’aia, o lea e lē tatau ai ona fa’amalieina i tatou i se galuega papa’u lē tāua.” – *Testimonies for the Church*, vol. 1, p. 308.

Faitauga Fautuaina: *Testimonies for the Church*, vol. 2, pp. 50-55, 314-318; vol. 5, pp. 55-59, 175-177.

Ulua’i Aso

Novema 10

1. FA’AMAUALOINA O LO TATOU FA’AMAUALUGA

- a. O le a se mea e tatau ona teuina i mafaufau e i latou e masani lava ona vave lo latou taumafai e pulea isi? Iakopo 3:1; Mareko 9:35.

“E fa’amasinoina e le Atua tagata ta’itasi uma lava mo le a’afiaga e si’omia ai o ia, mo ia lava ma isi fo’i.” – *Counsels to Parents, Teachers, and Students*, p. 102.

“O le tulaga fa’alenatura lava, o tagata e manatu lava mo i latou lava ma fa’ailoga tagata. Peita’i o le loto fa’apito e nimo ese atu mai i olaga o i latou e a’oa’oina lesona o loo naunau Keriso e a’oa’o atu ia i latou. Latou te tofusia i le natura o le Atua, ma e afio Keriso i totonu ia i latou. Latou te manatu o tagata uma o ō latou uso ia, e tutusa o latou fa’anaunauga, tomai, fa’aosoosoga, tofotofoga, ma o loo latou mana’omia le alofa ma le fesoasoani.

“E lē tatau lava ona tatou fa’alumaina se tagata. Afai tatou te iloa ua faia mea sese, e tatau ona tatou faia mea uma lava i lo tatou malosi e fesoasoani ai i ē ua sese, e ala i le

ta'uina atu ia i latou e fa'atatau i mea na tutupu ia i tatou fo'i ia – ina ua tatou faia mea sese tūgā, o le onosa'i ma le mafutaga, agalelei ma le agaga fesoasoani a lo tatou aufaigaluega, na foa'iina mai ai ia i tatou le loto tele ma le fa'amoemoe.” – *The Signs of the Times*, May 11, 1904.

Aso Gafua

Novema 11

2. FAUSIAINA A'E O SE UIGA E SILI ATU ONA LELEI

- a. **O a a'oa'iga ma'ama'ai ua tu'uina mai mo i latou e sauā i isi a'o le taimi lava lea latou te mumusu ai e ioeina a latou lava mea sese? Failauga 7:20; Iakopo 3:2 (vaega muamua).**

“O le a outou lē iloaina ea o outou lava sese ma outou o'ofu ai i le ofutau atoa o le amiotonu? O le a outou lē matuā mataala ea ma su'esu'e ifo o outou loto ma uiga ma upu, e fa'apei ona outou faia i uiga ma upu a isi, ne'i fa'alumaina le Atua, ma fa'auigaseseina ai Lana upu moni? O lau va'ai fa'aleagaga o le a matuā fa'aleleia atili lava, pe afai e te faia lenei tulaga. O le upu moni, le upu moni ola, o le a avea e fa'apei o se afi o loo punitia i totonu o ou ivi, lea o le a susulu mai i lona tulaga ma'oti manino lē mafa'afesiligia, ma fa'atusalia atu ai Keriso i le lalolagi. . . .

“E lē mafai ea ona iloa e se tasi o i latou ia ua latou faia i latou o ni leoleo su'esu'e, le taula'iga o le tulaga ua latou faia i lo latou taumafai ina ia avea i latou o se malosi e pule? O fea na i ai la latou va'ai fa'aleagaga manino? Aisea na mafai ai ona latou iloa atu le fasi la'au i totonu o le mata o se uso, a'o le utupoto sa i totonu o o latou lava mata?” – *Testimonies to Ministers*, pp. 295, 296.

- b. **O le a se mea e iloa ai ua o'o se tasi i le maualuga o le atoaga o le amio – ma o le a le auala e tasi lava e mafai ai lenei tulaga? Iakopo 3:2; 1 Korinito 13:5 (vaega lona lua).**

“O le nofoaga e maua ai e le laulaufaiva lē noatia le avanoa e faia ai lana galuega lē paia, e lē mafai ona afio ai iina le olioli o le Alii.

“Ia manatua e i latou e masalosalo, o ē o loo manatu ma tautala i fa'amatalaga leaga e fa'atatau i lo latou au uso, o loo latou faia le galuega leaga a le ti'apolo. Ia galulue ma le finafinau vilivilita'i tagatā ekalesia ta'ito'atasi, fa'atasi ai ma tatalo mo le fesoasoani, ina ia fa'amalōlōina le itu tino fa'ama'ia lea, o le laulaufaiva. Ia iloa e tagata ta'ito'atasi uma lava o lona tiute ma lona avanoa sili ona tāua, lona lē amanaiaina o eseese ma mea sese iti, e aunoa ma se tali atu i se fa'amatalaga e tau fa'amanino ai. Aua le fa'atelēina mea sese laiti e faia e se tasi, ae ia manatu i le lelei o lo o i totonu ia te ia. O taimi ta'itasi uma lava e manatunatu ma talanoa ai e fa'atatau i nei mea sese, e atili ai ona fa'atelēina. O se mauga ua fausia mai i se tama'i fa'afitāuli e lē taua. O lagona sauā lē agalelei ma le leai o se mautinoaga, o le i'uga lea.” – *Australasian Union Conference Record*, April 15, 1903.

“Ia faia se feagaiga ma le Atua o le a ē puipuia lelei au upu. 'Afai e lē sese se tasi i le upu, o le tagata atoatoa ona lelei o ia, na te mafaia fo'i ona taofi i le tino uma.' Iakopo 3:2. Manatua o se lauga tauimasui, e lē mafai ona lagona ai e se tasi ua ia maua se manumalo.

Ia fa'ataga Keriso Na te fetalai e ala atu ia te oe. Aua e te ma'imauina le fa'amanuiaga e o'o mai i lou lē manatunatu i se mea leaga.” – *Testimonies for the Church*, vol. 7, p. 243.

Aso Lua

Novema 12

3. E AMATA I LE A'A

- a. **Ta'u mai le taula'iga sese e mulimuli mai pe a tatou fa'apelepeleina le ita, ma fa'amatala mai le auala e tasi lava e alo ese mai ai i lenei tulaga. Eperu 12:15; Iakopo 3:3-5.**

“Ua ē tausi fa'apelepeleina lou ita i lau tane ma isi ua sese mai ia te oe, peita'i ua ē lē iloa tonu po'o fea ua ē sese ai, ma ua ē fa'afaigatāteleina ai le mataupu e ala i lou lava uiga sese. O lou agaga o loo tiga ia i latou ua faia uiga lē tonu ia te oe, ma o ou lagona ua latou maua se avanoa e ulufafo mai ai i faitioga ma fa'asalaga. O lenei uiga o le a maua ai le filemu mo sina taimi pu'upu'u i lou loto fa'apologaina, peita'i ua ia tu'ua se ma'ila tumau i lou loto. O le laulaufaiva o se totoga itiiti lava lea, peita'i ua ē a'oa'oina lona fa'aaogaina lē tatau se'ia o'o ina avea ma afi e fa'aumatiaina ai.

“O mea uma lava nei ua fa'aumatiaina ai lou aga'i i luma fa'aleagaga. Peita'i o loo silafia e le Atua le faigata mo oe ona ē onosa'i ma fa'amagalo, ma Na te silafia le auala Na te alofa mai ai ma fesoasoani. Na te finagalo ia te oe ina ia toe fuata'i lou olaga, ma fa'asa'o ou vaivaiga. Na te finagalo ina ia gaua'iina e Lona alofa tunoa, lou agaga mausali, lē gaua'i. E tatau ona ē sa'ilia le fesoasoani a le Atua, auā e te mana'omia le filemu ma le paganoa ae e lē o le afā ma fete'ena'iga. O le tapua'iga a Keriso e fa'atonuina mai ai ia te oe ina ia itiiti lou gaiou mai i ou lava lagona oso, ae ia sili atu lou gaiou mai i le mafaufau fa'apaiaina ma filifiliga to'a lelei.” – *Testimonies for the Church*, vol. 4, p. 139.

- b. **O le a se mea e tatau ona tatou iloa e fa'atatau i upu tatou te tautalagia? Iakopo 3:6.**

“O au upu o le a fa'asilasila atu ai, o au gaiouga o le a fa'ailoa atu ai, poo fea o i ai lau oa.” – *Ibid.*, vol. 1, pp. 698, 699.

“O Sister F e gaiou mai i lagona osovale, ma na te su'esu'e masei, ma ua matuā tele tele ana upu e faia e fa'atatau i ona tuagane ma uso. O lenei uiga o le a fa'aosofiaina ai le nunumi i totonu o so'o se ekalesia.” – *Ibid.*, vol. 2, p. 51.

“Ia manatua e i latou e fiafia e tusi upu tau fa'aleaga ma le pepelo e fa'atatau i auauna a Keriso, o le Atua o Ia o se molimau i a latou galuega. O a latou tusi tau fa'aleaga, e lē o upu leaga ai i tagata e leai ni o latou ola, peita'i o loo latou fa'aleagaina ai amio a i latou ua fa'atauina e Keriso i Lona toto. O le aao na tusia upu i luga o le pa puipui o le maota o Pelesara, Na te teuina fo'i ma le fa'amaoni fa'amaumaga o gaiouga ta'itasi uma lava o faiga lē tonu poo le fa'apologaina o loo faia aga'i i tagata o le Atua.” – *Ibid.*, vol. 5, pp. 244, 245.

4. TUSA LAVA PE MONI. . . .

a. O a olega malolosi lava o loo faia e fa'atatau i se uiga masani mata'utia lava i o tatou taimi? Salamo 15:1-3; 1 Korinito 13:6.

“O le laulaufaiva lea e fiafia i le fa'amanu'aliaina, o le laulaufaiva tautalatala lea o loo fai mai, Ripoti, ma o le a ou ripotiina, ua fa'aigoaina e le aposetolo o Iakopo o le afi lea o seoli. Na te fa'asalalauina aloi afi i itu uma. O le a se mea e popole ai fua lē o loo fa'atauina atu muimuiga ia o le a ia fa'ata'uvaleaina ai le tagata lē sala? O le a ia lē fa'amutalia lana galuega leaga, e ui lava ina ia fa'aumatiaina ai le fa'amoemoe ma le loto tele i totonu o i latou ua goto ifo i lalo o a latou avega. E tasi lava le mea na te popole i ai o le fa'amalieina lea o lona uiga fa'aitū'au o le fa'alumaina o isi. E o'o lava i ē o loo ta'utino mai o i latou o kerisiano, e moei'ini o latou mata i mea uma lava e mamā, fa'amaoni, lelei, ma matagofie, ma latou teu fa'apelepeleina ai so'o se mea lava e leaga ma lē lelei, ma fa'asalalau atu ai i le lalolagi.

“Ua outou tatalaina atu faitoto'a mo Satani e ulufale mai ai i totonu. Ua outou tu'uina atu ia te ia se nofoaga fa'amamaluina i la outou su'esu'ega, poo a outou fonotaga o sa'ili'iliga. Peita'i ua outou lē fa'ailoaina atu se fa'aaloalo mo uiga sili ona lelei o se amio na fa'amausalīina e tausaga e tele o le fa'amaoni. O le fuā, o laulaufaiva tauimasui ua latou valiina gaioiga ma mafua'aga o gaioiga a isi, ina ia fa'afetaui ma o latou lava manatu. Ua latou faia le uliuli ina ia foliga mai i le pa'epa'e, ae ua latou faia le pa'epa'e ina ia foliga mai i le uliuli. A otegiaina la i latou ona o a latou fa'amatalaga, o nisi ua fai mai: 'E moni.' Ma latou ioeina ai, o upu ua tautalagia atu, e moni, e ta'uamiotonuina ai ea e lau ioega le mea ua ē faia? E leai, e leai. Afai e avega e le Atua tu'ua'iga uma lava e mafai ona aumaia moni lava e fa'atatau ia te oe, ma fili fa'atasi ai ia avega ma sasa e fa'asalaina ai oe, o ou manu'a o le a matuā sili atu le tele ma sili atu ona loloto nai lo manu'a ia ua ē faia ia Brother -----. E o'o lava i mea moni, e mafai ona matuā fa'amatalaina lava i ni upu ina ia tu'uina atu ai se manatu sese. E leai sau aiā e te fa'apotopotoina a'e ai fua ripoti uma e fa'atatau ia te ia, ma fa'aaogaina ai e fa'afanoina ai lona igoa ma fa'aumatiaina ai lona olaga aogā. Ana fa'apea e fa'aalia mai e le Alii ia te oe le agaga lava lea e tasi ua ē fa'aalia atu i lou uso, semanu o le a fa'aumatiaina oe e aunoa ma se alofa. E leai ea sou lagona fa'anoanoa, salamō i lou mafaufau? Ou te mata'u e leai. E lē'i o'o mai le taimi e aveesea ai le malosia o lenei fa'asesēega fa'asatani. Afai o Brother ---- o ia o mea uma lava ia e te fa'amatalaina mai ai o ia – lea ou te iloa e lē moni, o lau amio o le a lē ta'uamiotonuina pea.

“A tatou fa'alogi i se faitioga e fa'atatau i lo tatou uso, ua tatou tauaveina lena faitioga. . . .[Salamo 15:1-3]” – *Testimonies for the Church*, vol. 5, pp. 57, 58.

b. Mai i agasala e fitu ua fa'ailoa mai o mea inosia ia i luma o Ieova, o le a le tele o nei agasala e patino i a tatou upu? Fa'ata'oto 6:16-19.

5. O SE A'UPEGA E FA'AMANU'ALIA AI

- a. **E fa'apefea ma aisea e tatau ai ona tatou alo ese mai i le masaniga matuā ta'atele lava lea o le faitatala? Iopu 6:24; Fa'ata'oto 11:13; 26:20-22.**

“Oka se lalolagi o le faitatala o le a taofia pe afai e manatua e tagata ta'itasi uma, o i latou o loo ta'uina atu ia te ia sese o isi, o le a fa'apena fo'i ona ia fa'asalalau fa'alaua'iteleina ona sese i se avanoa e fetau ma ia. E tatau ona tatou taumafai e manatu lelei e fa'atatau i tagata uma, aemaise ai lava lo tatou au uso, se'ivagana ua una'iina i tatou i ni manatu e ese mai e fa'atatau ia i latou. E lē tatau ona tatou taliaina fa'ata'alise ripoti leaga. O nei ripoti leaga, o le tele lava o taimi, o le i'uga lea o le anovale loto leaga po'o le lē malamalama fo'i, pe sau fo'i mai i fa'amatalaga so'ona fa'atelēina poo se fa'aaliga fa'alēatoa fo'i o mea moni. O le fuā loto leaga ma le masalosalo vale, a fa'atagaina loa sona nofoaga, o le a latou fa'asalalauina fa'aaliali atu loa i latou, e pei o la'au talatala. A sē ese se uso, o le taimi lena e fa'ailoa atu ai lou naunau moni lava ia te ia. Alu ia te ia i le agalelei, tatalo fa'atasi ma ia ma tatalo mo ia, ma manatua ai le tau lē mafuatia ua totogiina e Keriso mo lona fa'aolataga. I lenei auala e mafai ona ē lavea'iina ai se agaga mai i le oti, ma ufiufi ai le tele o agasala.

“O se tepa, o se upu, e o'o lava i se ituaiga leo, e mafai ona tumu i le taufa'asese, e goto ifo e pei o se ū ma'ama'ai i totonu o se loto, ma faia ai se manu'a e lē mafai ona fofōina. E fa'apena ona lafoina atu se masalosaloga, o se faitioga, i luga o lē e finagalo le Atua na te fa'ataunu'uina se galuega lelei, ma o lona a'afiaga ua fa'aleagaina, o lona olaga aogā ua fa'aumatiaina. I le lotolotoi o nisi o ituaiga manu, afai e manu'a ma pa'ū se tasi o i latou, e osofa'ia loa ma saeia nini'i e a latou uo. O le uiga sauā lava lea e tasi o loo fa'amalieina tu'inaanau e tane ma tama'ita'i o loo tauaveina le igoa o le kerisiano. Latou te fa'aalia se finafinauga fa'afaresaio ina ia fetogia i ma'a isi e itiiti ifo lo latou agasala nai lo i latou. O loo i ai nisi o loo fa'asino atu i sese ma mea e to'ilalo ai isi tagata ina ia liliu ese mai ai mafaufau o tagata mai i o latou lava sese, poo lo latou maua ai fo'i o le viiga mo lo latou vilivilita'i tele mo le Atua ma le ekalesia.” – *Testimonies for the Church*, vol. 5, pp. 58, 59.

“O le taimi lea e masani lava ona sili atu lona leaga nai lo le fa'ama'imauiina i le faitatala lē aogā, fa'avalevlea, ma le sauā, e tatau ona tu'uina atu i sini e sili atu ona maualuga ma sili atu ona lelei.” – *Ibid.*, p. 176.

FESILI TOE FA'AMANATU

1. **Aisea e tatau ai ona ou fa'aitiitia le uiga o le fa'aalia o o'u manatu e fa'atatau i mea uma?**
2. **Ta'u mai se vaega taua o le amio e fa'apei o le amio a Keriso lea e masani lava ona lē amanaiaina.**

3. Afai tatou te fa'amanu'alia igoa o lo tatou au uso talitonu, i luma o isi, o le a le finagalo o le Atua e fa'atatau i lenei tulaga?
4. O le a le mea ou te mana'omia ina ia ou a'oa'o mai i le Salamo 15-ma aisea e tāua ai?
5. E fa'apefea ona ou agasala i le lūlūina o fe'eseesea'iga i le lotolotoi o le au uso ma aisea e tatau ai ona ou fa'amutaina lenei galuega?

Lesona 8

Sapati, Novema 23, 2024

Filifiliina O Sini E Manatunatu I Ai

MAU TAULOTO: “E mafaia fa'apefea e outou, o ē e leaga, ona outou tautala i upu lelei? auā o le tele o mea o loo tumu ai le loto e tautala mai ai le gutu” (Mataio 12:34, vaega lona lua).

“Tatalo a'o ē lē'i tautala, ma o le a fesoasoani mai agelu o le lagi ia te oe ma tuli i tua agelu leaga, o ē o le a ta'ita'ia oe ina ia ē lē viia le Atua, faitioina Lana galuega, ma fa'avaivaia lou lava agaga.” – *Testimonies for the Church*, vol. 2, p. 82.

Faitauga Fautuaina: *Thoughts From the Mount of Blessing*, pp. 125-129.

Ulua'i Aso

Novema 17

1. FOFŌ MO LE 'ONA

- a. A osofa'ia i tatou e masaniga o le tautala, a tane e agasala o latou mafaufau, o le a le fe'au a le Atua ia i tatou, i le lotolotoi o ia osofa'iga uma? Iakopo 3:7, 8; Eperu 10:38

“O [Brother J] o loo alolofa mai i ai agelu fa'alelagi, auā o loo si'omia o ia e le pogisa. O ona taliga e toetiiti lava a fa'alogi i taimi uma i upu o le lē talitonu ma le pogisa. O loo i ai masalosaloga ma le tu'ufesili o loo lafoina atu i ona luma i taimi uma lava. O le laulaufaiva o se lalolagi lea o amioga leaga. ‘O le laulaufaiva e lē mafai e se tasi ona taofia, o se totoga leaga e lē taupulea, e tumu i le mea oona e oti ai.’ Afai o le a sili atu le mausali o le pipi'i atu o Brother J i le Atua, ma ia lagona ai e tatau ona ia fa'atunauina lona mamalu i luma o le Atua e tusa lava pe aveesea ai lona ola fa'alēnatura, o le a ia maua le malosi mai ia te Ia. Afai na te fa'atagaina lona fa'atuatua ina ia a'afia i le pogisa ma le lē talitonu o loo si'omia ai o ia – o masalosaloga ma le tu'ufesili ma le tele o le tautala – o le a lē umi ae avea loa o ia ma pouliuli atoa ma le masalosalo ma le lē talitonu, ma o le a leai sona malamalama poo sona malosi i totonu i le upu moni.

“E lē tatau ona ia manatu e fa'apea, o lona sa'ili e faia maliega ma ana uo e fa'atagaina ai le agasala, ana uo ia o loo feita i lo tatou fa'atuatua, o le a ia fa'afaigofieina ai lona olaga. Afai na te tula'i ma le sini e tasi ina ia usita'i i le Atua i so'o se tau lava, o le a ia maua le fesoasoani ma le malosi. E alofa ma tigālofa le Atua ia Brother J. Na te silafia mea

uma ta'itasi e fememea'i ai, o mea ta'itasi uma o loo fa'avaivaia ai, o tautalatalaga o'ona ta'itasi uma. Na te silafia uma lava. Afai o le a ia tu'ueseina lona lē talitonu ma tula'i mausalī i totonu i le Atua, o lona fa'atuatua o le a fa'amalosia i le fa'atinoina.” – *Testimonies for the Church*, vol. 4, pp. 236, 237.

Aso Gafua

Novema 18

2. O SE MATAUPU MATA'UTIA

- a. **O le a se mea ua tusia e fa'atatau i le tautala taufa'asesē ma le fa'atupu maseiga – ma aisea e tatau ai ona tatou tatalo ina ia tatou manumalo i lenei vaega o le olaga? Salamo 5:8-10.**

“O le tautala o le tasi lea o meaalofa silisili lava a le Atua i le tagata. O le laulaufaiva o se totoga la'ititi lava, peita'i o upu na te faia, ma fa'aleoina e le leo, e i ai lona malosi tele lava. Ua fetalai mai le Alii, ‘O le laulaufaiva e lē mafai e se tasi ona taofia.’ Ua fai taua ai le tasi malō i le isi malō, ma ua fa'atupuina ai taua ma le toto maligi. O upu ua tutuina ai afi na matuā faigata ona tineia. Ua latou aumaia fo'i le olioli ma le fiafia i le tele o tagata. Ma, pe a tautalagia upu ona ua fetalai mai le Atua e fa'apea, ‘Ia ē tautala atu ia i latou i A'u upu,’ e masani lava ona osofia ai le fa'anoanoa e o'o ai i le salamō.

“O le taleni o le tautala na te tauaveina fa'atasi ai matafaioi tetele lava. E mana'omia ina ia puipuia ma le fa'aeteete; auā o se malosi tele lava lea mo le leaga, ae e mo le lelei fo'i.” – *The SDA Bible Commentary* [E. G. White Comments], vol. 3, p. 1142.

“A fa'aosoosoina oe ina ia ē matuā fa'asa'olotoina le laulaufaiva lē pulea, oka! ia ē manatua i lou mafaufau o le agelu o fa'amaumauga o loo ia tusia upu ta'itasi uma. O nei upu uma o loo tusia i totonu o le tusi, ma, se'ivagana ua fufulueseina e le toto o Keriso, o le a ē toe fetaia'i ma nei upu uma. Ua i ai nei sou ripoti eleelea i le lagi. O le salamō fa'amaoni i luma o le Atua o le a taliaina. A o'o i le taimi o le a ē tautala ai ma le ita tele, tapuni lou gutu. Aua ne'i tautalagia se upu.” – *Testimonies for the Church*, vol. 2, p. 82.

- b. **Fa'amatala pe fa'apefea ona avea a tatou upu, ua na o le i'uga lea o le tele o mea tatou te so'ona manatunatu i ai, ma le ituaiga tagata e i ai i tatou. Ieremia 17:9; Mataio 12:33-37; 14:6-8.**

“O le autu o le talanoaga, e fa'aalia ai le oa o le loto. O le tautala taugofie, tautalatalaga masani, o upu fa'avi'ivi'i, o tala fa'aulaula fa'avalevatea, e tautalagia ina ia fa'aosofia ai le 'ata ma taliē ai, o fefa'ataua'iga ia a Satani, ma o i latou uma lava e tu'inanau sa'oloto i lenei ituaiga tautala, o loo ia fefa'ataua'i i oloa a Satani. O a'afiaga ua faia ia i latou e fa'alogi i nei upu, e tutusa ma le a'afiaga lea na faia ia Herota ina ua siva i ona luma le tala teine a Herotia. O nei fefa'ataua'iga uma i upu, o loo tusia uma i totonu o tusi a le lagi; ma, i le aso tele mulimuli, o le a va'aia ai nei upu i lo latou malamalama moni i luma o i latou e agasala ai. O le a iloa loa e tagata uma i totonu o nei upu o fefa'ataua'iga, le galuega fa'atosina, taufa'asese a le ti'apolo, ina ia ta'ita'iina atu i latou i le ala vā tele ma le faitoto'a lautele o loo mātala atu i lo latou fa'afanoga.” – *Testimonies to Ministers*, pp. 84, 85.

3. O LE LOTO ATOA O LO'O MANA'OMIA

- a. **Aisea e tatau ai ona tatou mana'omia le tautala fa'amaoni i taimi uma mai i ē talitonu i le upu moni mo le taimi lenei? Iakopo 3:9, 10. O le a le lapata'iga ua tu'uina mai pe afai tatou te to'ilalo i le vaega lenei?**

“Afai e te fa'apelepeleina se uiga masani e fa'apea, o lo o silasila ma fa'afofoga le Atua i mea uma lava e te faia ma tautala ai, ma Ia teuina ai se ripoti fa'amaoni o au upu uma lava ma au gaoiga, ma e tatau ona ē fetaia'i ma nei upu ma gaoiga uma, i mea uma lava la e te faia ma tautala ai, o le a ē sa'ili ai ina ia ē mulimuli i fa'atonuga a se mafaufau fa'amalamalamaina ma fafaguina. O lou laulaufaiva o le a fa'aaogaina mo le vi'iga o le Atua, ma o le a avea o se puna o le fa'amanuiaga ia te oe lava, ma isi. Peita'i afai e te vavae ese mai i le Atua, e fa'apei ona ē faia, ia ē fa'aeteete lava, ne'i fa'amaonia o lou laulaufaiva o se lalolagi lea o le amio leaga, ma aumaia ai i luga ia te oe le fa'asalaga mata'utia; auā o tagata o le a leiloa ona o oe.” – *Testimonies for the Church*, vol. 4, p. 244.

- b. **O le a le tatalo e mafai ona fesoasoani ia i tatou ina ia tatou manatunatu ma tautala i upu e sili atu ona fa'amaoni i taimi uma? Salamo 86:11.**

“Afai o lē ua ia mauaina le iloa e fa'atatau i le Tusi Paia, na te lē faia se suiga i ana masaniga poo ana fa'atinoga fo'i ina ia fetau ma le malamalama o le upu moni, o le a la le mea e tatau ona fai? O le agaga o loo fai taua atu i le tino, o loo fai taua atu fo'i le tino i le agaga; ma o le tasi o nei itu e tatau ona manumalo. Afai e fa'apaiaina e le upu moni le tagata, o le agasala ua inosiaina ma te'ena, auā o Keriso ua taliaina e avea o se malō fa'aalologia. Peita'i o Keriso e lē mafai ona nofo fa'atasi ma se loto e vaeluaina; o le agasala ma Iesu e lē mafai lava ona galulue fa'atasi.” – *Testimonies to Ministers*, p. 160.

“Ia ē mataala ma tatalo i taimi uma. Tu'u atu atoatoa oe i le Alii, ma o le a lē faigata ona ē auauna ia te Ia. O loo ia te oe se loto vaeluaina. O le mafua'aga lenei ua si'omia ai oe e le pogisa, ae e lē o le malamalama. O le feau mulimuli o le alofa tunoa o loo aga'i atu nei i luma. O se fa'ailoga lea o le umi ona puapuagatia ma le alofa mutimutivale o le Atua. Sau, o le vala'aulia lenei ua tu'uina atu. Sau, auā ua saunia mea uma lava i le taimi lenei. O le vala'au mulimuli lenei a le alofa tunoa. O le a soso'o mai ai ma le tauimasui a se Atua ua to'asa.” – *Testimonies for the Church*, vol. 2, p. 225.

“O tane ma fafine ma tama'ita'i loto atoatoa, ma mausali i filifiliga lea o le a tula'i i le taimi lenei. Na tofotofu pea lava pea e Keriso Ona so'o, se'ia o'o i se taimi e tasi na totee ai na o le to'a sefulu tasi lava ma nai fafine fa'atuatua fa'amaoni to'aitiiti e folasia le fa'avae o le ekalesia kerisiano. O le a i ai i latou o le a lē galulue pe a mana'omia e tauaveina avega; peita'i pe a susulu atoa mai le ekalesia, e pu'eina e i latou nei le vilivilita'i finafinau, ma pepese ma fe'ei, ma olioli; peita'i ia ē mata'itū i latou. A mavae ese atu loa le vilivilita'i finafinau, e na o ni nai Kalepo to'aitiiti fa'amaoni lava o le a o mai i luma ma fa'ailoa mai tapula'a mausalī. O masima nei o loo fa'atumauiina lo latou o'ona.” – *Ibid.*, vol. 5, p. 130.

4. VAI MAI I SE VAIPUNA MAMĀ

- a. **O le a le tapula'a o loo fa'aalia ai e na o le loto lava ua fa'afouina e le alofa tunoa o le Atua, e mafai ona ia faia gaioiga fa'amaoni i taimi uma? Iakopo 3:11, 12. Aumai ni fa'ata'ita'iga fa'atinoina.**

“O le tū mamā ma le fa'atulaga lelei i ofu, ma le tū mamā i le nofoaga atoa e nonofo ai, e tatau ona tausia ma'oti lava e tagata tausī Sapati ia o loo manatu i ai isi, o i latou o ni tagata uiga ese, ma o loo mata'itūina i latou mo ō latou sese. O lo latou a'afiaga e tatau ona paia. O upu moni paia ia o loo tatou ta'utinoina, o le a lē pa'ū maulalo ai lava i latou e taliaina ia upu moni, pe faia ai fo'i i latou o ni tagata lē mafaufau, ma lē fa'aaloalo, ma latou fa'agaloina ai o latou tino, ma lē tūmamā ai i totonu o ō latou fale. Afai e paiē masaniga a lē ua taliaina le upu moni, o le upu moni e si'itiaina a'e ai o ia, ma galuea'iina ai mo ia se toe fuata'iga mae'ae'a. Se'ivagana ua i ai lenei a'afiaga o le upu moni, o lona uiga e lē'i lagonaina e lea tagata lona mana e liua ai. O se ofu lē fa'aeteete ma lē fa'atulagaina lelei, e lē o se fa'ailoga lea o le loto maulalo. O iinei ua fa'aseseina ai e nisi i latou lava. O le olaga, o gaioiga, o upu, o le a iloa ai po'o i ai le loto maulalo moni i lea tagata, ma o le ofu o le a tutusa ma fua o loo fa'aaloaina mai. O se vai puna mamā e lē mafai ona ia [auina] atu le vai māgalo ma le vai o'ona. Fa'amamā le vai puna, ona mamā ai lea o ona vaitafe. O le malumalu o le Atua o loo masani lava ona fa'aleagaina e fanau a tagata tausī Sapati. O ō latou matua latou te fa'atagaina i latou e taufetuli solo i totonu o le fale o le Atua, ma ta'a'alo, ma talanoa, ma ave ese atu mafaufau o tagata, ma fa'aalia o latou uiga ita leaga i totonu o fa'atasiga tonu lava ia sa latou fa'apotopoto mai i ai e tapua'i ai i le Atua. Ua ou va'aia, o totonu o le fa'apotopotoga a le au paia, e tatau ona pule aoao ai le filemu paia. Peita'i o le fale o loo fa'apotopoto ai le fanau a le Atua, o loo masani lava ona faia ma papelonía atoatoa, o se nofoaga o le nunumi ma le lē fa'atulagaina lelei. O lenei tulaga e lē o fiafia ai le finagalo o le Atua. Afai e lē o i ai i matua le pulega lelei, ma lē mafai ona latou pulea a latou fanau i fa'atasiga o tapua'iga, o le a sili atu ona malie le finagalo o le Atua mo i latou ina ia latou nonofo i le fale ma a latou fanau lē loto ma'a'a lē pulea. E sili ai mo i latou lo latou puapuagatia i lo latou lē auai mai i tapua'iga, nai lo lo latou fa'atiga i se fuainumera e matuā sili atu ona to'atele o le fa'apotopotoga, ma fa'aleagaina ai la latou tapua'iga. Afai e tu'ua e matua a latou fanau e lē pulea, ma lē a'oa'iina i o latou aiga, e lē mafai ona latou fa'atagaina a latou fanau e faia o latou lava loto i le tapua'iga. E lē tatau ona latou manatu ua fa'apuapuagatiaina i latou, pe afai e lē manana'o isi tagata tapua'i e fa'alavelaveina lo latou filemu pe a latou fa'atasi mai e tapua'i i le Atua.

“Mātua, o outou e tatau ona puapuagatia i lenei mataupu, ma atonu o le a ta'ita'ia ai outou ina ia outou iloa ma fa'ataunu'uina lo outou tiute lea ua outou fa'atalalē i ai. Afai tou te aveina a outou fanau i le fale o le Atua, e tatau ona a'oa'oina i latou ina ia latou malamalama, o loo latou i ai i le nofoaga e feiloa'i ai le Atua ma Ona tagata. E lē o mulimulita'ia le fa'atulagaga lea i lenei mataupu i le lotolotoi o tagata tausī Sapati, e fa'apei ona i ai i totonu o isi ekalesia ia ua nā ona fa'aigoaina i le igoa, ekalesia. Mātua, ua ia te outou se galuega e tatau ona faia. A'oa'i ia gaua'i a outou fanau i ō outou aiga, ona mafai

lea ona outou pulea i latou i totonu o le malumalu o le Atua.” – *Spiritual Gifts*, vol. 2, pp. 288, 289.

Aso Tofi

Novema 21

5. POTO MA E FA'ATUMULIA I LE ILOA

a. Aisea e mana'omia ai e i tatou uma ta'ito'atasi le su'esu'e ifo o ō tatou lava uiga mai i totonu aga'i i fafo – i totonu o le loto, i upu, ma gaoiga? 2 Korinito 13:5.

“‘Ia su'esu'e ifo e outou outou lava, po ua outou i totonu o le fa'atuatua; ia fa'amaonia outou lava' (2 Korinito 13:5). Ia su'esu'e auiliili lagona, o uiga, o manatu, o upu, o fa'anaunauga, o mafua'aga, ma gaoiga. E fa'aapefea ona mafai ona tatou ole atu ma le potomo mea tatou te mana'omia se'ivagana ua tatou fa'amaonia e ala i le Tusi Paia, le tulaga o lo tatou ola maloloina fa'aleagaga?’” – *Selected Messages*, bk. 1, p. 89.

“O'u tuagane ma uso, o fa'aapefea ona outou fa'aaogaina le meaalofo o le tautala? Ua outou a'oa'o ea ina ia pulea le laulaufaiva ina ia usita'i i taimi uma lava i fa'atonuga a se mafaufau fa'amalamalamaina ma lagona paia? O sa'oloto ea au talanoaga mai i le uiga māmā fa'aulaula, fai tala ula, fa'amaualuga fa'alialiavale ma le matau'a, taufa'avalea ma amio eleelea? Ua aunoa ea oe ma le pepelo i luma o le Atua? O upu, latou te tu'uina atu se malosi taūa lava. O Satani, o le a ia fa'atumauina le fa'agaioia o le laulaufaiva i lana auaunaga, pe afai e mafai ai. E lē mafai i lo tatou lava malosi ona pulea le itutino lē taupulea lea. O le alofa tunoa o le Atua o lo tatou fa'amoemoe e tasi lea.” – *Testimonies for the Church*, vol. 5, p. 175.

“O lē na te tu'uina atu atoatoa o ia i lalo o le ta'ita'iga a le Agaga o le Atua, o le a ia iloa, o lona mafaufau ua fa'alauteleina ma ua fausiaina a'e. Na te maua se a'oa'oga i le auaunaga i le Atua, lea e lē fa'aitū tasi ma lē sese, ma fausia a'e ai se amio e fa'aitū tasi, peita'i na te maua se a'oa'oga e i'u i le paleni ma le atoatoa lelei. O vaivaiga o loo fa'aalia i se loto fa'alotolotolua ma se amio e leai sona malosi, ua fa'ato'ilaloina, auā o le mata'u i taimi uma i le Atua ma le amio fa'apaiaina, e aumaia ai le tagata i le so'otaga mafana ma Keriso, o lea, ua iā te ia le mafaufau o Keriso. Ua tasi o ia ma Keriso, ua iā te ia le fa'amaoni ma le malosi o tapula'a. O lana va'ai fa'aleagaga ua manino, ma ua ia fa'aalia lena pototo e sau mai i le Atua.” – *Selected Messages*, bk. 1, p. 338.

Aso Faraile

Novema 22

FESILI TOE FA'AMANATU

1. E fa'aapefea ona tataua ona ou tali atu pe a fa'afetaia'ia ma se talanoaga o'ona e oti ai?
2. A tautalagia e tagata ni fa'amatalaga, o le a le mea e fa'ailoa manino mai e fa'atatau ia i latou?
3. Fa'amatala le taua o loo tauina i totonu o le mafaufau fa'aletagata, ma le auala e mafai ona manumalo ai?

4. O a o’u masaniga/uiga atonu o loo fa’ailoa mai ai vai fa’aleagaina i totonu ia te a’u?
5. E fa’apefea ma aisea e tatau ai ona liua lo’u uiga pe a ou tautala?

Lesona 9

Sapati, Novema 30, 2024

Agamalū o le Poto

MAU TAULOTO: “O ai so outou e poto ma ua fa’atumulia i le malamalama? inā fa’ailoa mai ia e ia i talanoaga lelei, ana galuega ma le agamalu o le poto.” (Iakopo 3:13).

“O lo tatou Fa’aola na Ia fa’aosofia le ofo i tagata e ala i Lona olaga mamā ma Lana amio lelei maualuga, a’o Lona alofa ma Lona agalelei na osofia ai i latou i le olioli. naunauta’i. O le tagata e sili ona mativa ma sili ona maualalo, e lē’i fefefe e fa’alatalata atu ia te Ia.” – *Gospel Workers* (1892), p. 261.

Faitauga Fautuaina: *Testimonies for the Church*, vol. 5, pp. 167-177.

Ulua’i Aso

Novema 24

1. “VA’AI FA’ALEAGAGA” FA’ALEAGAINA

- a. O le a le mea leaga mata’utia e tatau ona tatou mataala i ai – ma aisea? Iakopo 3:14, 15.

“O le tagata na te tatalaina atu lona loto i musumusuga a le fili, ma ia taliaina ai masalosologa leaga, ma fa’apelepeleina ai le fuā, e masani lava ona ia fa’auigaseseina lenei mafaufau-leaga, ma ia fa’aigoaina ai o le va’ai-mamao fa’apitoa, iloaina o le eseesega, po’o le va’ai fa’aleagaga fo’i e iloa ai le agasala ma malamalama ai i faufauga leaga a isi. Ua ia manatu o se meaalofa tāua lava ua tu’uina atu ia te ia; ma ia vavae ese ai loa mai i uso tonu lava ia e tatau ona latou loto gatasi; na te a’e a’e i luga o le nofoa fa’amasino, ma tapunia lona loto i lona uso lea na te manatu o loo sese, e peisea’i o ia e lē mafai ona fa’aosoosoina. O Iesu ua vavae ese mai ia te ia, ma tu’ua ai loa o ia e savali i aloiafi na ia tutuina e ia lava.

“Aua lava ne’i umi atu ona mitamita se tasi o outou e tete’e ai i le upu moni e ala i lona fa’ailoa mai e fa’apea, o lenei uiga o se i’uga tatau lea o le a’oa’iina ma le fa’amaoni o i latou e fai mea sese, ma le tula’i e puipuia le upu moni. O le poto e fa’apea le to’atele tagata e fiafia i ai, peita’i e matuā taufa’asese lava ma fa’amanu’alia ai. E lē sau mai i lugā, ae o le fua o se loto lē fa’afouina. O lē na amata mai ai, o Satani lava ia. Aua lava ne’i vi’ivi’ia e se tagata o loo tu’ua’iina isi, ia lava, i lona fai mai ua ia mauaina le va’ai fa’aleagaga; auā o lona faia fa’apena, na te fa’aofuina ai uiga o Satani i ofu o le amiotonu. Ou te vala’au atu ia te outou lo’u au uso, ina ia fa’amamāina le malumalu o le loto mai i nei mea uma lava e fa’aleagaina ai; auā o a’a nei o le ita tauimasui.” – *The SDA Bible Commentary* [E. G. White Comments], vol. 7, pp. 936, 937.

2. UIGA O'ONA E OTI AI

a. Fa'amatala le i'uga ma'utinoa o le ita loto leaga ma le fa'atupu maseiga. Iakopo 3:16.

“O le tagata e to'atasi i totonu o se fa'alapotopotoga poo se ekalesia na te fa'atagaina manatu lē agalelei e ala i lona tautala leaga e fa'atatau i le au uso, e mafai ona ia save'uina a'e lagona sili ona leaga o le loto fa'aletagata, ma fa'asalalau atu ai se mea fa'afefete o le leaga, lea o le a galue i totonu o i latou uma lava o le a mafuta ma feso'ota'i ma ia. I lenei auala, o fili o le amiotonu uma ua ia maua le manumalo, ma o le i'uga o lana galuega, o le fa'alēaogaina lea o le tatalo a le Fa'aola ina ua Ia aioi ina 'ia tasi Ona so'o e fa'apei ona tasi o Ia ma le Tamā.” – *The SDA Bible Commentary* [E. G. White Comments], vol. 7, p. 937.

b. I le eseese ma uiga fa'aletagata e osofia mai e le fili o ō tatou agaga, e fa'apefea ona tatau ona tatou galulue fa'atasi ma isi? Ioane 13:34.

“Ua ē faia lau fa'ai'uga i luga o tagata ta'itasi, ma ē fa'a'ailoa ai ou manatu e fa'atatau i o latou ala ma a latou amio, ae e te lē iloa o latou olaga poo la latou galuega. E te va'ai i mea o loo tutupu mai i lou lava manatu, ma ua ē sauni ai loa e fesiligia pe ta'uleagaina le ala ua latou filifilia, e aunoa ma lou auiliiliina ma le fa'amaoni o le mataupu i itu uma. E leai sou iloa i tiute o isi, ma e lē tatau ona ē manatu e fa'amasinoina oe mo a latou gaioiga, peita'i, fai lou lava tiute, ae tu'u isi tagata i le Ali'i. Ia tausii lo outou agaga i le onosa'i, ia fa'atumau le filemu ma le to'a lelei o le mafaufau, ma ia ē fa'afetai. . . .

“E te matuā tigā gofie, ma afai e tautalagia se upu e ta'uleleia ai se sini e ese mai i lea o loo ē mulimulita'ia, ua ē tigā. Ua ē lagona ua tu'ua'iina oe, ma e tatau ona ē puipuia oe, ma lavea'i lou ola; ma i lau taumafaiga finafinau ina ia lavea'iina lou ola, ua ē lē maua ai lou ola. Ua ia te oe se galuega e tatau ona ē faia ina ia ē oti ia te oe lava, ma ia fausiaina a'e se uiga o le fa'apalepale ma le onosa'i.” – *Testimonies for the Church*, vol. 2, p. 424.

“O i latou e faitioga ma ta'usesēina e le tasi le tasi, o loo latou talepeina poloa'iga a le Atua, ma o i latou o se mea inosia ia te Ia. Latou te lē alolofa i le Atua po'o o latou uso a tagata. Tuagane ma uso, ia tatou fa'amamā ese le lapisi o faitioga ma masalosologa ma muimuiga, ma aua e te maitaita gofie. O nisi e matuā a'afia gofie, o lea e lē mafai ai ona fa'amalamalamaina. Ia matuā faigofie ona vave lou lē fiafia e fa'atatau i le uiga tonu o le tausiiaina o le tulafono a le Atua, po'o ē tausii poo ē solia fo'i le tulafono. O le mea lenei o loo finagalo le Atua ina ia tatou ma'ale'ale gofie ai.” – *The SDA Bible Commentary* [E. G. White Comments], vol. 7, p. 937.

3. FOFŌINA O MATAUPU E LĒ FA'AMALIEINA AI

a. O le a se mea o loo tusia e fa'atatau ia i latou e alolofa i le tulafono a le Atua? Salamo 119:165.

“Fa’agalo le manatu e fa’apea e lē o sa’o le fa’aaogaina o oe, ma fa’apea ua ta’useseina oe, ma e i ai se tagata o loo mana’o na te maitauina oe pe fa’amanu’aliaina fo’i oe. O loo ē va’ai e ala atu i mata sese. E ta’ita’ia oe e Satani ina ia ē taliaina nei manatu fa’aseseina e fa’atatau i mea o loo tutupu.” – *Testimonies for the Church*, vol. 2, p. 424.

“O le lalolagi e fiafia i le agasala, ma inoino i le amiotonu, ma o le mafua’aga lenei o lona ita ia Iesu. O i latou uma lava e te’ena Lona alofa lē mafuatia, o le a latou manatu o le fa’akerisiano o se mea lea e fa’alavelaveina ai. O le malamalama o Keriso e tafieseina ai le pogisa o loo ufitia ai a latou agasala, ma o le mana’omia o le toe fuata’iga, ua fa’aalia. A’o amata ona fai taua i latou e gaua’i i le a’afiaga o le Agaga Paia, ia i latou lava, a’o i latou e pipi’i atu i le agasala, latou te fai taua atu i le upu moni ma i latou o loo fa’atusalia mai le upu moni.

“Ua fa’apena ona foafoaina fete’ena’iga, ma o so’o o Keriso ua tu’ua’iina e fa’apea o i latou o loo fa’atupu fa’alavelave i tagata. Peita’i, o le mafuta fa’atasi ma le Atua lea e aumaia ai ia i latou le faitaga’i ma le lalolagi. O loo latou tauaveina le tu’ua’iga o Keriso. O loo latou savalia le ala na savalia e Lē e silisili Lona amio lelei i le lalolagi. E lē o le fa’anoanoa, ae o le olioli, e tataua ona latou fetaia’i ai ma sauāga. O tofotofoga ta’itasi e pei o le a’fi, o le mea faigaluega lea a le Atua mo le fufuluina o i latou. O tofotofoga ta’itasi nei o loo saunia ai i latou mo la latou galuega o le ave ma tagata faigaluega fa’atasi ma Ia. O tauiviga ta’itasi e i ai lona nofoaga i le taua tele mo le amiotonu, ma o tauiviga ta’itasi fo’i nei, o le a fa’aopopo i le olioliga o lo latou manumalo mulimuli. O lo malamalama la i lenei sini, o le tofotofoga o lo latou fa’atuatua ma lo latou onosa’i, o le a taliaina ma le fiafia, ae lē o le fefe i ai ma ‘alo ese mai ai.” – *The Desire of Ages*, p. 306.

b. A agaleagaina moni lava i tatou i se tulaga fa’aitū’au, o le a se mea ua fa’amanatuina mai ia i tatou? Mataio 5:11, 12, 41; 1 Peteru 4:12-15.

“O Ia, o le Ulu fa’aleatua o le ekalesia, o le toa manumalo sili ona malosi, Na te finagalo e fa’asino atu Ona so’o i Lona soifuaga, i Ana galuega faigata, o Lona olaga fa’afitia e Ia o Ia lava, o Ana tauiviga, ma Ona puapuaga, e ala i le fa’atauemu, e ala i le te’ena o Ia, amusia, upu faifai, sauāina, inosiaina, o tu’ua’iga sese i le ala aga’i atu i luga i Kalevario i le va’aiga o le fa’asatauroga, ina ia fa’alototeleina ai i latou ia aga’i pea i luma i le tini, mo le fa’ailoga ma le tau i o le tagata manumalo. O le manumalo ua fa’amautinoa mai e ala i le fa’atuatua ma le usita’i. Ia tatou fa’atatauina ma fa’atinoina loa upu a Keriso i o tatou lava olaga ta’ito’atasi.” – *The Review and Herald*, July 24, 1888.

4. POTO MAI I LUGĀ

- a. **O le a le uiga muamua lava o le poto mai i le lagi – ma aisea e aogā tele ai lenei poto mo i tatou? Iakopo 3:17 (vaega muamua); Mataio 5:8.**

“O le a lē ulufale atu lava i totonu o le aai a le Atua se mea leaga. O i latou uma o le a nonofo ai iina, o le a mamā muamua o latou loto iinei. I totonu o lē o loo a’oga mai ia Iesu, o le a fa’aalia ai se inoino fa’atupulaia mo uiga fa’atautala lē fa’autauta, o gagana lē taupulea, ma manatunatuga lē mafaufau. A afio Keriso i totonu o le loto, o le a i ai le mamā ma le fa’aleleia atili o manatunatuga ma uiga.

“Peita’i o upu a Iesu, ‘Amuia ē e loto mamā,’ e i ai lona uiga e sili atu ona loloto – e lē na o le mamā i le uiga lea e malamalama ai le lalolagi i le mamā, a’o le sa’oloto mai i uiga o lagona o le tino, mamā mai i le tu’inanau, ae e moni lava i sini ma mafua’aga lilo o le loto, sa’oloto mai i le fa’amaualuga ma le sa’ili’ili o le tagata mo ia lava, ae agamalu, lē fa’apito, ma e fa’apei o se tamaitiiti.” – *Thoughts From the Mount of Blessing*, pp. 24, 25.

- b. **Fa’amatala poo le a la tatou autū e tatau ona i ai i la tatou sauniuniga mo Keriso. 1 Ioane 3:2, 3.**

“I lo tatou olaga i aso ta’itasi, tatou te iloa ai le lelei o le [Atua] ma Lona alofa mutimutivale i le fa’aaliga o Lana ta’ita’iga. Tatou te iloa o Ia i le amio a Lona Alo. E ave e le Agaga Paia le upu moni e fa’atatau i le Atua ma Lē na Ia auina mai, ma tatala atu i le malamalama’aga ma le loto. O ē e mamā o latou loto, latou te va’ai i le Atua i se so’otaga fou fa’apelepeleina, e ave ma o latou Fa’aola; ma a’o latou va’aia la le mamā ma le matagofie o Lana amio, latou te fa’anaunau ai ina ia latou lafoia atu Lona fa’atusa. Latou te va’ai ia te Ia e fa’apei o se Tamā o loo naunau e fusi atu i se atali’i ua salamō, ma o o latou loto ua fa’atumulia i le olioli e lē mafa’amatalaina ma tumu i le mamalu.

“O ē mamā o latou loto latou te iloa le Atua foafoa i galuega a Lona aao malosi, i mea matagofie o loo aofia uma i le iunivesa. I totonu o Lana upu tusia latou te faitauina ai i lona sili atu ona manino, le fa’aaliga o Lona alofa mutimutivale e umi ona puapuagatia, o Lona agalelei, ma Lona alofa tunoa. O upu moni o loo natia mai i ē popoto ma atamamai, o loo fa’aalia i pepe poo tama meamea. O le matagofie ma le tāua tele o upu moni ia e lē iloa e tagata popoto fa’alelalolagi, o loo fa’aalia i taimi uma lava ia i latou e i ai le fa’anaunauga talitonu fa’alagolago e fa’apei o se tamaitiiti, ina ia iloa ma ‘ia faia le finagalo o le Atua. Tatou te iloa le upu moni e ala i lo tatou tofusua i le natura fa’alelagi.

“O i latou e mamā o latou loto, latou te ola e peisea’i o loo latou i ai i luma tonu lava o le silafaga va’aia a le Atua i le taimi lea ua Ia foa’iina mai ia i latou i lenei lalolagi.” – *Ibid.*, pp. 26, 27.

5. UIGA TĀUA E SILI ATU ONA TELE

- a. **A mavae le uiga mamā, ta’u mai uiga e lima o loo soso’o mai o le potō na fanaua mai e le lagi – a aunoa ma le potō lea, ua lē aogā lo tatou a’afiaga. Iakopo 3:17 (vaega ogatotonu).**

“E te mana’omia le agalelei, fa’aaloalo, agamalu, ma le loto maulalo o Keriso. O loo ia te oe agava’a tāua e tele lava ia e mafai ona fa’aatoatoaina mo auunaga silisili lava, pe afai e fa’apaiaina i le Atua. E tatau ona ē lagonaina le tāua o lou fa’alatalata atu i lou au uso i le agalelei ma le fa’aaloalo, ae lē o le sauā ma le loto ma’a’a. E te lē o iloaina le manu’a e te faia e ala i lou uiga ita, fia pule ia i latou. O faifeau i le tou koneferenisi ua fa’avaivaia, ma leiloa ese atu ai le loto tele na latou ono maua pe ana ē tu’uina atu ia i latou le fa’aaloalo, agalelei, mautinoaga, ma le alofa. O lou uiga aga’i ia i latou, ua ē vavaeeseina ai loto o lou au uso mai ia te oe, o lea ua lē tele ai se a’afiaga o lau fautuaga ia i latou mo le lelei.” – *Christian Leadership*, pp. 6, 7.

“Afai e lē o taunu’u mea o loo ē mana’o e faia, o le a lamatiaina oe i lou fa’avaivai ma lē onosa’i, ma ē mana’o ai loa i se suiga. E tatau ona ē inoino i se uiga o le faitio, ma le tulei i lalo. Ia ē taumamao lava mai i mea uma e fa’aalia ai le uiga o le taufa’aleaga. E lē o fiafia mai le finagalo o le Atua mo lenei uiga i le maua i totonu o so’o se tasi o Ana auuna ua umi tausaga o lona iloa. E fetau mo se talavou, pe afai e fa’aofuina i le agamalu ma teuga i totonu, lona fa’aaliaina o le finafinau ma le vilivilita’i; peita’i a fa’aalia loa se vilivilita’i fa’ata’alaise ma se uiga taufa’aleaga e se talavou e na o ni nai tausaga itiiti lava le umi o lona iloa i le auunaga, e matuā lē fetau lava ma inosiaina. E leai se mea e mafai ona vave le fa’aumatiaina ai o lona a’afiaga, nai lo lenei. O le uiga agamalu, alofa agalelei, onosa’i, umi ona puapuagatia, e lē ita gofie, e onosa’i i mea uma, e fa’amoemoe i mea uma, e tumau onosa’i i mea uma – o fua nei o loo fua mai i luga o le la’au tāua tele o le alofa, lea e mai le lagi lona ulua’i tupu a’e. O lenei la’au, afai e fafagaina lelei, o le a fa’amaonia o se la’au e tumau le lanu meamata o ona lau i tau eseese uma lava. O ona lālā o le a lē pala, o ona lau o le a lē mamae. E ola e fa’avavau, e fuiina i taimi uma e matāua o le lagi.” – *Testimonies for the Church*, vol. 2, pp. 134, 135.

Aso Faraile

Novema 29

FESILI TOE FA’AMANATU

- 1. O a mea e tutupu o loo fa’aosoosoina ai a’u ina ia ou fa’amasino i mafua’aga o gaioiga a isi tagata, ma ou fa’aigoaina ai lo’u uiga fa’amasino o le va’ai fa’aleagaga?**
- 2. E fa’apefea ona solia poloa’iga a le Atua e le masaniga o le faitio i isi?**
- 3. A lafo loa aga’i mai ia te a’u uiga o’ona e oti ai, o le a se mea e tatau ona ou manatua?**
- 4. O le a le uiga o le “mamā i totonu o le loto”?**
- 5. E fa’apefea ona mafai ona ou maua le uiga fa’auo – e faigofie ona “fa’atauanauiina”?**

Taulaga Sapati Muamua mo le Nofoga Autū a le Iuni a Comombia

O Colombia o se malō lea i totonu o Amerika i Saute e sili atu ma le 51 miliona le faitauaofa'i o ona tagata. O pisinisi e aofia ai le suau'u, fausiaina o oloa, su'isu'iga eseese, fausaga o fale ma isi mea uma fa'apena, fa'atoaga, fale tupe, ma auaunaga. I le lotolotoi o le faitau aofa'i o tagata, e 73% e lotu Katoliko, 9.1% latou te lē lolotu i le tapua'iga fa'akerisiano, 6.9% o tagata tausī Aso La e lē aofia ai le Katoliko, 6.5% e leai ni a latou tapua'iga, 2.9% e lotu Porotisano, ma le 0.9% latou te fai mai e lē talitonu i le Atua. O leni tulaga o loo tu'uina mai ai se lu'i tele lava mo le ekalesia a le Atua iinei.

I tausaga e amata mai i le 1960, na taunu'u atu ai le feau a le agelu lona tolu i Colombia a'o puapuagatia le mālō i le pa'ū maulalo o le amio fa'aleagaga ona o le taua i le vā o vaega eseese o tagata. I le lotolotoi o lea fete'ena'iga, na matou ausia ai e tusa ma le 100 tagatā ekalesia i le tausaga e 1971 ina ua resitala aloa'ia le ekalesia. I nā aso sa to'aitiiti le aufaigaluega, peita'i e lē'i aveesea lava mai ia i latou le loto tele ma le vilivilita'i ina ia foa'i mea uma mo le galuega sa latou alolofa i ai. O le a matou fa'afetai pea mo le lagolago a faifeau o ē sa tu'ua o latou atunu'u ma o latou olaga filemu, ae o mai ma le olioli e lagolago le galuega i Colombia – ma tu'uina atoatoa mai i latou mo le fa'asalalauina o le fe'au iinei.

E ala i le alofa tunoa o le Atua, i le 2006, na fa'atuina ai loa le Iuni a Colombia, ma o le taimi leni ua tolu ona Matagaluega. O nofoaga tu totonu a la matou Iuni o loo i nofoaga mao tua o le itumalo o Barbosa, Santander.

O le auala e auauna ai i o tatou uso ma i latou ua fa'atupulaia lo latou naunau i le upu moni, ua matou va'aia ai se mana'oga i se taimi vave lava ina ia fa'atelēina fale o loo i ai i le taimi leni. O le taimi leni, e i ai le matou fa'ato'aga o loo i ai a matou ofisa, a'oga fa'amisionare ma le matagaluega o auala eseese o fa'asalalauga o loo fa'agaioia ai iinei. O iinei fo'i e fai ai fonotaga, semina, ma a'oa'oga fa'aleagaga mo a matou tagatā ekalesia ma i latou e fou lo latou naunau i le fe'au.

O se vaega o le galuega ua uma ona fausia i luga o leni eleele, ma o fale fa'aopopo o loo fausia i le taimi leni, peita'i, e leai sa matou tupe e fa'auma ai. O le mafua'aga lea ua matou ole atu ai i le agaga foa'i o le aigā ekalesia i le lalolagi. O le lagolago a ā outou taulaga foa'i ma le loto, o le a fa'atagaina ai i matou ina ia maua fale e sili atu ona fetau e auauna ai i tagata o lo o fia a'ai mo le iloa e fa'atatau i le Ali'i.

E ia i matou le agaga fa'afetai tele atu mo a outou foa'i. E na o le olaga e fa'avavau o le a mafai ona fa'ailoaina mai le tele o le lelei o le a faia e a outou tupe foa'i ma taulaga.

O ō outou uso ma tuafafine mai i le Iuni a Colombia

Lesona 10

Sapati, Tesema 7, 2024

Fa'ato'ilaloina o Ō Tatou Uiga Leaga

MAU TAULOTO: “O le mea lea ia outou gaua'i ai i le Atua, ia outou tete'e atu i le ti'apolo, ona sola ese ai lea o ia mai iā te outou” (Iakopo 4:7).

“O le alofa mo le upu moni mamā e fa’apaiaina ai, o le alofa mo le Fa’aola pele, o le a fa’amāmāina ai le galuega o le fa’amanumalōina.” – *Testimonies for the Church*, vol. 4, pp. 38.

Faitauga Fautuaina: *Testimonies for the Church*, vol. 3, pp. 39-47.

Ulua’i Aso

Tesema 1

1. UIGA LĒ FA’AITŪ’AU LĒ FA’APITO

- a. **Ta’u mai uiga mulimuli lava o loo ta’u mai i le lisi o le poto lea na fanau mai i le lagi. Iakopo 3:17 (vaega mulimuli).**

“Fai mai le aposetolo o Iuta: ‘Ia outou alofa atu i nisi, ma faia ai se suiga lelei.’ O lenei suiga lelei e lē tatau ona fa’atinoina i se uiga fa’aitū’au. E lē tatau ona ioeina ma fa’atagaina se uiga e foliga mai o loo fai atu: ‘Afai e te ‘au mai ia te a’u ma fa’asilia a’u, o le a ou lagolagoina fo’i oe.’ O le tulafono lē fa’apaiaina, fa’alelalolagi lenei, e lē finagalo i ai le Atua. O le fa’aitū’au ma le fa’aaloalo mo le mauaina mai o mea. O le fa’ailoaina lea o se uiga fa’aitū’au mo ni tagata fa’apitoa, ma manatu ai ia fa’amausaliina tofiga ma mea e maua mai e ala mai ia i latou. O le sa’ilia lea o lo latou lava lelei e ala i lo latou fa’amalieina tu’inanau o nei uiga, ina ia mafai ai ona sili atu le manatu o tagata ia i tatou nai lo isi ia e ta’uaogāina atoatoa e fa’apei o i tatou.” – *Testimonies for the Church*, vol. 4, pp. 221, 222.

“E lē o finagalo malie mai le Atua i le galuega paiē o loo faia i totonu o ekalesia. Na te finagalo i Ana auuana tausimea ina ia moni ma fa’amaoni i le tu’uina atu o a’oa’iga ma le fa’atonuga sa’o. E tatau ona latou tuliese le sese e tusa ai ma le tulafono ua tu’uina mai e le Atua i Lana Upu, ae lē tusa ai ma o latou lava manatu ma lagona oso. E lē tatau ona fa’aaogaina ni auala sauā, aua ne’i faia ni galuega fa’aitū’au, fa’ata’alise, e ala i lagona oso vale. O taumafaiga e faia ina ia fufuluina ai le ekalesia mai i le eleelea fa’aleagaga, e tatau ona faia i le auala a le Atua. E lē tatau ona i ai se uiga fa’aitū’au, e lē tatau ona i ai se uiga pepelo lē fa’amaoni. E lē tatau ona i ai ni tagata e fa’asilisiliina nai lo isi, o a latou agasala o loo manatu i ai e fa’apea e itiiti ifo lo latou leaga nai lo agasala a isi tagata. Oka, tatou te matuā mana’omia uma lava le papatisoga a le Agaga Paia. O le a tatou galulue loa i taimi uma lava ma le mafaufau o Keriso, ma le agalelei, mutimutivale, ma le alofa, ma fa’ailoa atu le alofa mo le tagata agasala a’o tatou inoino i le agasala i se inoino atoatoa.” – *The Ellen G. White 1888 Materials*, p. 144.

Aso Gafua

Tesema 2

2. FA’AILOA SA’O ATU KERISO

- a. **O le a le auala e tasi e mafai ona tatou fa’ailoa tonu atu ai Keriso i le tatou tautala? Iakopo 3:18.**

“E mafai ona tatou ta’utinoina Keriso i o latou laugutu, ae tatou te te’ena o Ia i a tatou upu. O fua o le Agaga ia e fa’aalia i le olaga, o se ta’utinoga lea o Ia. Afai ua tatou lafoa’ia mea uma mo Keriso, o ō tatou olaga o le a agamalū, o a tatou talanoaga o le a faia e fa’ata’atai i mea fa’alelagi, o a tatou amioga o le a lē ta’uleagaina. O le a’afiaga malosi o le upu moni e fa’amamāina ai, i totonu o le tagata, ma le amio a Keriso o loo fa’ata’ita’iina i le olaga, o se ta’utinoga lea o Ia. Afai ua lūlūina upu o le ola e fa’avavau i totonu o ō tatou loto, o fua fo’i, o le amiotonu lea ma le filemu. E mafai ona tatou fa’afitia Keriso i o tatou olaga e ala i le tatou tu’inanau sa’oloto i le fiafia i le fa’afifilemū poo le alofa fo’i o le tagata ia te ia lava, e ala i le fai tala ula ma le fai tala mālie fa’a’amu’amu, ma le sa’ilia o le mamalu o le lalolagi. E mafai ona tatou te’ena o Ia i o tatou foliga va’aia i fafo e ala i le liua atu i le lalolagi, e ala i foliga fa’amauualuga, poo ofu taugatā fo’i. E na o le mataala lava i taimi uma ma le vilivilita’i ma le tatalo e lē aunoa, o le a mafai ai e i tatou ona fa’ailoa atu i o tatou olaga le amio a Keriso poo le a’afiaga fo’i e fa’apaiaina ai, o le upu moni. E to’atele latou te tuliesea Keriso mai i o latou aiga e ala i se uiga ita lē onosa’i. O tagata fa’apenei e tatau ona latou manumalo i lenei uiga.” – *Testimonies for the Church*, vol. 1, pp. 303, 304.

b. O a uiga masani fa’aletagata e salalau atu i totonu o le olaga i aso ta’itasi, e mana’omia moni lava ina ia fa’ato’ilaloina – ma aisea fo’i? Iakopo 4:1-3.

“O se mea e fa’anoanoa ai, le lē fa’amalieina o i tatou i o tatou si’omaga poo mea fo’i e tutupu ua tu’uina ai i tatou i nofoaga e foliga mai ai, o ō tatou tiute e maualalo ma lē tāua. O tiute ta’ito’atasi ma le maualalo ia e lē o iloa atu e isi, e te inoino i ai; e te lē onosa’i, popole, ma lē fa’amalieina. O uiga uma lava nei, e puna a’e mai i le loto fa’apito. . . .

“O kerisiano ia e ta’utino mai o i latou o kerisiano, o loo faitio i taimi uma, ma e foliga mai latou te manatu o le fiafia ma se foliga fiafia o se agasala lea, e lē o ia i latou le talitonuga moni o le tapua’iga.” – *Ibid.*, vol. 3, p. 334.

“Afai e fa’aluaina le telē o le meaai ou te aina mai i lea taimi i lea taimi, ona ē manaia lona tofo, e fa’a’apefea ona mafai ona ou to’otuli ma aioi atu i le Atua ina ia fesoasoani mai ia te a’u i la’u galuega o le tusitusi, ona e lē’i mafai ona maua se manatu ona o lo’u tu’inanau i le so’ona ‘ai ma le inu? Na mafai ea ona ou ole atu i le Atua ina ‘ia Ia fesoasoani mai i lena avega lē tatau i lo’u manava? O lena olega o le a lē vi’ia ai o Ia. O lona uiga o le olega ina ia fa’amalieina ai lo’u tu’inanau o le ‘ai ua lē mafai ona pulea. O le taimi lenei ou te aina ai, tau lava o meaai ou te manatu e sa’o, ona mafai loa lea ona ou ole atu ia te Ia ina ia foa’i mai ia te a’u le malosi e fa’atino ai le galuega ua Ia foa’i mai ia te a’u ou te faia.” – *Ibid.*, vol. 2, p. 373, 374

“A pule loa le tapua’iga a Keriso i totonu o le loto, ua talia loa e le malosi o le mafaufau e iloa ai le lelei ma le leaga, ma ua pule loa le filemu ma le fiafia; o le atuatuvaale ma puapuaga atonu e si’omia mai, ae o loo i ai pea le malamalama i totonu o le loto.” – *Ibid.*, vol. 4, p. 47.

Aso Lua

Tesema 3

3. SOLA ESE MAI I MAILEI TA’ATELE

a. O le a le tapula'a autu e tāua tele i se so'otaga moni ma Keriso, i le fa'atusatusa atu i se fa'atuatua fa'afoliga e na ona fa'ataunu'uina i le igoa? Iakopo 4:4.

“O i latou e amataina lo latou olaga kerisiano i lo latou fa'a'afa'afa, o le a maua mulimuli lava ua latou fa'atasi atu i le itu a le fili, tusa lava po'o a, a latou ulua'i sini. Ma o le aveā ma tagata ua fulitua, o se tagata fa'alata i le galuega a le Atua, e sili atu lona leaga nai lo le oti; auā o lona uiga o lo latou lē mauaina lea o le ola e fa'avavau.

“O tane ma fafine ma tama'ita'i e fa'alotoloto lua, o uo sili nei a Satani. Tusa lava poo le a le lelei o ō latou manatu e fa'atatau ia i latou lava, o i latou lava o tagata pepelo. O i latou uma lava o loo fa'amaoni i le Atua ma le upu moni, e tataua ona tula'i mausali mo le upu moni auā e moni. O le amo fa'atasi ma i latou e lē o fa'apaiaina, ma fa'amaoni ai pea i le upu moni, e matuā lē mafai lava ona faia. E lē mafai ona tatou fa'atasi ma i latou o loo auauna ia i latou lava, ma galulue i fuafuaga fa'alelalolagi, ma lē leiloa ese ai la tatou so'otaga ma le Fautua fa'alelagi. E mafai ona tatou toe motusia ese mai i tatou mai i le mailei a le fili, peita'i ua tatou momomo ma manunu'a, ma o lo tatou olaga ma lo tatou iloa ua avilu.” – *The Review and Herald*, April 19, 1898.

b. Aisea e tataua ai ona tatou se'ieseina mausali a'e lagona ta'itasi uma aga'i i le fuā loto leaga? Iakopo 4:5, 6.

“O le uiga leaga tele e tasi i le amio a Saulo, o lona mana'o lea i le vi'iga. O lenei uiga sa i ai lona a'afiaga pule i ana gaioiga ma ona manatu; o mea uma lava, na iloga i lona fa'anaunauga mo le viiga ma le si'itiaina e ia o ia lava. O lana tapula'a o le sa'o ma le sese o le tapula'a maulalo lea o vi'iga ta'uta'ua lauiloa. E leai se tagata e saogalemu e ola ina 'ia ia fa'amalieina tagata, ae na te lē saili muamua mo le finagalo fiafia mai o le Atua.” – *Patriarchs and Prophets*, p. 650.

“O le fuā loto leaga na faia ai Saulo o se tagata fa'anoanoa, ma lamatia ai le ola o le auauna agamalu o lona nofoali'i. Oka le tele o manu'a lē mafaitaulia ua galuea'iina e lenei uiga leaga i totonu o lo tatou lalolagi! O le faitaga'i lava lea sa i totonu o le loto o Saulo, lea fo'i na osofia ai le loto o Kaino aga'i i lona uso o Apelu, auā o galuega a Apelu na amiotonu, ma sa fa'amamaluina o ia e le Atua, a'o ana lava galuega na leaga, ma e lē'i mafai ona fa'amanuia o ia e le Atua. O le fuā loto leaga e fanau mai i le fa'amaualuga, ma afai e manatunatu i ai i totonu o le loto, o le a ta'ita'ia atu ai i le ita, ma i'u atu ai loa i le tauimasui ma le fasioti tagata.” – *Ibid.*, p. 651.

“O le gaua'i, alofa, ma le agaga fa'afetai i le Atua, e fa'atumauina ai le susulu o le la i totonu o le loto, e ui lava ina puaoa atoa le aso. O le fa'afitia e le tagata o ia lava ma le maliu o Keriso ua i ai nei i ou luma. O le a ē si'itiaina ea le satauro?” – *Testimonies for the Church*, vol. 4, p. 47.

Aso Lulu

Tesema 4

4. VA'AI TOTO'A LELEI MA LE GAUA'I

a. O le a le vaega tāua e aumaia ai ia i tatou se manumalo moni e tumau i totonu ia Keriso? Iakopo 4:7.

“O nisi latou te lagonaina lo latou mana’omia o le Togiola, ma o lo latou iloaina la o lenei mana’oga, ma se fa’anaunauga mo se liuaga o le loto, e amata ai se tauiviga. O le lafoa’ia o ō latou lava loto, atonu o a latou sini filifilia o lo o alofa i ai o latou loto, poo mea fo’i o loo latou naunau i ai, e mana’omia ai se taumafaiga, lea e to’atele tagata e fa’alotolotolua ma tautevateva ai ma toe liliu ai i tua. Ae o lenei taua e tatau ona tauina e loto ta’itasi uma lava ua liua moni. E tatau ona tatou fai taua aga’i i fa’aosoosoga i fafo ma totonu. E tatau ona tatou mauaina le manumalo ia i tatou lava, fa’asatauro lagona o mea o loo alofa i ai le loto ma tu’inaunauga; ona amata ai lea o le fa’atasiga a le tagata ma Keriso. E fa’apei ona fa’apipi’iina atu le lālā mago e foliga mai ua mate, i le la’au ola, e fa’apea fo’i ona mafai ona avea i tatou ma lālā ola o le Vine moni. Ma o le fua na fuaina e Keriso, o le a fuaina mai fo’i e Ona so’o uma lava. A uma ona faia lenei fa’atasiga, e fa’ato’a mafai lava ona fa’atumauina e ala i le taumafaiga i taimi uma, ma le finafinau, mae’ae’a. E fa’aaoga e Keriso Lona mana ina ia fa’atumauina ma puipuia ai lenei so’otaga paia, ma o le tagata agasala e leai sona fesoasoani o loo fa’alagolago atu ia te Ia, e tatau ona fa’atinoina lana vaega i le malosi lē fa’avaivaia, a leai, o le a vavaeeseina o ia e Satani mai ia Keriso e ala i lona malosi sauā, faitogafiti.

“O kerisiano ta’itasi e tatau ona leoleo i taimi uma lava, ma mata’itū ai i faitoto’a uma o le loto e ono mafai ona ulufale mai ai Satani. E tatau ona ia tatalo mo le fesoasoani fa’alelagi ma tete’e atu ma le vilivilita’i i le taimi lava lea i lagona ta’itasi uma lava i le faia o le agasala. E ala i le loto tele, fa’atuatua, ma le galue finafinau malosi, e mafai ai ona ia manumalo. Peita’i ia manatua e ia, o le mauaina o le manumalo, e tatau ona afio Keriso i totonu ia te ia, ma ia fo’i i totonu ia Keriso.” – *Testimonies for the Church*, vol. 5, p. 47.

b. O fa’apefea ona toe tautalagia mai e Paulo le fa’amatalaga a Iakopo e fa’atatau i le malosi fa’aleagaga i totonu o le olaga kerisiano? Roma 6:6-11.

“O le mafaufau fa’alelalolagi, loto fa’apito, ma le mana’o matape’ape’a, ua aina’eseina le olaga fa’aleagaga ma le ola o tagata o le Atua.” – *Ibid.*, vol. 1, p. 141.

“Tatou te mana’omia le fa’atuatua e sili atu ona mausali ma le tu’uina atu atoatoa e sili atu ona vilivilita’i. Tatou te mana’omia ina ia tatou feoti ia i tatou lava, ma ia tatou fa’apelepeleina se alofa fa’anaunau i o tatou mafaufau ma o tatou loto, mo lo tatou Fa’aola. A tatou sa’ilia loa le Ali’i ma o tatou loto atoa, o le a tatou maua o Ia, ma o ō tatou loto o le a mū atoatoa i Lona alofa. O le tagata lava ia o le a goto ifo i le tulaga lē tāua, ma o Iesu o le a avea ma mea uma i le loto. . . .

“E tatau ona tatou fa’alatalata atu i le Atua. E tatau ona avea i tatou ma tagata faigaluega fa’atasi ma Ia, a leai, o le vaivai ma mea sese o le a va’aia i mea uma lava tatou te faia.” – *Ibid.*, vol. 6, p. 51.

Aso Tofi

Tesema 5

5. MALOLŌ MO TATALO FA’AUTAUTA

a. O le a le mautinoaga ma le olega e tatau ona toe tautala mai ia i tatou ta’ito’atasi i le taua e tete’e i o tatou lava uiga leaga? Kolose 3:1-3; Iakopo 4:8, 9.

“E matuā lē mafai lava mo so’o se tagata ona mafai ona ia iloa le upu moni a’o i ai lo latou alofa i le lalolagi. O le lalolagi e tū i le va o i latou ma le Atua, ma fa’anenefuina ai le va’ai ma fa’agaseina ai lagona i se tulaga leaga, o lea ua lē mafai ai ona latou iloa mea paia. Ua vala’au mai le Atua i tagata fa’apea: ‘Tagata agasala e, inā fa’amamā ia o outou lima, o outou e fa’alotolotolua e, inā fa’amamā ia o outou loto. Ia puapuagatia outou, ma ia fa’avauvau, ma fetagisi: ia liua ō outou ata’ata’ i le fa’avauvau, ma lo outou olioli i le fa’anoanoa.’ O i latou ua fa’aleagaina o latou lima i le agasala o le lalolagi, ua mana’omia i latou ina ia fufuluina i latou lava mai i lona leaga. O i latou e manatu e mafai ona latou auauna i le lalolagi ma alolofa pea i le Atua, e fa’alotolotolua i latou. Peita’i e lē mafai ona latou auauna i le Atua ma mamone. O i latou o tagata o mafaufau e lua, e alolofa i le lalolagi ma ua leiloa ese ai lo latou malamalama’aga atoa lava o lo latou tiute i le Atua, ae latou te ta’utino mai o i latou o so’o o Keriso. Latou te lē patino i le tasi poo le isi fo’i. O le a latou lē maua lalolagi uma e lua se’ivagana ua latou fufuluina o latou lima ma fa’amamā o latou loto e ala i le usita’i i tapula’a mamā o le upu moni.” – *Testimonies for the Church*, vol. 1, pp. 530, 531.

b. O le a le mea e tupu pe a tatou ifo i luma o le Atua i le loto maulalo? Salamo 34:18; 1 Peteru 5:6, 7.

“Afai e te fa’amaulaloina lou loto i le taimi lenei i luma o le Atua, ma fa’aalia ou sese, ma toe fo’i atu ia te Ia ma le finafinau atoatoa o lou loto, e mafai ona toe avea lou aiga o se aiga fiafia. Afai o le a ē lē faia lenei tulaga, ae ē filifilia lou lava ala, ua muta loa lou fiafia.” – *Ibid.*, vol. 2, p. 304.

Aso Faraile

Tesema 6

FESILI TOE FA’AMANATU

1. **O lo’u su’esu’eina loloto o faufauga o lo’u lava loto, o a vaega atonu o loo avea ai a’u ma tagata pepelo?**
2. **Ta’u mai nisi o auala o loo masani lava ona fa’auigaseseina ai Keriso e a tatou upu.**
3. **O le a le uiga o loo avea ai le fuā loto leaga o se fa’afitia leaga lea o le fa’atuatua – ma o se uiga lē migao i le Atua?**
4. **Aisea ou te mana’omia ai ina ia ou oti ia te a’u lava ina ia mafai ai ona ou ola i totonu ia Keriso?**
5. **E fa’apefea ona oto’oto mai e lenei lesona ni fa’afitauli moni lava ou te mana’omia ina ia ou manumalo ai?**

Filifilia O Se Manatu E Sili Atu Ona Agamalū

MAU TAULOTO: “Ia fa’amaualoina outou e outou lava i luma o le silafaga a le Alii, ona fa’amaualugaina ai lea o outou e Ia” (Iakopo 4:10).

“A tatou mulimuli i le ala agamalu o le usita’i, ua tatou tu’ua se ala pupula aga’i atu i le lagi mo isi e savavali ai. O lo tatou avanoa sili ona tāua lo tatou mauaina o se iloa sili atu ona loloto i mea a le Atua.” – *The Signs of the Times*, March 17, 1890.

Faitauga Fautuaina: *Testimonies for the Church*, vol. 2, pp. 41-44, 678-686.

Ulua’i Aso

Tesema 8

1. ALO ESE MAI I LE VA’AI FA’ALEAGAGA SESE

a. O le a le masaniga e matuā leaga lava e mana’omia ina ia tu’ueseina mai ia i latou uma lava o loo ta’utino mai e alolofa i lo latou au uso, ma aisea? Iakopo 4:11, 12.

“E lē tatau ona faia o se mea māmā le tautala taufa’aleaga e fa’atatau i isi poo le faia fo’i o i tatou ma fa’amasino i a latou sini poo gaioiga fo’i.” – *Patriarchs and Prophets*, p. 385.

“O le tāua moni lava o le amio lelei, na te lē sa’ili e faia se nofoaga mo ia lava e ala i lona manatunatu ma tautala i mea leaga, e ala i lona ta’ufa’atauva’aina o isi. O le loto anovale loto leaga uma, o le fuā uma, o le tautala i mea leaga uma, ma le lē talitonu uma, e tatau ona tu’ueseina uma mai i le fanau a le Atua.” – *Our High Calling*, p. 234.

“O se taumafaiga finafinau lava e tatau ona faia i totonu o ekalesia ta’itasi uma, ina ia tu’ueseina le tautala taufa’aleaga ma se uiga faitio auā o nisi nei o agasala e fa’atupulaia ai mea leaga sili ona mata’utia i totonu o le ekalesia. O le sauā ma le sa’ili’ili masei, e tatau ona a’oa’iina o galuega ia a Satani. O le alofa o le tasi i le tasi ma le mautinoaga, e tatau ona fa’alototeleina ma fa’amalosia i totonu o tagata o le ekalesia. Ia tapunia e i latou uma lava e matata’u i le Atua ma alolofa i lo latou au uso, o latou taliga i muimuiga ma faitioga. Ia fa’asino atu le tagata fela’ula’ua’itala i a’oa’oga a le upu a le Atua. Fa’atonu atu ia te ia ina ia usita’i i upu o le Tusi Paia, ma ia alu e ave tu’usa’o lava ana faitioga ia i latou o loo ia manatu o loo sese. O lenei gaioiga tu’ufa’atasia o le a aumaia ai se lolo o le malamalama i totonu o le ekalesia ma tapuni atu ai le faitoto’a i se lolo o le agasala. O le a fa’apena ona fa’amamaluina ma vi’ia le Atua, ma e to’atele tagata o le a lavea’iina.” – *Testimonies for the Church*, vol. 5, pp. 609, 610.

Aso Gafua

Tesema 9

2. TALIAINA FA’AMAONI O LE MALAMALAMA

a. A faia fuafuaga, o le a se mea tatou te mana'omia i taimi uma ina ia tatou manatua? Salamo 16:8; Iakopo 4:10, 13-16.

“Ia tu'uina atu atoatoa oe i le Atua i le taeao; ia ē faia lenei ma au galuega muamua lava. Ia fa'apea lau tatalo, 'Ia Ē aveina atu a'u, le Alii e, ia faia atoatoa mo Oe. Ou te folasia atu a'u fuafuaga uma lava i Ou aao. Ia Ē fa'aaogaina a'u i le aso lenei i Lau auaunaga. Ia Ē fa'atasi mai ia te a'u, ma ia faia a'u galuega uma lava i totonu ia te Oe.' O se galuega lenei o aso ta'itasi. O taeao ta'itasi ia tu'uina atoatoa atu oe i le Atua mo lena aso. Ia ē gaua'iina atu au fuafuaga uma lava ia te Ia, ina ia fa'ataunu'uina pe lafoa'iina fo'i e fa'apei ona fa'aailoa mai e Lana ta'ita'iga. E fa'apena ona mafai ona ē tu'uina atu lou ola i aao o le Atua i aso ta'itasi, ma o le a fa'apena ona atili fafauina ai pea lou olaga ia fa'apei o le soifuaga o Keriso.” – *Steps to Christ*, p. 70.

b. Fa'amatala le matafaioi taua tele ma le tiute tatou te tali ta'ito'atasi atu ai mo le malamalama fa'alelagi ua foa'iina mai ia i tatou i vaega uma lava o le olaga. Iakopo 4:17; Mataio 12:31, 32.

“E lē o le Atua lea e fa'atauasoina mata o tagata pe fa'ama'a'aina fo'i o latou loto. Na te auina mai ia i latou le malamalama e fa'asa'o ai o latou sese, ma ta'ita'ia ai i latou i ala saogalemu; o le te'ena o lenei malamalama lea e fa'atauasoina ai mata ma fa'ama'a'aina ai le loto. O le fa'asologa e masani lava ona fai fai malie, ma e toeitiiti lava a lē iloa. O le malamalama e o'o mai i le tagata e ala mai i le upu a le Atua, e ala mai i Ana auauna, pe e ala mai fo'i i le musumusuga tu'usa'o a Lona Agaga; peitai, a lē amanaiaina loa le ave e tasi o le malamalama, ua i ai loa le vaega ua gase o le va'ai fa'aleagaga, ma o le fa'aaliga lona lua o le malamalama, ua itiiti ifo loa le manino o le malamalama i ai. O le pogisa la ua fa'atuputeleina, se'ia o'o ina ave ma po pogisa i totonu o le loto.” – *The Desire of Ages*, p. 322.

“E matuā mata'utia lava le tautalagia o se upu o le masalosalo, mata'utia le fesiligia ma le faitioina o le malamalama fa'alelagi. O le masaniga o le faitio lē fa'aeteete ma le lē migao, e toe tali mai i le amio, i le fafagaina o le lē migao ma le lē talitonu. O le to'atele o tagata o loo tu'inanau sa'oloto i lenei masaniga, ua aga'i atu pea i luma e aunoa ma lona iloa o le lamatiaga, se'ia o'o ina ia sauni e faitioina ma te'ena le galuega a le Agaga Paia.” – *Ibid.*, p. 323.

“A talanoa atu i tagata e fa'atatau i le mataupu o le soifua maloloina, e masani lava ona latou fai mai: 'E sili atu le tele o lo matou iloa nai lo mea o loo matou faia.' Latou te lē iloa e mana'omia i latou ina ia latou tali atu mo ave ta'itasi uma o le malamalama e fa'atatau i lo latou maloloina fa'aletino, ma o a latou masaniga ta'itasi uma lava o loo mātala atu i le au'ili'iliga a le Atua.” – *Testimonies for the Church*, vol. 6, p. 372.

Aso Lua

Tesema 10

3. O LE OA UA SO'ONA FA'ATELĒINA LONA TĀUA

a. O a lapata'iga ua tu'uina mai e fa'atatau i fa'aosoosoga o loo si'omia ai i latou ua fa'amanuiaina i oa fa'aleolaga nei e sili atu nai lo isi tagata? Iakopo 5:1.

“O faifeau e lē tatau ona latou fa’aaogaina upu fa’avi’ivi’i po’o lo latou fa’ailogaina fo’i o tagata. Sa i ai pea lava, ma o loo i ai pea lava i le taimi lenei, le lamatiaga tele lava o le sese ai iinei, o le faia lea o se eseesea itiiti i tagata mauoa, poo le fa’avi’ivi’iina fo’i o i latou e ala i le so’ona fa’atāuaina o i latou, pe afai e lē faia i upu. O loo i ai lamatiaga o le ‘manatu maualuga i tagata’ mo mea e maua mai, peita’i o le faia o lenei tulaga, ua lamatia ai o latou ola e fa’avavau. O le faifeau atonu o ia e sili ona fiafia i ai se tagata mauoa, ma atonu e matuā loto foa’i lava le tagata mauoa ia te ia; o lenei tulaga e fa’amalieina ai le faifeau, ma faapena ona ia sasa’a atu ai vi’iga i le loto foa’i o lē o loo foa’i mai ia te ia. O lona igoa atonu e fa’avi’ivi’iina e ala i le tusia mai i totonu o tusitusiga, a’o lena tagata loto foa’i atonu e matuā lē ta’uaogāina lava i le vi’iga ua tu’uina atu ia te ia. O lona loto foa’i e lē’i osofia a’e i se tapula’a loloto ola, ina ia faia mea lelei i ana oa, ina ia tauaveina ai i luma le galuega a le Atua ona na te fa’atāuaina, peita’i na osofia lona loto foa’i mai i se mafua’aga fa’apito, o se naunauta’iga ina ia manatu tagata o ia o se tagata loto foa’i. Atonu na ia foa’i mai i sona lagona oso, ma o lona loto foa’i e leai sona tapula’a loloto. Atonu na osofia o ia e ala i lona fa’alogo i upu moni e fafaguina ai, lea na osofia ai lona loto foa’i i lea taimi; ae e ui i lea, o lona agaga foa’i e le’i i ai sona sini e sili atu ona loloto. Na te foa’i i se lagona oso fa’afuase’i; o lana ato tupe e mātala fa’afuase’i ma tapuni mausali fa’afuase’i fo’i. E lē tatau mo ia ni upu fa’avi’ivi’i, auā o ia o se tagata lima mau i le uiga atoa lava o le upu, ma, se’ivagana ua ia liua mae’ae’a, i lana ato tupe ma mea uma, o le a ia fa’alogoina le fa’asalaga fa’alumaina: ‘Ia o atu ia outou, o ē e tamaoauga, ia outou fetagisi ma uiō ona o puapuaga o le a o’o mai ia te outou. Ua pala la outou oloa, ua atiatia fo’i o outou ofu e mogamoga.’ O tagata fa’apea o le a ala mulimuli mai i se fa’aseseēga mata’utia o i latou, e i latou lava. O i latou na fa’avi’ivi’i i a latou foa’i ia sa faia fa’afuase’i i nisi o taimi, na latou fesoasoani ia Satani e fa’asesē i tagata ma faia ai i latou ina ia latou manatu o i latou o ni tagata matuā loto foa’i lava, ma fa’asatauroina e i latou i latou lava, peita’i latou te lē’i iloa tapula’a muamua lava o le sa’olotoga poo le fa’asatauroina fo’i e le tagata o ia lava.” – *Testimonies for the Church*, vol. 1, pp. 475, 476.

b. E fa’apefea ona tatau ona tatou fa’aleleia atili o tatou matafaioi sili ona tāua e fa’atatau i tupe? Fa’ata’oto 11:4.

“O le fa’atinoina o le loto foa’i, e fa’atelēina ma fa’amalosia ai i taimi uma lava, se’ia o’o ina avea ma tapula’a ma pule ai loa i totonu o le tagata. E matuā mata’utia lava le leaga i le olaga fa’aleagaga, le fa’atagaina o le loto fa’apito ma le mana’o matape’ape’a o se avanoa e sili ona itiiti i totonu o le loto.” – *Ibid.*, vol. 3, pp. 548, 549.

Aso Lulu

Tesema 11

4. LAFOA’IINA O LE TUPUA

a. O le a le mea o loo masani lava ona avea ma mafua’aga e ala ai ona maua e tagata oa? Iakopo 5:2 (vaega muamua).

“I lenei tupulaga, o le fa’anaunauga mo le mauaina mai o oa, o le fa’anaunauga lea e alu uma i ai le loto. O le tamaoaiga e masani lava ona maua mai e ala i auala pepelo. O loo i ai le tele o tagata o loo tauivi ma le mativa, o loo fa’amalosia e galulue malosi mo totogi laiti, e lē mafai ona latou maua mea e tatau mo le ola. O le galue i galuega mamafa ma le fia ‘ai lē tago lima, fa’atasi ai ma le leai o se fa’amoemoe o se olaga e sili atu, ua atili mamafa ai le latou avega. O le popolevale ma le fa’apologaina, latou te lē iloa ai poo fea latou te liliu i ai mo le fesoasoani. Ma o nei mafatiaga uma ina ia mafai ai e tagata mauoa ona lagolago lo latou olaga fa’atautala so’ona fai poo le so’ona fa’amalieina fo’i o lo latou fa’anaunauga ina ia fa’aputu le ola!

“O le mana’o i le tupe ma le fiasia i le fa’alialiavale ua faia ai lenei lalolagi o se ana o ē gaoi ma ē fao mea. O le Tusi Paia ua ia fa’aatina mai le mana’o tele ma le fa’apologaina o tagata, lea o le a ta’atele i le taimi e soso’o tonu lava ma le toe afio fa’alua mai o Keriso.” – *Prophets and Kings*, pp. 650, 651.

b. O le a se mea o loo fa’aosofia ai le naunau o le tele o tagata o le lalolagi i le taimi lenei – ma o le a le olega e mana’omia ia tu’uina atu ia i latou o loo una’iina e lenei sini? 1 Timoteo 6:9, 10; Teuteronomie 8:18, 19.

“E lē fa’asalaina e le Tusi Paia se tagata ona o lona mauoa, pe afai na ia mauaina ana oa i auala fa’amaoni. E lē o le tupe, peita’i o le mana’o i le tupe, o le a’a lea o mea leaga uma. O le Atua Na te foa’i mai i tagata le malosi e maua mai ai le tamaoaiga; ma, i lima o lē o loo galue i le avega o ia ma auuuna tausimega a le Atua, i le fa’aaogaina o ana oa ma le lē fa’apito, o le tamaoaiga o se fa’amanuiaga lea, i lē e ona le oa, ma le lalolagi fo’i. Peita’i o le to’atele o tagata, o le mitiia o ō latou mafaufau i o latou fa’anaunauga i oa fa’alelalolagi, ua latou lē iloa ai mana’oga o le Atua ma o latou uso a tagata. Ua latou manatu o lo latou tamaoaiga o se auala lea o le vi’ia o i latou lava. Ua latou fa’aopoopo lea fale i lea fale, ma lea eleele i lea eleele; ua latou fa’atumuina o latou fale i mea taugatā e lē mana’omia, a’o loo si’omia i latou e tagata o loo i le malaia ma le solitulafono, i ma’i ma le oti. O i latou o loo fa’apena ona tu’uina atu o latou ola i le auuuna ia i latou lava, o loo latou fausiaina a’e i totonu ia i latou lava, e lē o uiga o le Atua, a’o uiga o le ti’apolo amio leaga.

“O nei tane o loo latou mana’omia le tala lelei. Latou te mana’omia e liliu ese atu o latou mata mai i le fa’alialiavale o mea fa’aletino ina ia latou va’aia le tāua tele o oa e tumau.

...
“O nisi e agava’a fa’apitoa lava e galulue mo vasega e sili atu ona maualuga. O i latou nei e tatau ona latou sa’ilia le poto mai i le Atua ina ia latou iloa ai pe fa’apefea ona latou a’apa atu i nei tagata, ina ia lē gata ina latou masani ma i latou, peita’i, e ala i taumafaiga a le tagata lava ia ma le fa’atuatua ola, ina ia fafaguina ai i latou i mana’oga o le agaga, ina ia ta’ita’ia i latou i se iloa e fa’atatau i le upu moni e fa’apei ona i ai i totonu ia Iesu.” – *The Ministry of Healing*, pp. 212, 213.

Aso Tofi

Tesema 12

5. VA’AVA’AI I TUA ATU O OA FA’ALETINO

a. Fa'amatala le i'uga o mea e maua mai i auala taufa'asese. Iakopo 5:2 (vaega mulimuli)

“O le mauaina o le oa e ala i auala lē tonu, e ala i le taufa'asesē i fefa'ataua'iga, e ala i le fa'apologaina o le fafine ua oti lana tane ma ē ua matua oti, poo le fa'aputuina fo'i o oa ma fa'atalalē ai i mana'oga o ē matitiva, o le a i'u mulimuli ina aumaia ai le tau tonu lea ua fa'amatalaina mai e le aposetolo na musuia e le Agaga Paia.” – *Testimonies for the Church*, vol. 2, p. 682.

b. O le a le feau fa'apitoa a le Atua e fa'atatau i oa? 1 Timoteo 6:17-19.

“O le so'o o Keriso e sili ona agamalū ma sili ona mativa, o loo mauoa i galuega lelei, e sili atu ona fa'amanuaina ma sili atu ona tāua o ia i le silafaga a le Atua nai lo tane o loo tautalatala e fa'atatau i a latou oa e tele. E sili atu ona fa'amamaluina i latou i lotoā o le lagi nai lo tupu ma alii e sili ona fa'amamaluina, o ē e lē o mauoa i le Atua. . . .

“O i latou e fa'aputuina oa pe e teu fa'afaigaluega fo'i se vaega tele lava i eleele, ae latou te lē tu'uina atu i o latou aiga mea e aoga o le olaga, o loo latou gai oi e fa'apei o tane ua valelea. Latou te lē fa'atagaina o latou aiga e olioli i mea ua matuā foa'iina taumasuasua atu e le Atua ia i latou. E ui lava ina tetele a latou meatotino, a'o o latou aiga o loo masani lava ona una'iina ina ia galulue i le tulaga e matuā sili atu nai lo latou malosia ina ia teu ai ni tupe e sili atu ona tele ina ia fa'aputuina. O le fai'ai, ivi, ma maso ua matuā fa'afaigaluegaina ina ia fa'aputu, ma o le tapuaiga ma tiute fa'akerisiano ua fa'atalalē i ai. Galue, galue, galue, o le fa'anaunauga lea e amata mai i le taeao e o'o i le po.

“E to'atele latou te lē fa'aalia se naunauta'iga finafinau ina ia su'esu'e ia latou iloa le finagalo o le Atua ma ia malamalama i Ona mana'oga i luga ia i latou. O nisi o ē e taumafai e a'oa'oa atu le upu moni i isi, latou te lē usiusita'i i latou lava i le upu a le Atua. O le sili atu o le to'atele o faia'oga fa'apea e i ai i le galuega a le Atua, o le itiiti ifo fo'i lea o le manuia o le a i ai.” – *Ibid.*, pp. 682, 683.

Aso Faraile

Tesema 13

FESILI TOE FA'AMANATU

- 1. Afai ou te manatuntu i sese o isi, o le a le mea o loo o'u faia?**
- 2. Fa'amatala pe o fa'apefea ona tatou fa'atigā i le Agaga Paia pe a tatou lē amanaia le malamalama mai i le lagi.**
- 3. E fa'apefea ona mafai ona maileia tagata mauoa ma a latou faifeau?**
- 4. Aisea ua fa'atuputeleina ai le mana'o matape'ape'a ma aisea e tatau ai ona tatou matuā alo ese mai ai i le taimi lenei nai lo se isi lava taimi?**
- 5. Fa'amatala le matagofie ma le aogā o le agamalu i totonu ia Keriso.**

Taula'i i le Lagi

MAU TAULOTO: “Ia onosa’i fo’i outou; ia fa’atumauiina o outou loto: auā ua latalata le afio mai o le Ali’i.” (Iakopo 5:8).

“E te mana’omia ina ia ē ofu i taimi uma lava i le amiotonu a Keriso. E te mana’omia ina ia ē manatua o oe o le atalii ma le afafine o le Atua, ma e tatau ona ia te oe [se] uiga alofa, agalelei, ma le onosa’i. Ia ē va’ai toto’a ina ia aua ne’i i ai le alofa fa’apito ma le mana’o matape’ape’a i totonu o lou loto.” – *Manuscript Releases*, vol. 13, p. 288.

Faitauga Fautuaina: *Early Writings*, pp. 72, 73.

Ulua’i Aso

Tesema 15

1. TAIMI MO LE TOE ILOILOGA

a. O le a le mea o le a lē umi ae tupu loa i oa o loo matuā fa’atāuaina lava ma e masani lava ona mana’o i ai talu mai aso anamua – ma o le a se mea e tatau ona fa’amanatu mai e lenei tulaga ia i tatou? Isaia 31:6, 7.

“O le mana’o fa’apito i le tupe lea e fa’aaoga sese, o le a’ a lea o mea leaga uma. O le tamaoauga o le a fa’amaonia o se fa’amanuiaga pe afai tatou te manatu i ai o mea ia a le Atua, ina ia talia ma le fa’afetai, ma ia toe fa’afo’i atu ma le fa’afetai i Lē na foa’iina mai.

“Peita’i, o le a le aogā o oa lē mafaitaulia pe afai e fa’aputuina i fale taugatā poo teugā tupe fo’i i fale tupe? O le a le aogā o nei mea e fa’atusatusa atu i le fa’aolataga o le tagata e to’atasi na maliu ai le Alo o le Atua-lē mafuatia?” – *Testimonies for the Church*, vol. 6, p. 453.

“O i latou e filifili e faia alofaga ma fa’aauau ai pea lo latou agasala ma lo latou liua atu i le lalolagi, o le a tu’ua i latou i a latou tupua. . . . A afio mai loa Keriso i Lona mamalu ma le mamalu o Lona Tamā, fa’atasi ai ma agelu uma o le lagi o loo si’omiaina o Ia, o loo fa’afeaoina mai o Ia i Lona afio mai ma leo o le manumalo, a’o fa’alogoina leo o musika sili ona matagofie, o tagata uma o le a naunau i ai i le taimi lea; o le a leai se tagata e to’atasi e lē fia fa’alogo pe lē fia va’ai i ai. O fa’amatalaga taumatemate o le faitala, o le a lē fa’atumulia ai le agaga i le taimi lena. O fa’aputugā auro a le tagata fa’aputu oa, lea sa tu’inanau i ai ona mata, ua lē toe tāua nei i le va’ai. O maota fa’atupu na fausia e tane fa’amaualuluga o le lalolagi, ma sa avea ma a latou tupua, ua latou liliu ese mai ai nei ma le ita ma le inoino.” – *Ibid.*, vol. 2, p. 41.

Aso Gafua

Tesema 16

2. MANŪ E LE’I TUAI . . .

- a. **O fa’apefea ona fa’aatina mai e le Tusi Paia i latou e leiloa ese atu lo latou avanoa latou te vi’ia ai le Atua i a latou meatotino, ona o lo latou fa’atuai? Hosea 4:17; Mataio 25:11, 12.**
- b. **Fa’amatala le i’uga mulimuli lava o i latou uma lava – e aofia ai i latou e ta’utinoina le upu moni mo le taimi lenei – e pipi’i atu ma le loto fa’apito i a latou oa fa’aletino. Iakopo 5:3.**

“[Iakopo 5:1-3] Na ou va’aia o nei upu mata’utia, e fa’ataua fa’apitoa lava i tagata mauoa ia e ta’utino mai e talitonu i le upu moni mo le taimi lenei. Ua vala’au le Alii ia i latou ina ia fa’aaoga a latou oa ina ia tauave ai i luma Lana galuega. O avanoa ua tu’uina atu nei ia i latou, peita’i latou te moe’i’ini o latou mata i mana’oga o le galuega, ma latou pipi’i mau atu i a latou oa fa’alelalolagi. O lo latou alofa mo le lalolagi, e sili atu nai lo lo latou alofa mo le upu moni, po’o lo latou alofa mo o latou uso a tagata, po’o lo latou alofa fo’i mo le Atua. Na te vala’au mo a latou mea totino, peita’i latou te taofia ma le fa’apito, mana’o matape’ape’a, mea ia ua latou maua. Latou te foa’i se vaega itiiti i lea taimi ma lea taimi ina ia fa’afilemuina ai lo latou malamalama’aga e iloa ai le lelei ma le leaga, peita’i latou te lē’i fa’ato’ilaloina lo latou mana’o mo lenei lalolagi. Latou te lē fa’asatauroina e i latou i latou lava mo le Atua. Ua fa’atuina a’e e le Atua isi tagata o ē e fa’atāuaina le ola e fa’avavau, ma e mafai ona latou lagonaina ma iloa se mea e fa’ataua i le tāua o le tagata, ma ua latou foa’iina sa’oloto atu a latou oa e tauave ai i luma le galuega a le Atua. O le galuega ua aga’i ina tapunia nei; ma e lē o toe umi, o oa a i latou ia sa taofia a latou oa, ma a latou fa’ato’aga tetele, ma a latou manu, ma isi mea, o le a lē mana’omia. Na ou va’aia o liliu atu le Alii ma le ita i tagata fa’apea, i le to’asa, ma toe fetalai atu pea upu nei: ‘Ia o atu ia outou, o ē e tamaoaiga.’ Ua Ia vala’au, ae tou te lē fia fa’alogo. O le mana’o i lenei lalolagi ua lē lagona ai Lona si’ufofoga. O lenei ua lē aogā o Ia ia te outou, ma ua Ia tu’uina atu outou tou te o, ma fa’atonu atu: ‘Ia o atu ia outou, o ē e tamaoaiga.’

“Oka, na ou va’aia o se mea mata’utia tele le lafoa’iina fa’apena e le Alii – o se mea mata’utia tele le taofi mau atu i se mea e pala iinei, ae o lea sa Ia fetalai mai, afai tatou te manana’o e fa’atau atu ma foa’i atu meaalofa, e mafai ona tatou teuina oa i le lagi. Na fa’aילוaina mai ia te a’u, a’o aga’i ina fa’amutalia le galuega, ma ua aga’i atu i luma le upu moni i le mana mata’utia, o nei tane mauoa o le a latou aumaia a latou oa ma ta’atitia i vae o auauna a le Atua, ma aoi atu ia i latou ina ia latou talia a latou oa. O le tali o le a tu’uina atu e auauna a le Atua e fa’apea: ‘Ia o atu ia outou, o ē e tamaoaiga. O a outou oa e lē mana’omia. Na outou taofia a outou oa i le taimi a’o mafai ona outou faia ai se galuega lelei i le tauaveina i luma o le galuega a le Atua. O tagata mafatia ma matitiva sa puapuagatia; e lē’i fa’amanuiaina i latou i a outou oa. O le a lē taliaina e le Atua a outou oa i le taimi lenei. Ia o atu ia outou, o ē e tamaoaiga.’” – *Testimonies for the Church*, vol. 1, pp. 174, 175.

Aso Lua

Tesema 17

3. A’OA’OINA O LE TULAFONO FA’A’AURO

a. O le a le uiga e masani ona faia e tagata mauoa i tagata latou te fa'afaigaluegaina – pe fa'atau fo'i mai ia i latou – ma o le a se mea e tatau ona tatou teuina i taimi uma i o tatou mafaufau? Iakopo 5:4-6; Mataio 7:12.

“O le Atua, e lē o i ai i le oa uma o loo maua mai. O Satani e masani lava ona sili atu ona tele lona a'afiaga i le mauaina mai o meatotino nai lo le Atua. O le tele o le oa lenei e maua mai e ala i le fa'apologaina o le tagata faigaluega i ona totogi. O le tagata mauoa mana'o matape'ape'a fa'alenua, na te maua mai ana oa e ala i lona fa'apologaina o tagata faigaluega, ma ia fa'aaogaina ai tagata ta'itasi i so'o se auala lava na te mafai ai, ma fa'apena ona ia fa'aopoopo atu ai i se oa lea o le a ainaina lona tino e peisea'i o se afi.

“O se ala matuā fa'amaoni ma le fa'amamaluina, e lē'i uia e nisi. O tagata fa'apea e tatau ona latou uia se ala e matuā ese lava, ma galulue fa'ata'alise ina ia toe fa'asa'o o latou uiga. E to'atele tagata tausī Sapatī o loo sese ai iinei. Ua latou fa'aaogaina o latou uso matitiva mo le maua mai ai o a latou oa, ma o i latou e tele a latou oa, ua latou manana'o fa'amalosi i tupe e sili atu nai lo le tau moni o meatotino, e sili atu nai lo le tau latou te manana'o e fa'atau mai ai meatotino lava ia, a'o nei lava uso o loo fa'alumaina ma mafatia ona o le leai o ni tupe. O loo silafia e le Atua nei mea uma lava. O gaioiga fa'apito ta'itasi uma lava, o uiga pule fa'amalosi matape'ape'a ta'itasi uma lava, o le a ia aumaia lona lava tauī.

“Na ou va'aia, e sauā, ma lē tonu, le lē manatunatu lelei mo le tulaga o loo i ai se uso. Afai o loo mafatia o ia, pe mativa fo'i, ae o loo ia faia le mea sili na te mafaia, e tatau ona faia se pa'ū mo ia, ma e o'o lava i le tau atoa o mea e mafai ona ia fa'atauina mai i tagata mauoa, e lē tatau ona fa'amalosi; ae e tatau ona tumu i latou i le alofa mutimutivale mo ia. O le a talia e le Atua gaioiga agalelei fa'apea, ma o lē o loo agalelei atu, o le a ia maua lona tauī. Peita'i o se fa'amaumauga mata'utia o loo tula'i i igoa o le to'atele o tagata tausī Sapatī mo gaioiga manatu pumo'omo'o, mana'o matape'ape'a.” – *Testimonies for the Church*, vol. 1, pp. 175, 176.

b. I ulua'i taimi, na fa'apefea ona fetufaa'i sa'oloto le au talitonu? 2 Korinito 8:1, 2.

“Na fa'asinoina a'u i tua i se taimi sa to'aitiiti ai i latou na fa'alogo ma taliaina le upu moni. E lē'i tele ni a latou oa o lenei lalolagi. O mana'oga o le galuega na vaevaeina i le lotolotoi o le au talitonu to'aitiiti lava. Ona mana'omia lea o nisi e fa'atauina atu o latou fale ma eleele, ma latou toe fa'atau mai ai se fale e sili atu ona taugofie e fai ma ō latou malutaga, poo so latou fale, a'o tu'uina sa'oloto atu ma le loto foa'i a latou tupe i le Alii, e lomina ma fa'asalalau fa'alaua'itele ai le upu moni, ma fesoasoani ai i le tauaveina i luma o le galuega a le Atua. A'o o'u va'ai atu i nei tagata fa'asatauroina e i latou i latou lava, na ou va'aia sa latou onosa'ia le mativa mo le lelei o le galuega. Na ou va'aia se agelu o tula'i i o latou tafatafa, ma fa'asino a'e i latou i luga, ma fa'apea atu: ‘O loo ia te outou taga oa e tele i le lagi! O loo ia te outou taga i le lagi e lē pala lava! Onosa'i se'ia o'o i le i'uga, ma o le a tele lo outou tauī.’” – *Ibid.*, p. 176.

4. O SE UIGA E AOGĀ MO LE TAIMI LENEI

a. I le fausiaina a'e o a tatou amio, aisea e matuā tāua tele ai le onosa'i? Iakopo 5:7.

“ ‘E fa’atali lē galue fanua i le fua aogā o le eleele, e fa’atalitali i ai, se’ia maua le uaga muamua ma le uaga mulimuli.’ Iakopo 5:7. E fa’apea fo’i ona tataua ona fa’atali ma le onosa’i le kerisiano mo le fua o le upu a le Atua i lona olaga. E masani lava, a tatou tatalo mo alofa tunoa a le Agaga, e galue le Atua ina ia tali mai a tatou tatalo e ala i Lona tu’uina o i tatou i totonu o mea e tutupu ina ia fausiaina a’e ai nei fua; peita’i tatou te lē malamalama i Lana sini, ma tatou tau manatunatu ai, ma tatou matata’u. Peitai e leai se tagata e mafai ona fausiaina a’e nei alofa tunoa, se’ivagana ua faia e ala atu i la’asaga o le tuputupu a’e ma le fuaina mai o fua. O la tatou vaega o le taliaina lea o le upu a le Atua ma taofi mau i ai, ma tatou gaua’i atoatoa atu i Lana puleaga, ma o Lana sini i totonu ia i tatou, o le a fa’ataunu’uina.

“ ‘Afai e alofa mai se tagata ia te A’u,’ o le fetalaiga lea a Keriso, ‘o le a ia tausia A’u upu; o le a alofa fo’i Lo’u Tamā ia te ia, o le a o mai fo’i i Mā’ua ia te ia, ma nonofo fa’atasi ma ia.’ Ioane 14:23. O le puleaga a Lē e sili atu ona malosi, o se mafaufau atoatoa ona lelei o le a i luga ia i tatou; auā ua i ai sa tatou so’otaga ola ma le puna o malosi uma e tumau. I lo tatou olaga fa’aleatua, o le a aumaia ai i tatou i lalo o le puleaga a Iesu Keriso. O le a tatou lē toe ola i le olaga masani o le loto fa’apito, ae o le a soifua Keriso i totonu ia te i tatou. O Lana amio o le a toe fausia i totonu o lo totou natura. O le a fa’apena ona tatou fuaina mai fua o le Agaga Paia – ‘o nisi e ta’i tolu sefulu, o nisi e ta’i ono sefulu, a’o nisi e ta’i selau.’” – *Christ’s Object Lessons*, p. 61.

b. A fa’aosooina i tatou ina ia lē fiafia pe mata’u fo’i e fa’atatau i le fa’atuputeleina o mea leaga i luga o lenei paneta, aisea e matuā fesoasoani tele mai ai ia i tatou le talitonu onosa’i? Iakopo 5:8; Luka 21:19.

“O le lalolagi ua lē fefe i le soliga o le tulafono a le Atua. Talu ai ona o le umi o Lona onosa’i, o lea ua solia ai e tagata Lana pule. Ua latou fa’amalosia e le tasi le tasi i le fa’apologaina ma le sauā aga’i i Ona tagata, ma fa’apea mai, ‘Pe fa’apefea ona silafia e le Atua? ma, o silafia ea e Lē e Silisiliese?’ Salamo 73:11. Peita’i, e i ai le laina e lē mafai ona latou sopoia. Ua lata mai le taimi o le a latou ausia ai le laina fa’atapula’aina. E o’o lava i le taimi lenei, ua toeitiiti lava a latou sopoia tuaoi o le umi o le puapuagatia o le Atua, o gata’aga o Lona alofa tunoa, o gata’aga o lona alofa. O le a tula’i le Alii ina ia ta’uamionuina Lona lava vi’iga, ma lavea’i i Ona tagata, ma ia taofia le fa’atuputeleina o le amiolētonu.” – *Ibid.*, pp. 177, 178.

5. FA'ATA'ITA'IGA INA IA FA'AMALOSIA AI I TATOU

- a. **I totonu o le ekalesia, o a mea ua matuā fa'atele lo tatou taula'i i ai – ae o le a se mea e tatau ona tatou manatua e suitulaga ai? Levitiko 19:18; Iakopo 5:9, 10.**

“O Apelu, le kerisiano muamua lava o le fanau a Atamu, na oti fa'amaturo. O Enoka na feoa'i ma le Atua, ma sa lē iloa o ia e le lalolagi. O Noa na tauemuina e peisea'i o se tagata so'ona finafinau tele ma taufa'afefe. 'O isi na o'o i ai tofotofoga o tauemuga sauā ma le sasa, ioe, atoa ma noanoataga, ma tu'uina i falepuipui.' 'O isi na fa'ataugāina, na latou lē taliaina le lavea'iga; ina ia maua e i latou se toe tu mai nai le oti e sili atu ona lelei.' Eperu 11:36, 35.

“I augā tupulaga ta'itasi, o ave feau filifilia a le Atua sa faitioina ma sauāina, peita'i e ala atu i o latou puapuaga, ua fa'asalalau atu ai le iloa e fa'atatau i le Atua. O so'o ta'itasi uma lava o Keriso e tatau ona la'a mai i o latou tulaga ma tauave i luma le galuega lava lea e tasi, ma lo latou iloa, o ō latou fili e lē mafai ona latou faia se mea e tete'e ai i le upu moni, ae na o le lagolagoina ai mo le upu moni. E finagalo le Atua ina ia aumaia le upu moni i luma ma ia faia ma mataupu o su'esu'ega ma talanoaga, e ala i le uiga inoino o loo tu'uina i ai. O mafaufau o tagata e tatau ona fafaguina; o finauga ta'itasi uma lava, o tu'ua'iga ta'itasi uma lava, o taumafaiga ta'itasi uma lava ina ia fa'asāina le sa'olotoga o le malosi fai filifiliga a le mafaufau, o auala ia a le Atua o le fafaguina o mafaufau na semanu e momoe.

“E matuā fa'atele lava ona va'aia leni i'uga i le tala'aga o avefeau a le Atua! Ina ua fetogia i ma'a Setefano amiotonu atamai e tautala ma oti ai ina ua fa'aosoina e le fono a Iutaia, e lē'i i ai se mea na leiloa mai i le galuega o le tala lelei. O le malamalama o le lagi lea na fa'apupulaina ai ona foliga, o le alofa mutimutivale fa'alelagi na ia tautala mai ai i lana tatalo ae oti loa, na pei o se ū ma'ai o le talitonuga i tagata fa'aitū'au fa'aailoga tagata o le fono sa tutū latalata mai, ma o Saulo, le Faresaio sauā, na avea o se ipu filifilia e tauaveina le suafa o Keriso i luma o tagata o Nu'u ese ma tupu ma le fanauga a Isaraelu.” – *Thoughts From the Mount of Blessing*, pp. 33, 34.

FESILI TOE FA'AMANATU

1. **O le a se mea ou te mana'omia ia ou iloa e fa'atatau i le aogā o la'u tupe?**
2. **O le a le uiga o le lu'i a Keriso i le Iakopo 5:1?**
3. **O le a le vaivaiga atonu o loo o'u agasala ai e fa'atatau i feso'ota'iga tau tupe?**
4. **I le i'uga, e fa'apefea ona susulu mai le onosa'i i le avea ma amio lelei i le lotolotoi o tagata o le Atua?**
5. **Na fa'apefea ona fa'atumauina e i latou na sauāina ma oti fa'amaturo, la latou sini, i le tala'aga atoa?**

Tumau e Ala i le Fa'atuatua

MAU TAULOTO: Ia fefa'aalia'i a outou agasala, ma tatalo le tasi mo le tasi, ina ia fa'amalōlōina outou. Ua aogā tele le tatalo fa'atauana a le tagata amiotonu. “(Iakopo 5:16).

“O le tatalo agamalū finafinau o le a lavea'iina ai le tagata mai i le oti, ma o le fa'aaliga o agasala ma le toe fuata'iina, o le a natia ai le tele o agasala.” – *The Review and Herald*, December 16, 1902.

Faitauga Fautuaina: *The Ministry of Healing*, pp. 225-233;
Testimonies for the Church, vol. 3, pp. 271-293.

Ulua'i Aso

Tesema 22

1. FA'AMOEMOE

a. **O le a le uiga lelei lea e iloga fa'apitoa ai lava Iopu – ma o le a se mea e ta'u mai e lenei uiga ia i tatou e fa'atatau i le Atua? Iakopo 5:11.**

“[O le Ali'i] Na te fa'atali ma le alofa lē mafa'avaivaia ina ia fa'afofoga i le fa'aaliga o agasala a tagata fa'alogogatā ma ia talia lo latou salamō. Na te silasila mai mo lo tatou fa'afo'iina atu ia te Ia o le agaga fa'afetai, e fa'apei ona va'ava'ai o le tinā mo foliga fiafia o le taliaina o ia mai i lana tama pele. Na te finagalo ia i tatou ina ia tatou malamalama i le naunau finafinau alofa mai o Lona loto ia i tatou. Na te vala'auliaina i tatou ina ia tatou avatua o tatou tofotofoga i Lona finagalo agalelei, o ō tatou fa'anoanoaga i Lona alofa, o ō tatou manu'a i Lana fa'amalologa, o lo tatou vaivai i Lona malosi, o lo tatou gaoga'i i Lona tumu atoatoa. E lē'i i ai lava ma se tagata na sau ia te Ia na lē fa'amalieina. 'Na latou va'ava'ai atu ia te Ia, ma sa latou fiafia: ma o ō latou foliga e lē'i fa'amāina.’

“O i latou e sa'ilia fa'alilolilo le Atua ma ta'u atu ia te Ia o latou mana'oga ma ole atu mo le fesoasoani, o le a fa'afofogaina mai i latou.” – *Thoughts From the Mount of Blessings*, pp. 84, 85.

b. **O fa'apefea ona toe tautalagia mai e Iakopo upu a Keriso e fa'atatau i le fa'amaoni? Iakopo 5:12; Mataio 5:37.**

“O mea uma lava e faia e kerisiano, e tatau ona manino e pei o le susulu o le la.” – *Ibid.*, p. 68.

2. FA'ATUATUA FA'AFEAGAI MA LE TALITONUGA SESĒ

a. A tatou puapuagatia i ma'i, e fa'aapefa ma aisea ua fa'alototeleina ai i tatou ina ia tatou o mai i Lē Na te foa'iina mai le ola? Iakopo 5:13-15; Salamo 103:1-3.

“O le Atua e tutusa lelei Lona naunau e fa'amalōlō le tagata ma'i i le taimi lenei, e fa'apei ona fetalaiia e le Agaga Paia upu nei e ala mai i le fai salamo. Ma o Keriso o Ia lava o le foma'i alofa mutimutivale i le taimi lenei e fa'apei ona avea o Ia ma foma'i i le taimi o Lana auauunaga i luga o le fogaeleele. O totonu ia te Ia o loo i ai le vai fofō o le fa'amalologa mo ma'i ta'itasi uma, toe fa'afo'isia ai le mana mo ma'i uma. O Ona so'o i le taimi lenei e tatau ona tatalo mo tagata mama'i e fa'apei tonu lava ona tatalo o le au so'o anamua. Ma o le a fa'amaloloina ma'i; auā 'o le tatalo o le fa'atuatua o le a lavea'iina ai le tagata ma'i.' Ua ia i tatou le mana o le Agaga Paia, o le mautinoaga to'a lelei o le fa'atuatua, lea e mafai ona ole atu ma maua mai ai folafolaga a le Atua. O le folafolaga lea a le Alii, 'O le a latou pa'i atu i ē mama'i, ma o le a fa'amaloloina fo'i i latou' (Mareko 16:18), e matuā mafai lava ona talitonuina i le taimi lenei, e fa'apei ona faia i aso o aposetolo.” – *The Ministry of Healing*, p. 226.

b. O le a le paleni e tatau ona tatou iloa pe a sa'ilia le ola maloloina? Salamo 66:18.

“E lē ta'uaogāina i tatou i le alofa o [le Ali'i], peita'i a'o tatou tu'uina atu i tatou ia te Ia, Na te talia i tatou. O le a Ia galue mo i latou, e ala atu fo'i ia i latou e mulimuli ia te Ia.

“Peita'i se'ivagana lava ua tatou ola i le usita'i i Lana upu, e mafai ai ona tatou ole atu ma mauaina le fa'ataunu'uina o Ana folafolaga. . . . Afai tatou te tu'uina atu ia te Ia na o se vaega, o se loto fa'a'afa'afa o le usita'i, o Ana folafolaga o le a lē fa'ataunu'uina ia i tatou.” – *Ibid.*, p. 227.

“O le auala na galue ai Keriso o le tala'iina lea o le upu, ma fa'amalolo mafatiaga e ala i galuega fa'avavega o fa'amalologa. Peita'i ua fa'atonuina a'u e lē mafai ona tatou galulue i le auala lea i le taimi lenei; auā o le a fa'aaoga e Satani lona mana e ala i lona faia o vavega. O auaua a le Atua i le taimi lenei, e lē mafai ona latou galulue e ala i vavega, auā o galuega sese o fa'amalologa, lea e fai mai e aumai i le Atua, o le a faia.

“O le mafua'aga lea ua fa'asino mai ai e le Alii se auala e tatau ona tauaveina ai i luma e Ona tagata se galuega o le fa'amaloloina o le tino e tu'ufa'atasia ma le a'oa'oina o le upu. O falema'i e tatau ona fa'atuina, ma o nei fale e tatau ona feso'ota'i ma le aufaigaluega o le a tauaveina i luma galuega fa'amisionare moni o togafitiga mo ē mama'i. E fa'apena ona lafo atu se a'afiaga e puipuia ai, ia i latou e o mai i falema'i mo togafitiga.

O le auala lenei ua faia e le Alii e tatau ona faia ai le galuega fa'amisionare o le tala lelei o togafitiga o ma'i, mo tagata e to'atele.” – *Medical Ministry*, p. 14.

3. LUA ITUAIGA LOTO TELE

a. Ta'u mai se vaega tāua o le fa'amalologa o loo lē amanaia i se tulaga fa'anoanoa. Iakopo 5:16.

“E matuā sese lava i latou e manatu o le fa'aaliaina o agasala, o le a fa'aitiitia ai lo latou mamalu, ma fa'aitiitia ai lo latou a'afiaga i le lotolotoi o ō latou uso a tagata. O le pipi'i atu i lenei manatu sese, e ui lava ina latou iloa o latou sese, e to'atele e to'ilalo ai i lo latou lē fa'aalia o ō latou sese, ae ua latou lē amanaia ai sese ua latou faia i isi, ma fa'apena ona fa'atigā ai i o latou lava olaga, ma fa'apogisaina ai olaga o isi. O le a lē fa'alumaina lou mamalu i lou fa'aalia o au agasala. Ia 'alo ese mai i lenei mamalu fa'asesēina. Pa'ū i luga o le Papa ma ē gaugau ai, ma o le a foa'i atu e Keriso ia te oe le mamalu moni fa'alelagi. Aua ne'i taofia se tasi e le fa'amaualuga, manatunatu o le tagata ia te ia lava, poo lana lava amiotonu, mai i le fa'aaliaina o lana agasala, ina ia mafai ai ona ia maua le folafolaga. 'O lē na te ufiufi ana agasala, o le a lē manuia o ia: a'o lē e fa'aali ana agasala ma lafoa'i, o le a alofagia o ia' (Fa'ata'oto 28:13). Aua ne'i ē natia se mea e tasi mai i le Atua, ma aua tou te fa'atalalē i le fefa'aalia'i o a outou agasala i lo outou au uso. 'Ia fefa'aalia'i a outou agasala, ma tatalo le tasi mo le tasi, ina ia fa'amaloloina outou' (Iakopo 5:16). E tele agasala ua tu'ua e lē fa'aaliaina e fa'afetaia'i maia le tagata agasala i le aso o le iloiloga mulimuli; e matuā sili atu le lelei o lou fetaia'i ma au agasala ma lafoa'ia au agasala i le taimi lenei, ia fa'aalia ma lafoa'ia, manū o aioi mo oe le Taulaga e togiolaina ai. Aua ē te fa'atalalē i lou iloaina o le finagalo o le Atua e fa'atatau i lenei mataupu. O le ola maloloina o lou agaga ma le fa'aolataga o isi, e fa'alagolago i le filifiliga e te faia e fa'atatau i lenei mataupu.” – *Selected Messages*, bk. 1, pp. 326, 327.

b. Ina ua popole Elia e fa'atatau i le fulitua fa'aleagaga o lona mālō, o le a le gaoigana ia faia – ma na fa'aapefea ona fa'atumauiina o ia e le Atua? 1 Tupu 17:1-3.

“O le mafatia tigā tele o le loto o Elia, na ia sa'ilia ai le Atua ina ia taofia le nu'u na fa'asilisilia muamua, i a latou amioga leaga, ina ia tu'uina mai ia i latou fa'asalaga, pe afai e mana'omia, ina ia ta'ita'ia ai i latou ia latou iloa ai, i lona malamalama moni, lo latou o ese mai i le Lagi. Na ia fa'anaunau na te va'aia i latou ua aumaia i le salamō manū latou te lē'i o ese mamao atu i a latou amioga leaga, ma latou fa'aosofia ai le to'asa o le Atua ina ia matuā fa'aumatia lava i latou. . . .

“O Elia na tu'uina atu i ai le tiute o le fa'ailoaina atu ia A'apo o le feau o le fa'asalaga a le Lagi. . . I le maota o le tupu, na te le'i aioi atu ina ia fa'ataga o ia e ulufale atu, na te lē'i fa'atali fo'i ina ia fa'asilasila aloa'ia mai lona ulufale atu. O lona ofu i ofu pa'a'ā na masani ona ofu e perofeta o lena taimi, na ia pasia ai leoleo, e foliga mai e lē'i iloa o ia, ma ia tula'i ai mo sina taimi i luma o le tupu lea ua matuā ofo tele.” – *Prophets and Kings*, pp. 120, 121.

4. A’OA’O MAI IĀ ELIA

- a. **Aisea ua tu’uina mai ai tatalo a Elia mo le Atua ina ia fafagu i Lona malō fulitua mai ia te Ia, e avea o se fa’ata’ita’iga mo i tatou? Iakopo 5:17.**

“O olega fai so’o, o a’oa’iga, ma lapata’iga na lē mafai ona aumaia ai Isaraelu ia salamō. Na o’o mai le taimi na tatau ai ona fetalai atu le Atua ia i latou e ala i fa’asalaga. O le iloaina o tagata tapua’i ia Pa’ala na latou fai mai o oa o le lagi, o le sau ma le timu, e lē’i sau mai ia Ieova, ae na sau mai i malosi pule o le natura, ma o le malosi foafoa o le la lea na fa’amauoaina ai le laueleele ma mafua ai ona matuā fua tele mai, o lea, o le mala mai i le Atua na fuafuaina ina ia paū mamafa mai i luga o le eleele fa’aleagaina. O ituaiga liliu ese o Isaraelu na mana’omia ina ia fa’ailoaina atu i ai le valea o lo latou talitonu fa’alagolago atu i le malosi o Pa’ala mo fa’amanuiaga fa’alētumau. Se’ivagana ua latou liliu i le Atua ma le salamō, ma ioeina o Ia o le puna o fa’amanuiaga uma, o le a lē pa’ū mai i luga o le eleele se matāua poo se timu.” – *Prophets and Kings*, p. 120.

- b. **Ina ua mavae ona toe fa’afou e Isaraelu lona fa’amaoni i le Atua, o fa’apefea ona toe avea tatalo a Elia o se fa’ata’ita’iga mo i tatou? Iakopo 5:18; 1 Tupu 18:39-45.**

“Na fa’aono ona tatalo ma le finafinau [Elia], peita’i e lē’i i ai se fa’ailoga e iloa ai na taliina mai lana olega, peita’i o lona fa’atuatua malosi na ia aoiina atu ai lana olega i le nofoali’i o le alofa tunoa. Ana fa’apea na te fa’avaivai i lana tatalo lona ono, semanu e lē taliina mai lana tatalo, peita’i na ia finafinau fa’amalosi pea se’ia o’o ina o’o mai le tali. Ua ia i tatou se Atua e lē tutuli Ona taliga i a tatou aioiga; ma afai tatou te fa’amaonia Lana upu, o le a Ia fa’amamaluina lo tatou fa’atuatua. Na te finagalo ia i tatou ina ia tu’ufa’atasia o tatou fa’anaunauga uma lava ma mea uma Na te fiafia i ai, ona mafai loa lea ona Ia fa’amanuia saogalemu ia i tatou; auā o le a tatou lē aveina le viiga ia i tatou lava, pe a o’o mai le manuia ia i tatou, ae o le a tatou tu’uina atoatoa atu le viiga i le Atua. E lē taliina mai e le Atua i taimi uma a tatou tatalo i le taimi muamua tatou te vala’au atu ai ia te Ia; auā, afai na te faia lenei tulaga, o le a tatou manatu, sa i ai sa tatou aiā i fa’amanuiaga uma lava ma mea lelei na Ia foa’i mai ia i tatou. E aunoa ma le su’esu’eina o ō tatou loto ina ia iloa ai poo i ai se agasala o loo tatou fiafia i ai, po’o so’o se agasala o loo tatou tu’inanau sa’oloto i ai, o le a tatou lē fa’autauta, ma tatou lē iloa ai lo tatou fa’alagolago atu ia te Ia, ma lo tatou mana’omia o Lana fesoasoani.

“O Elia sa ia fa’amaulaloina o ia lava se’ia o’o ina i ai o ia i le tulaga o le a ia lē aveina ai le viiga ma le mamalu mo ia lava. O le tulaga lenei e fa’afogaina ai tatalo e le Ali’i, auā o le taimi lea o le a tatou tu’uina atu ai le vi’iga ia te Ia.” *The SDA Bible Commentary* [E. G. White Comments], vol. 2, pp. 1034, 1035.

5. FA'ALAUATELEINA ATU O LE ALOFA AGALELEI

- a. I le lotolotoi o mea e fa'anoanoa ai o loo lafo mai i luga ia i tatou e tagata lē atoatoa i totonu o se lalolagi pa'ū, o le a le olega mulimuli o loo fa'ai'uina ai e Iakopo lana tusi ia i tatou? Iakopo 5:19, 20.

“Aua ne'i ē tu'uina atu i le tagata ua sese se avanoa e fa'avaivai ai. Aua ne'i fa'atagaina se uiga pa'a'ā fa'a-Faresaio e sau i totonu ma fa'amanu'alia ai lou uso. Aua ne'i i ai se uiga o'ona fa'atauemu e tula'i a'e i totonu o le mafaufau poo le loto. Aua lava ne'i i ai se lagona o le fa'atauemu e fa'aalia i le leo. Afai e te tautala i sau lava upu, afai e te faia se uiga lē popole fa'alēano, pe e te fa'aילוaina fo'i lou masalosalo poo lou lē talitonuina o isi, o le a fa'amaonia ai le fa'afanoga o se tagata. Na te mana'omia se uo ma se loto alofa o le Uso Matua e pa'i atu i lona loto fa'aletagata. Ia fa'atagaina o ia na te lagona le pipi'i mau atu a se lima agaalofoa, ma ia fa'alogo i le musumusuga, Ia tā tatalo. O le a foa'i mai e le Atua ia te oulua uma se iloa taumasuasua lava. O le tatalo e fa'atasia ai i tatou o le tasi ma le tasi ma le Atua. O le tatalo e aumaia ai Iesu i ō tatou tafatafa, ma foa'iina mai ai i le tagata vaivai, lē malamalama le malosi fou e manumalo ai i le lalolagi, o le tino, ma le tiapolo. O le tatalo e liliueseina ai osofa'iga a Satani.

“A liliu ese loa le tagata mai i le lē atoatoa fa'aletagata ina ia va'ava'ai atu ia Iesu, ua faia loa se liuaga fa'alelagi i le amio. O le Agaga o Keriso o lo o galue i le loto, e liua ai i Lona fa'atusa. Ia avea loa ma au taumafaiga lou si'itiaina a'e o Iesu. Ia taula'i atu mata o lou mafaufau i 'le Tama'i Mamoe a le Atua, Na te aveesea le agasala a le lalolagi. Ioane 1:29. Ma a'o ē galue i lenei galuega, ia ē manatua, o 'lē na te fa'aliliuina le tagata agasala mai i le sese o lona ala, o le a ia lavea'iina se tagata mai i le oti, ma o le a ia ufiufi le tele o agasala.' Iakopo 5:20. . . .

“O totonu o le fa'amagaloga a le Atua, e tosina atu ai le loto o lē o loo sese i le loto silisiliese o le Alofa Lē mafuatia. O le galu o le alofa mutimutivale fa'alelagi, e tafe atu i totonu o le loto o le tagata agasala, ma tafe atu ai mai ia te ia aga'i atu i isi tagata.” – *Christ's Object Lessons*, pp. 250, 251.

FESILI TOE FA'AMANATU

1. O a taimi i lo'u olaga ua va'aia ai le alofa tunoa taumasuasua o le Atua ia te a'u?
2. O a auala atonu o loo o'u agasala ai i manatu taumatemate e fa'atatau i lo'u ola maloloina?
3. Na fa'apefea ona taliina mai le tatalo a Elia mo lona mālō?
4. Aisea na mana'omia ai e Elia ina ia fa'atele ana tatalo mo le timu ina ia toe liligiina mai?
5. O ai e tatau ona sili atu le agalelei mutimutivale ou te fa'aalia i ai, ma aisea?